

O LE EKALESIA A IESU KERISO O LE AU PAIA O ASO E GATA AI • AOKUSO 2018

# O Le Liahona



**Masini Feaveai  
i Sauniga  
Faamanatuga?  
i. 26**

O le Sauniga e  
Sosoo Ai E te  
Manaomia, i. 18

"O Faamoemoega o  
le Atua e Le Mafai  
ona Taofia," i. 34

**“TATOU TE AGAVAA MO  
LE MANA E FAAMAMA  
AI O IESU KERISO  
PE A TATOU AAI I LE  
FAAMANATUGA MA  
LE AGAVAA.”**

SAUNIA E ELDER DALE G. RENLUND  
MA SISTER RUTH L. RENLUND.



*Mai “Le Meaalofa Matagofie o le Faamanatuga,” itulau 18.*



18

## TALA FAAALIA

### 10 O Le Faavae Faaleagaga mo le Ola Tutoatasi o le Ekalesia i Mea Tautupe

Saunia e Epikopo Gérald Caussé  
*I ana aiaiga tau tupe ma tupe teufaaafaigaluega, ua faaaaoga ai e le Ekalesia ia matapu faavae o loo ia aoaoina atu i ona tagata.*



**I LE FAAVAA**  
 Ata na pueina e Leslie Nilsson.

### 18 O Le Meaalofa Matagofie o le Faamanatuga

Saunia e Elder Dale G. ma Sister Ruth L. Renlund  
*A o tatou aai i le faamanatuga ma le agavaa, e mafai ona tatou faafouina faamanuiaga o le papatisoga, fafafipea.*

### 26 Tapuaiga i se Lalolagi o Masini Faatekonolosi

Saunia e Adam C. Olson  
*E mafai e masini faatekonolosi ona faaleleia pe faaleagaina a tatou tapuaiga faamanatuga.*

### 30 Aoaoaga i Tekonolosi: Faaaafiaina o le Autalavou i le Lalolagi o Masini Faatekonolosi

Saunia e Brian K. Ashton  
*Nai lo le faasaina le faaaoga-in a tekonomosi i le potuaoga, e mafai ona tatou aoao le autalavou lo latou faaaogaina mo so latou lelei.*

### 34 Au Paia: O Le Tala o le Ekalesia—Mataupu 6: O le Meaalofa ma le Mana o le Atua

*Ua tuuina atu ia Josefa le mana e toe faaliliu ai, i le taimi lea ua iai faatasi ma le fesoasoani a Oliva Kaotui.*

## MATAGALUEGA

### 4 O Ata o le Faatuatua: Darren ma Stacey Rea—Sini, Ausetalia

### 6 Mataupu Faavae mo le Auaunaga: Atinaeina o Fesootaiga Aoga


### 16 O o Tatou Aiga, O o Tatou Auaiga: Taumafai ina ia Avea ma Tina Atamai ma le Mamalu

Saunia e Lilian Pagaduan-Villamor

### 40 O Leo o Le Au Paia o Aso e Gata Ai

### 80 Seia Tatou Toe Feiloai: Taumafai Pea

Saunia e Elder Marvin J. Ashton



48

**44 Le Ala na Aoao ai Eric e Talitonu i le Atua**

Saunia e Richard M. Romney

*E ui i faigata ma tiga, sa maua e lenei talavou matua mai Kana le faatuatua i le Atua, na saunia ai o ia e talia le talalelei.*

**48 Ae Faapefea Pe a Ou Misia?**

Saunia e Sarah Keenan

*Afai tatou te avea le fefe i le toilalo e taofia ai i tatou mai le taumafai, o le a tatou misia avanoa matagofie mo le tuputupu ae.*



*Vaai pe mafai ona e mauaina le Liahona o lo o natia i le lomiga lenei. Faaataata: O a folafolaga e te maua i le Tusi a Mamona?*



50

**50 Ao le i Valaauna Oe e Auauna Atu**

Saunia e Ryan Carr

*Ia maua le manatu o faifeautalai faamisiona a o latou faamatala mai o latou aafiaga ma fautua mai auala e saunia ai le autalavou e auauna atu.*

56

**56 E Lima Mea o le a Aoaoina ai Oe i le Mataupu Faavae ma Feagaiga e uiga i le Avea ai o se Faifeautalai**

Saunia e Charlotte Larcabal

*O lo o faamatalaina mai e nei mau mataupu faavae o le galuega faafaifeautalai e aoga mo i tatou uma a o tatou taumafai e faaasoa atu le talalelei.*

58

**58 E Ono Mafuaaga Tatou Te Matua Manaomia ai le Ekalesia!**

Saunia e Eric B. Murdock ma Joshua J. Perkey

*O nisi nei o mafuaaga e alagata-tau ai le faatulagaga o le Ekalesia i fuafuaga a le Atua mo i tatou.*

62

**62 Fesili ma Tali**

*O a ni gaoioiga e tatau ona ou faia i ou taimi avanoa ina ia sili atu ai ona taua?*

64

**64 Pepa Lautele o I Ai se Savali: Faaaliga mo o Tatou Olaga**
**65 O Le Upu Mulimuli: Auala e Ono e Manatua ai Pea le Faaola**

Saunia e Elder Gerrit W. Gong

70


**66 E Mafai Ona Ou Tatalo Pea**

*E mafai ona e tali nei fesili e uiga i le tatalo?*

68

**68 Faasusulu Atu Lou Malamalamā: O Se Molimau Pupula**

*E ui ina sa ou fefe, sa ou faaoso atu lau molimau i luma o isi tamaiti aoga.*

70

**70 O Le Folafolaga o le Le Femisaii**

Saunia e Myrna M. Hoyt

*Na manatua e Timmy se tala mai le Tusi a Mamona ma iloa ai le auala e taofia ai e ia ma lona tausoga le femisaii.*

72

**72 Faatuatua, Faamoemoe, ma le Alofa Tunoa—Vaega 1: O Se Leo o le Filemu**

Saunia e Megan Armknecht

*Sa le saogalemu le ola ai i Holani i le taimi o le taua, ae na iloa e Grace o le a manuia lona aiga.*

74

**74 E molimau Apostolo ia Keriso**

Saunia e Elder Ronald A. Rasband

75

**75 Soka ma Aso Sa**

Saunia e Elder Jörg Klebingat

*Sa ou fiafia i le soka, ae ina ua ou maua le Ekalesia, sa sili atu ona ou alofa i le Atua.*

76

**76 Tala o Tusitusiga Paia: Tavita ma Koliata**

Saunia e Kim Webb Reid

79

**79 Itulau e Valivali: E Mafai Ona Avea Au ma Faataitaiga Lelei**

O Le Lomiga Faamaonua Faa-Samoa a le Ekalesia  
a Iesu Keriso o le Au Paia o Aso e Gata Ai

**Susuga a le Au Peresitene Sili:** Russell M. Nelson,  
Dallin H. Oaks, Henry B. Eyring

**O Le Korama a Apostolo e Toasefululu:**

M. Russell Ballard, Jeffrey R. Holland, Dieter F. Uchtdorf,  
David A. Bednar, Quentin L. Cook, D. Todd Christofferson,  
Neil L. Andersen, Ronald A. Rasband, Gary E. Stevenson,  
Dale G. Renlund, Gerrit W. Gong, Ulisses Soares

**Faatonu:** Hugo E. Martinez

**Faatonu Lagolago:** Randall K. Bennett, Becky Craven

**Fautua:** Brian K. Ashton, LeGrand R. Curtis Jr., Edward  
Dube, Sharon Eubank, Cristina B. Franco, Donald L.  
Hallstrom, Douglas D. Holmes

**Pule Faatonusili:** Richard I. Heaton

**Faatonusili o Mekasini a le Ekalesia:** Allan R. Loyborg

**Pule o Mea Tau Pisini:** Garff Cannon

**Pule Faatonutonu:** Adam Olson

**Pule Faatonutonu Lagolago:** Ryan Carr

**Lagolago o Lomiga:** Francisca Olson

**Au Tuisusi ma Faatonutonu:** Maryssa Dennis, David  
Dickson, David A. Edwards, Matthew D. Flitton, Lori Fuller,  
Garrett H. Garff, LaRene Porter Gaunt, Jon Ryan Jensen,  
Charlotte Larcabal, Michael R. Morris, Eric B. Murdock,  
Sally Johnson Odekirik, Joshua J. Perkey, Jan Pinborough,  
Richard M. Romney, Mindy Selu, Chakell Wardleigh,  
Marissa Widdison

**Pule Faatonusili Tusiata:** J. Scott Knudsen

**Faatonusili Tusiata:** Tadd R. Peterson

**Au Mamanu:** Jeanette Andrews, Fay P. Andrus,  
Mandie Bentley, C. Kimball Bott, Thomas Child,  
David Green, Colleen Hinckley, Eric P. Johnsen,  
Susan Lofgren, Scott M. Mooy, Emily Chieko Remington,  
Mark W. Robison, Brad Teare, K. Nicole Walkenhorst

**Faatonu o le Puletaofia ma Fatufatuga:**

Collette Nebeker Aune

**Pule i le Gaosiga:** Jane Ann Peters

**Au Gaosi:** Ira Glen Adair, Julie Burdett, Thomas G. Cronin,  
Bryan W. Gygi, Ginny J. Nilson, Derek Richardson

**Tailolomi:** Joshua Dennis, Ammon Harris

**Faatonusili Lolomiga:** Steven T. Lewis

**Faatonusili o le Tufatufaga:** Troy R. Barker

Mo le okaina o mekasini, aliu i le store.lds.org po o le  
Faletusi Tutotonu i Pesega. Telefoni 64127. Totogi o le  
Mekasini: \$0.55 (Samoa) ī le kopi. Totogi mo le Tausaga  
Atoa \$6.60 (Samoa).

**Auina atu tuisusiga ma faafesi i luga o le  
initoneti** i le liahona.lds.org: pe meli mai i le *Liahona*,  
Rm. 2420, 50 E. North Temple, Salt Lake City, UT 84150-  
0024, USA; po o le i-meli: liahona@ldschurch.org.

O *Le Liahona* (o lona uiga i le Tusi a Mamona o le "tapasa"  
po o se "faatonutonu") e lomia i le faa-Alepania, Aminia  
(Sasae), Pisilama, Palekeria, Kemputia, Sepuanu, Saina,  
Kalaotia, Siekisolvakia, Tenimaka, Take, Igilisi, Esitonua,  
Fiti, Fineiani, Farani, Siamana, Eleni, Hanikeri, Initu, Iselani,  
Indonesia, Italia, Japani, Kiripati, Korea, Latvia, Litunua,  
Malakasa, Masela, Monokolia, Nouei, Polani, Potukale,  
Romania, Rusia, Samoa, Saina (ua faafaigoifieina), Silovenia,  
Sipanioli, Suetenua, Swahili, Tagaloa, Tahiti, Tai, Toga,  
Iukureini, Urutu, ma Viatename. (E eseese lava gagana.)

© 2018 Puletaofia e le Intellectual Reserve, Inc. Ua taofia  
aia tatau uma. Lomia i le lunaitate Setete o Amerika.

**Faamatatalaga o le Puletaofia:** Vagana ua faailoa atu,  
e mafai e tagata taitoatasina ona kopina anomea mai le  
*Liahona* mo lo latou faaaogainoa patino, ma le saili tupe  
(e aofia ai mo valaauga o le Ekalesia). O lenei aia tatau  
e mafai ona faaleaogaina i soo se taimi. O anomea o  
mea faitino e mafai ona kopina pe afai o loo faailoa  
mai se faasa i le laina o loo i ai ma le faatufugaga.  
O fesili mo le Puletaofia e tatau ona faatuatusi mai  
i le Intellectual Property Office, 50 E., North Temple  
St., FL 13, Salt Lake City, UT 84150, USA; email:  
cor-intellectualproperty@ldschurch.org.

**For Readers in the United States and Canada:**  
August 2018 Vol. 42 No. 8. O Le Liahona (USPS 311)  
Samoan (ISSN 1045-0947) is published monthly by The  
Church of Jesus Christ of Latter-day Saints, 50 East North  
Temple, Salt Lake City, UT 84150. USA subscription price  
is \$10.00 per year; Canada, \$12.00 plus applicable taxes.  
Periodicals Postage Paid at Salt Lake City, Utah. Sixty days'  
notice required for change of address. Include address label  
from a recent issue; old and new address *must* be included.  
Send USA and Canadian subscriptions to Salt Lake  
Distribution Center at address below. Subscription help  
line: 1-800-537-5971. Credit card orders (Visa, MasterCard,  
American Express) may be taken by phone. (Canada Post  
Information: Publication Agreement #40017431)

POSTMASTER: Send all UAA to CFS (see DMM 507.1.5.2).  
NONPOSTAL AND MILITARY FACILITIES: Send address  
changes to Distribution Services, Church Magazines,  
P.O. Box 26368, Salt Lake City, UT 84126-0368, USA.

# Faaopoopoga i le Initoneti



Faitau tusiga ma auina atu la oe lava  
tusiga i le [liahona.lds.org](http://liahona.lds.org)



Sue savali musuia e mafai ona  
faasoaa atu (i le gagana Peretania,  
Potukale, ma le Sipaniolo)  
i le [facebook.com/liahona](https://www.facebook.com/liahona)



Auina mai finagalo faaalia i le  
[liahona@ldschurch.org](mailto:liahona@ldschurch.org)

AIKONA MAI LE GETTY IMAGES

## Lesitala i le [store.lds.org](https://store.lds.org)

Po o le asiasi i se faletusi autu, fesili  
atu i taitai o le uarota, pe valaau i le  
1-800-537-5971 (I.S., ma Kanata)



## AUTU I LE LOMIGA LENEI

*E tau mai e numera le itulau muamua o le tusiga.*

**Agaga Paia,** 18, 30, 34,  
43, 50, 56

**Agalelei,** 70

**Aiga,** 4, 16, 40, 72, 79, 80

**Aoaoga,** 16

**Aso Sapati,** 18, 75

**Auauna atu,** 6, 40

**E le atoatoa le malosi,** 44

**Faaaliga,** 34, 56, 58, 64

**Faamanatuga,** 18, 65

**Faatuatua,** 4, 44, 55, 65,  
72, 76

**Faigata,** 41, 44, 80

**Feagaiga,** 18, 58

**Fefe,** 48, 65, 72, 76

**Filemu,** 72

**Galuega faafaifeatalai,**  
42, 50, 56

**Iesu Keriso,** 18, 65, 74

**Iosefa Samita,** 34

**Liua,** 44

**Molimau,** 6, 34, 68

**Salomo,** 34, 43

**Sauniga a le Ekalesia,** 26,  
30, 58

**Sauniuniga mo**

**Faifeatalai,** 50, 56, 75

**Sefuluai,** 10

**Taitai o le Ekalesia,** 43

**Talafaasolopito o le  
Ekalesia,** 34, 58

**Tama Faalelagi,** 18, 41,  
44, 58

**Tatalo,** 41, 43, 44, 66, 72

**Taua o le tagata  
lava ia,** 62

**Tekinolosi,** 26, 30

**Tulaga faatinā,** 16

**Tupe,** 10

**Tusi a Mamona,** 18, 34,  
42, 70

**Tutumau,** 80

*Na faatau atu e Darren ma Stacey mea uma ina ia tulimatai lana miti i se galuega e faatinoina ata i se faletifaga i Lonetona, Egelani. Ae ina ua la iloa o le a maua e i laua se pepe ina ua tuanai le tele o tausaga o taumafai, ua la iloa ai la te le gafatia ona ola ai iina i le na o lona totogi.*

CHRISTINA SMITH, PUE ATA

## Darren ma Stacey Rea

*Sini, Ausetalia*


**Stacey:** Sa amata ona ma talanoa e uiga i le toe foi atu i Ausetalia. E leai ni faletifaga i Brisbane. E alagatatau ona faamatuu atu le galuega a Darren.

**Darren:** Sa ou lagona e faapei ua ou oo i se tulaga maulalo lava. Sa maitaga lou toalua, ae leai sau galuega ma sa le gafatia so maua nofoaga e nonofo ai.

**Stacey:** Na iai se taimi i le potu tamea i le fale o ou matua sa ma tootutuli ifo ai ma tatalo.

**Darren:** Ona ma faalogo lea ua iai se faletifaga fou ua tatala i Brisbane. Sa maua ni au galuega faakonakarate i mea tau faatinoga o atatifaga.

**Stacey:** Ua maua aoao e tusa lava po o le a le mea o lo o tatou aafia ai, o le mea e sili ona taua e tatou te maua o le faatuatua i le Tama Faalelagi ma lesu Keriso.





# Mataupu Faavae mo le Auaunaga

## ATINAEINA O FEGALEGALEAIGA AOGA

*E faateleina lo tatou gafatia mo le tausiga o isi pe a i ai se tatou fegalegaleaiga anoa ma i latou.*

○ le valaaulia e auauna atu i isi o se avanoa lea e fausia ai ni fegalegaleaiga alofa ma i latou—o le ituaiga fegalegaleaiga lea o le a faatoafimarie ai i latou i le talosaga mai mo se po o le taliaina o la tatou fesoasoani. Pe a tatou faia se taumafaiga e atiae lena ituaiga o fegalegaleaiga, o le a mafai ona suia e le Atua olaga i itu uma o le fegalegaleaiga.

“Ou te matuai talitonu e leai se suiga taua e aunoa ma ni fegalegaleaiga taua,” na saunoa ai Sharon Eubank, Fesoasoani Muamua i le Au Peresitene Aoao o le Aualofa. Ma mo a tatou galuega o le auauna atu ina ia avea ma suiga i olaga o isi, na ia saunoa ai, e tatau ona “mauaa i le naunau faamaoni e faamalolo ma faalogo

ma felagolagomai ma faaaloalo.”<sup>1</sup>

O fegalegaleaiga anoa e le o ni togafiti. E fausia i latou i luga o le agaalofa, taumafaiga faamaoni, ma le “alofa faamaoni” (MF&F 121:41).<sup>2</sup>

### Auala e Fausia ai ma Faamalosia Fegalegaleaiga

“Tatou te fausia [fegalegaleaiga] i le tasi le tagata i le taimi,” na saunoa ai Elder Dieter F. Uchtdorf o le Korama a Aposetolo e Toasefululua.<sup>3</sup> Ao tatou taumafai e fausia ni fegalegaleaiga anoa ma i latou tatou te auauna atu i ai, o le a mafai ona taitaia i tatou e le Agaga Paia. O fautuaga nei o loo faavae i luga o se mamanu na ofoina mai e Elder Uchtdorf.<sup>4</sup>

## Faaalu faatasi le taimi.

O se fegalegaleaiga e alu ai se taimi e atiae. Vaavaai mo avanoa e faatumau ai se fesootaiga. Ua faaalia e duesuega o le faailoa atu i tagata e te popole ma alofa i ai e taua mo fegalegaleaiga maloloina.<sup>6</sup> Asiasi soo atu ia i latou ua tofia oe e te auauna atu i ai. Talanoa ma i latou i le lotu. Faaaoga po o le a lava ni auala faaopoopo e aoga—e pei o le imeli, Facebook, Instagram, Twitter, Skype, valaau i le telefonii, po o le auina atu o se kata. Na saunoa Elder Richard G. Scott (1928–2015) o le Korama a Apostolo e Toasefululua e uiga i le mana o ni faalauiroaga faigoifie ma fatufuai o le alofa ma le lago-lago: “E masani lava ou te tatalaina a'u tusitusiga paia, . . . ae ou maua ai se fasipeda faamalosiau ma le agaalofa mai [lo'u toalua o] Jeanene, ua sulu i itulau. . . . O na faamatalaga tusitusiga taua . . . e faaauau pea ona avea ma se oa e le mafaatauina o le mafanafana ma le faananau.”<sup>7</sup>



la manatua  
foi, e manaomia  
i se fegalegaleaiga ni  
tagata se toalua. E mafai ona e ofoina  
atu le alofa ma le faauooga, ae o le a  
le mafai ona tuputupu ae se fegale-  
galeaiga sei vagana ua taliaina le ofo  
ma toe foi mai. Afai o le isi tagata e  
foliga mai e le taliaina, aua le faamalo-  
sia le fegalegaleaiga. Tuu atu ia te  
ia se taimi e vaai ai i au taumafaiga  
faamaoni, ma pe a talafeagai ai,  
fefautuaaina ma ou taitai pe  
mata e foliga mai e i ai pe leai  
foi se faamoemoega o se fega-  
legaleaiga anoa.

## Aoao e uiga ia i latou.

Na aoao mai Peresitene Ezra Taft Benson (1899–1994), “E le mafai ona e auauna lelei atu ia i latou e te le iloa lelei.” Sa ia fautuaina le iloaina o igoa o tagata taitoatasi o le aiga ma ia nofouta i mea taua e tutupu e pei o aso fanau, faamanuiaga, papatisoga, ma faaipoipoga. O lenei mea e saunia ai le avanoa e tusia ai se tusi po o le faia o se valaau e faamalo atu ai i se tagata o le aiga i se ausiga taua po o ni mea na faataunuina.<sup>5</sup>

O mataupu faavae o le auauaga ua faamoemoeina e fesoasoani ia i tatou e aoao e fetausia'i ai le tasi ma le isi—ae aua ne'i faasoaina atu o se savali. A o tatou iloaina i latou tatou te auaua atu i ai, o le a uunaia i tatou e le Agaga Paia ia iloa po o le a le savali latou te ono manaomiaina e faaopoopo atu i la tatou tausiga ma le agaalofa.



### Fesootai atu ma le alofa.

O le fausiaina o fegalegaleaiga anoa e manaomia ai le alu i tua atu o mea e le loloto. O fegalegaleaiga papau e tumu i talanoaga laiti e uiga i fataulagaga, o le tau, ma isi mataupu itiiti, ae e le o aofia ai le fefaaosoai o lagona, talitonuga, sini, ma popolega e manaomia ina ia anoa atili ai ia fesootaiga. Ua mamanuina e le Tama Faalelagi lenei ituaiga o fesootaiga sili ona anoa e ala i le faasoaina mai o Ona lagona ma fuafuaga ma Lona Alo (tagai Ioane 5:20) faapea ma i tatou e ala i Ana perofeta (tagai Amosa 3:7). O le fefaaosoai o mea e tutupu i lea aso ma lea aso ma luitau o le olaga ma le tasi ma le isi e pei ona taialaina

e le Agaga, tatou te maua ai le talisapaiaga mo le tasi ma le isi ao tatou mauaina mea talitutusa e fafia i ai ma aafiaga e fefaaosoai.

O le faalogo o se vaega taua lea o le fesootaiga faapea e te alofa.<sup>8</sup> Pe a e faalogo ma le totoa, o le a faateleina lou avanoa e fesoasoani atu ai i isi ia o mai ia Keriso ao e maua le malamalamama ma le malamalamamaaga i o latou manaoga ma ao latou lagonaina le alofagia, malamalamama, ma le saogalemu.

la talisapaia ese-esega faapea foi ma mea e tutusa ai.

"[O] nisi e talitonu e faapea, e manao le Ekalesia ia faia tagata uma [o le Ekalesia] ia tutusa—e tatau ona foliga, lagona, mafaufau, ma amio tagata uma ia pei o isi tagata uma," na saunoa ai Elder Uchtdorf. "O lenei mea o le a feteenai ma le poto o le Atua, o lē na foafoaina tagata uma ia ese mai lona uso, atalii uma ia ese mai lona tamā. . . .

"E manua le Ekalesia pe a tatou faaogaina lenei eseesege e faamalosiai ai e le tasi le isi ia atinae ma faaaoga o tatou taleni e siitia ma faamalosia ai o tatou uso a soo."<sup>9</sup>

O le alofa atu i isi e pei o le ala o loo alofa mai ai le Atua ia i tatou e manaomia ai lo tatou taumafai ia vaai atu i isi i le ala o silasila atu ai le Atua ia i latou. Na aoao mai Peresitene Thomas S. Monson (1927–2018), "E tatau ona tatou atiina ae le malosiaga e vaai atu ai i [isi], e le o tagata o loo latou i ai i le taimi nei ae o tagata e mafai ona avea ai i latou."<sup>10</sup> E mafai ona tatou tatalo atu mo le fesoasoani ia vaai atu ai i isi i le ala o silasila mai ai le Atua. Ao tatou taulimaina isi i lo latou gafatia mo le tuputupu ae, atonu o le a mafai ona latou tulai ae i le tulaga.<sup>11</sup>

## Auauna atu ia i latou.

Ia nofouta i manaoga a i latou e te auauna atu i ai ma ia naunau e tuu atu lou taimi ma taleni, pe o i taimi o manaoga pe ona e te alofa. E mafai ona e i ai iina e tuu atu le faafanafana, lagolago, ma le fesoasoani e manaomia pe a i ai se faalavelave faafuasei, ma'i, po o se tulaga faanatinati.

AE i le tele naua o fegalegaleaiga tatou te tali vave atu lava i ai. Ua tuu mai e le Atua ia i tatou le faitalia ina ia tatou gaoioi nai lo le faagaoioi (tagai 2 Nifae 2:14). E pei lava foi ona aoao mai le Apostolo o loane faapea tatou te alolofa i le Atua ona na muamua ona la alofa mai ia i tatou (1 Ioane 4:19), a lagona e isi le moni o lo tatou alofa e ala i a tatou galuega o le auauna atu, e mafai ona faamaluina loto ma

faateleina le alofa ma  
le faatuatuaaina.<sup>12</sup> O le  
a fatu e lenei mea se  
taamilosaga agai i luga  
o galuega agalelei lea  
e mafai ona fausia ai  
fegalegaleaiga. ■

### FAAMATALAGA

1. Sharon Eubank, i le "Humanitarian Acts Must Be Rooted in Relationship," *Sharon Eubank Says*, mormonnewsroom.org.
2. Tagai "Mataupu Faavae o le Auaunaga: Aapa Atu ma le Agaalofa," *Liahona*, Iulai 2018, 6–9.
3. Dieter F. Uchtdorf, "E Uiga i Mea e Sili Ona Taua," *Liahona*, Nov. 2010, 22.
4. Tagai Dieter F. Uchtdorf, "E Uiga i Mea e Sili Ona Taua," 22.
5. Tagai Ezra Taft Benson, "To the Home Teachers of the Church," *Ensign*, Me 1987, 50.
6. Tagai Charles A. Wilkinson and Lauren H. Grill, "Expressing Affection: A Vocabulary of Loving Messages," in *Making Connections: Readings in Relational Communication*, ed. Kathleen M. Galvin, 5th ed. (2011), 164–73.
7. Richard G. Scott, "O Faamanuiaga e Faavavau o le Faaipoipoga," *Liahona*, Me 2011, 94.
8. Tagai "Mataupu Faavae mo le Auaunaga: E Lima Mea e Fai e Tagata e Faalogo Lelei," *Liahona*, Iuni 2018, 6–9.
9. Dieter F. Uchtdorf, "O Faalagiga e Fa," *Liahona*, Me 2013, 58.
10. Thomas S. Monson, "Vaa Atu i Isi t Tagata e Mafai ona Avea ai i Latou," *Liahona*, Nov. 2012, 68, 69.
11. Tagai Terence R. Mitchell and Denise Daniels, "Motivation," in *Handbook of Psychology*, vol. 12, ed. Walter C. Borman and others (2003), 229.
12. Tagai Edward J. Lawler, Rebecca Ford, and Michael D. Large, "Unilateral Initiatives as a Conflict Resolution Strategy," *Social Psychology Quarterly*, vol. 62, no. 3 (Sept. 1999), 240–56.



## AUAUNA ATU E PEI ONA FAIA E LE FAAOLA

Na fausia e Iesu Keriso ni fegalegaleaiga anoa ma Ona soo (tagai Ioane 11:5). Na la silafia i latou (tagai Ioane 1:47–48). Na la faaaluina le taimi ma i latou (tagai Luka 24:13–31). O Ana fesootaiga na oo i tua atu o mea e le loloto (tagai Ioane 15:15). Na la talisapaia o latou ese-esega (tagai Mataio 9:10) ma iloa o latou gafatia (tagai Ioane 17:23). Na la auauna atu i tagata, e ui o la o le Alii o tagata uma, na fetalai mai na afio mai o la e auauna atu ae le o le auauna atu i ai (tagai Mareko 10:42–45).

**O le a se mea o le a e faia e fausia ai ni fegalegaleaiga malolosi ma i latou ua tofia oe e te auauna atu i ai?**



Saunia e Epikopo  
Gérald Caussé

Epikopo  
Pulefaamalumalu

# OLE FAAVAE FAALEAGAGA MO LE Ola Tutoatasi o le Ekalesia i Mea Tautupe

**S**a ou maua se avanoa talu ai nei e asiasi ai i Katedani, Ohaio. I lenei nofoaga faasolopito, lea e tele mea mataina o le Toefuataiga na tutupu ai, ua valaaulia ai ia tagata asiasi ia toe mafaufau i le faatuatua ma le talatuu a alii ma tamaitai totoa o e na faataatiaina le faavae mo lenei galuega tele i aso e gata ai. E ui o Katedani sa o se vaitaimi o le tuputupu ae ofoofogia ma le malosi o le tulaga faaleagaga, ae o le toatele o nei uluai Au Paia sa matuai matitiva lava ma ola i ni tulaga matautia. Sa latou ositaulagaina mea uma—e masani lava o faatoaga ua faamanuiaina ma galuega ua mautu—inia ia mulimuli ia Iesu Keriso ma Lana perofeta o Iosefa Samita.

Ao ou savalia nei laueelele paia, sa le mafai ona aveesea mai lou mafaufau ia ese-egea matautia lea na i ai i le va o le mativa sa i ai muamua Katedani ma le manuia ua i ai nei le Ekalesia ma ona tagata o le tele o tupulaga. Ua faamanuiaina e le Alii Lana Ekalesia ma le Au Paia o Aso e Gata Ai i se tulaga ofoofogia!

O lenei anoanoai o faamanuiaga faaletino ua fausia i luga o le folafolaga a le Atua e masani ona fofoga soo mai “o le tulaga e oo i ai la outou tausiga o a'u poloaiga o le a outou manuia i le laueelele.”<sup>1</sup>

O lenei folafolaga e taulai atu i le tala ma aoaoga o le Tusi a Mamona. E faaalia mai i ni mau eseese e 18, ma i le fitu o ona tusi e 15. E ui o le faamanuiaga o le manuia o loo ta'ua i nei mau e faaautu lava i se tulaga faaleagaga, ae e aofia ai foi le gafatia o le nuu a le Atua ia fiafia i le alualu iluma tau tamaoaiga ma ia ola tutoatasi faaletino.

O le mea na sili ona matauina, o le manuia faaletino e tupuga mai i le usiusitai faamaoni i nai mataupu faavae taiala lea na faaalia e le Alii e ala atu i Ana perofeta ma ua avea ma se vaega o le olaga i aso

*I le avea ai ma taitai o le Ekalesia, tatou te faaauau pea ona lagonaina lo tatou tiutetauave maoae o le faaaogaina o sefuluai ma taulaga paia i se tulaga e fiafia i ai le Alii.*



uma ma aga ma tu o le Au Paia o Aso e Gata Ai. O nei mataupu faavae e aofia ai le tulafono o le sefuluai, le tulafono o le anapogi, ma le manaomia o le aotauina, galuega, ma le ola tutoatasi. Ua fautuaina foi tagata o le Ekalesia ina ia ola i totonu o mea ua lava maua, aloese mai aitalafu e le manaomia, ma saunia mo le lumanai e ala i le atiinaeina o ni mea faaleoleo faaletino, e aofia ai meaai ma mea tautupe.

Ao aoao atu nei mataupu faaletino i tagata o le ekalesia, ua faatinoina foi e taitai o le Ekalesia i se tulaga tele atu mo le Ekalesia atoa. I ana aiaiga faavae tautupe ma teugatupe, ua faatinoina ai e le Ekalesia aoaoga faavae ma mataupu ia o loo aoao atu i ona tagata. O le a ou talanoa atu nei i le fa o nei mataupu faavae.

### Mataupu Faavae Muamua: O Le Tulafono o le Sefuluai

I se faaaliga na maua e Iosefa Samita i le aso 8 Iulai, 1838, na faatonuina ai e le Alii “i latou o e ua faapea ona faasefuluiaina, ia totogi atu le tasi-vaesefulu o a latou mea faaopoopo uma i tausaga taitasi.” Sa faamalamalama mai foi o lenei lava faatonuga e mo le Au Paia uma ina ia avea “ma tulafono tumau ia te i latou e faavavau.”<sup>2</sup>

O le tulafono o le sefuluai na mauaina i lena aso e avea o se poloaiga mai le Alii ma le toefaatalagaina o se tulafono paia lea na faamamaluina e le fanauga a Isarelu i taimi ua mavae. Sa avea ma se faatusa o le feagaiga na osia e le Alii ma Lona nuu—afai latou te tumau faamaoni i ai, o le a Ia faamanuiaina i latou i le faaleagaga ma le faaletino. I lenei vaitaimi, o loo faaaauau pea ona avea le tulafono o le sefuluai ma se faatinoga taua mo le Au Paia o Aso e Gata Ai, po o fea lava o latou nonofo ai, o latou tulaga faaagafesootai, po o tulaga faalemanuia faaletino. O se faavae foi o le tulaga mautu tautupe o le Ekalesia.

Talu mai lo'u valaauga i le Au Epikopo Pulefaamalumalu, e le'i muta lava le faagaeetiaina o a'u i le faatuatua ma le tuuto o tagata o le Ekalesia ao latou ola ai i lenei tulafono. A unoa ma le sefuluai, o le a le mafai e le Ekalesia ona faataunuina ana misiona paia. I se saunoaga o le konafesi aoao faasolopito, na tautino mai ai e Peresitene Gordon B. Hinckley (1910–2008): “Ou te matuai faafetai lava mo le tulafono o le sefuluai. Ia te a'u o se vavega o loo tupu pea. Ua tupu ona o le faatuatua o tagata. O le fuafuga a le Alii mo le faatupeina o le galuega o Lona malo.”<sup>3</sup>

I lena lava aso i le 1838, sa maua ai e Iosefa se isi faaaliga lea na faamalamalama atu ai e le Alii le ala e tatau ai



*O tagata o le ekalesia o loo nonofo latalata i faatoaga e anaina e le Ekalesia ua maua le avanoa e volenitia ai e piki ia fualaaauaina suamalie ma fualaaauaina faisua. O fua mai faatoaga a le Ekalesia e sapalaiina ia fale gaosi apa ma faleteuoloa a epikopo e fesoasoani ai i tagata o le ekalesia e le tagolima.*

ona faamaonia ma faatautaia ai le faaaogaina o le sefuluai. Sa Ia fetalai mai, “ia taulimaina ia mea e se aufono, e aofia ai le Au Peresitene Sili o la'u Ekalesia, ma le epikopo ma lana aufono, ma la'u aufono maualuga; ma i lo'u lava leo ia te i latou, ua fetalai mai ai le Alii.”<sup>4</sup> O le “epikopo ma lana aufono” ma “la'u aufono maualuga” o loo faatatau i ai le mau i lenei faaaliga, ua lauiloa i aso nei o le Au Epikopo Pulefaamalumalu ma le Korama a Aposetolo e Toasefululua.

I lo tatou vaitaimi, o loo faaaauau pea ona faatinoina ma le sa'o nei faatonuga o loo i ai i le vaega 120 o le Mataupu Faavae ma Feagaiga. O Aso Faraile muamua uma o Tesema, e fono faatasi ai le Au Peresitene Sili, Korama a Aposetolo e Toasefululua, ma le Au Epikopo Pulefaamalumalu e iloilo ma faamaonia le vaevaega o tupe paia mai sefuluai ma taulaga ua fuafuaina mo le tausaga a sau. O le faia o sea ituaiga fonotaga ua faamautinoa ai, ua faia faaiuga i le agaga o le fefautuaai faatasi, faaaliga, ma le lotogatasi.

I le avea ai ma taitai o le Ekalesia, e faaaauau pea ona tatou lagonaina la tatou tiutetauvave sili e faaaoga sefuluai ma taulaga paia i se tulaga e talafeagai ma e fiafia i ai le Alii. E pei ona matuai lelei ona faaalia mai e Elder David A.

Bednar o le Korama a Aposetolo e Toasefululu, “O loo matou matua nofouta i le natura paia o tupe iti e lua a le fafine ua oti lana tane.”<sup>5</sup> Na faaopoopo mai Peresitene Hinckley:

“O tupe e maua e le Ekalesia mai tagata faamaoni o le ekalesia e paia naua. O le atotupe a le Alii. . . . O tupe ia e tatou te vaai, ua tuu mai i ai se faatuatuaina paia e taulimaina na tupe ma le matua faamaoni a’ia’i ma le faautauta tele, o ni foai paia a tagata.

“Matou te lagona so matou tiute mamafa ia te outou o e tuuina mai nei foai. Matou te lagona foi se tiute maoae tele atu i le Alii e ona nei tupe.”<sup>6</sup>

E le o i tatou o se fale tupe po o se pisinisi. O i tatou o le Ekalesia a Iesu Keriso, ma e leai se isi faamoemoega a lenei Ekalesia nai lo lena ua atofaina mai e le Alii Lava Ia—e faapitoa lava, ina ia valaaulia tagata uma ia “o mai ia Keriso, ma faaatoatoaina ia te ia,”<sup>7</sup> e ala i le “fesoasoani i tagata o le ekalesia ia ola i le talalelei a Iesu Keriso, faapotopotoina o Isaraelu e ala i le galuega faafaifeatalai, tausiga o e matativa ma e le tagolima, ma faataunuina le faaolataga o e ua maliliu e ala i le fausiaina o malumalu ma le faatinoina o sauniga sui mo i latou.”<sup>8</sup>

E ala i aiaiga faavae, ua faamaonia ai ma aveina atu ai tupe paia o le sefuluai e lagolago ai le misiona faaleagaga ma faalelotu a le Ekalesia. Ua faaluina e lagolago ai vaega tetele e ono: (1) sauniaina ma le faatumauina o nofoaga o tapuaiga mo le silia ma le 30,000 o aulotu i le lalolagi atoa; (2) faatautaaina ai polokalama tau le uelefea ma le fesoasoani alofa a le Ekalesia, e aofia ai le silia ma le 2,700

*Ia lulai 2016, sa foai atu ai e le LDS Charities ni nofoa taavalevale ma ni uila pa’u tolu e tulei i lima se 280 i Karimnagar, Initia. Talu mai le 2001, ua silia ma le 500,000 nofoa faatavalevale ua tufatufa atu i atunu e 133 e le LDS Charities.*



poloketi i le 2017; (3) saunia ai polokalama o le aotauina, e aofia ai aoga o le Ekalesia, iunivesite, ma polokalama o le seminare ma le inisitituti; (4) lagolagoina ai ia le faagaoioiga o a tatou faifeautalai i le lalolagi atoa, e aofia ai misiona e 430 ma punaoa e manaomia e pe tusa ma le 70,000 faifeautalai; (5) fausiaina ma le faagaoioia ai ma le toeitiiti atoa le 160 o malumalu i le lalolagi atoa, ma le tele o isi o le a oo mai, ma faatautaia ai se polokalama ua faalauteleina o talafaasolopito o aiga ma le teuina o faamaumauga; ma le (6) lagolagoina o le puleaina aoao o le Ekalesia.

Ou te faafetai mo le tulafono o le sefuluai. O se puna o faamanuiaga, i le faaleagaga ma le faaletino, mo le Ekalesia ma mo ona tagata taitoatas.

### Mataupu Faavae Lona Lua: Ola Tutoatasi ma ia Saoloto

O le faitalia a le tagata lava ia o se tasi o meaalofa silisili a le Atua. E taua tele mo lo tatou alualu i luma faalelalolagi ma lo tatou faaolataga e faavavau. E ala i le ola tutoatasi faaletino ma faaleagaga, e alualu ai i luma fanau a le Atua i lo latou tomai ia faia ma le saoloto ni filifiliga ma faataunu ai le faamoemoega o lo latou foafoaga.

O le mea lea, e le o se mea e ofo ai le valaaulia e le aunoa e perofeta o lo tatou tisipenisione o tagata o le Ekalesia ina ia taumafai ia ola tutoatasi. E faapitoa lava le taua o upu a Peresitene Hinckley:

“Ou te apoapoi atu ia te outou ia vaavaai i tulaga o a outou mea tautupe. Matou te uunaia outou . . . ina ia faautauta i a outou tupe faaalu; ia pulea lelei outou lava i a outou faatauga ina ia aloese ai mai le aitalafu. Ia totogi fauma aitalafu i se vave e te mafaia ai, ma ia faasaoloto outou mai saisaitiaga.

“O se vaega lenei o le faaletino o le talalelei ua tatou talitonu i ai. Tau ina faamanuia outou e le Alii . . . ia faatulaga lelei o outou aiga. Afai ua uma ona totogi a outou aitalafu, afai o i ai sau tupe o teu, e tusa lava pe itiiti, afai e pesi mai matagi i luga a’e o lou ulu, o le a i ai le malutaga mo lou [aiga] ma le toofilemu i o outou loto.”<sup>9</sup>

Na faamamafa mai foi e Peresitene Russell M. Nelson ia faamanuiaga o le ola tutoatasi ina ua saunoa mai: “O le galue ma le loto i ai ua maua ai e nisi se fiafiaga fou i le iloa o lo latou tulaga ma lo latou taua e faavavau. O le amiontonu, tutoatasi, ola faautauta, toaga, ma le faalagolago o le tagata ia te ia lava, o sini ia mo tagata taitoatas. O nei uiga uma e suia ai olaga.”<sup>10</sup>

E pei lava ona faatumauina e le atamai i le faia o paketi i le aiga le saolotoga o tagata taitoatasi o le aiga, o le pulea tatau o tupe o le ki lea i le mafai ai e le Ekalesia ona galue saoloto. Na sosoo lenei mea ma le faatonuga paia na tuuina mai e ala mai ia Iosefa Samita faapea “e ala i le tausiga alofa [a le Alii], . . . [o le a] tu lē faalagolago le ekalesia i luga o isi tagata uma i lalo o le lalolagi selesitila.”<sup>11</sup>

O lenei tausiga alofa e faapitoa lava le faamaoniga i o tatou taimi. Tatou te olioli i le mea moni faapea ua ausia e le Ekalesia le tutoatasi atoa i mea tautupe ma ua mafai ona faataunuu ana misiona e aunoa ma soo se ituaiga o aitalafu. E pei ona saunoa i ai Peresitene Hinckley: “Afai e le mafai ona tatou galulue faatasi, o le a tuuitiitia a tatou polokalama [ina ia sefe ai tupe]. . . . O le a tatou le aitalafu lava.”<sup>12</sup>


O aiaiga faavae o le puleaina o tupe ua fuafuaina e taitai o le Ekalesia ma ua faaaogaina ma le faaeteete i le fausiaina o le paketi faaletausaga ma le vaevaeina o tupe faaalu. O nei aiaiga faavae e aofia ai ni mataupu faavae faigofie ma manino se lua:

- Muamua, o le aofaiga atoa o tupe faaalu e le silia ma tupe maua na muai fuafuaina.
- Lua, o le paketi mo le faagaoioiga o tupe faaalu o le a le faateleina mai lea tausaga i lea tausaga i le televave e sili atu nai lo le tuputupu ae ua faamoemoeina i foai o le sefuluai.

### Mataupu Faavae e Tolu: Ola Faautatua Lelei

Ua malamalamaga tagata o le ekalesia i le mea moni faapea ua latou ola i se vaitau o mala, na afua mai i faatinoga faaletagata ma mala faalenatura. Ua manino ia valoaga e uiga i aso mulimuli, ma e tele naua le atamai i le sauniuni mo le lumana—pe e mo se oge e ono tulai mai, mala, faalavelave tautupe, po o soo se isi lava tulaga faigata e lei mafaufaufina. Ua fautuaina soo e taitai o le Ekalesia ia tagata o le ekalesia e faatino le ola faautauta lelei e ala i le teuina o meaai mo le aiga, e aofia ai vai faaleoleo, mea taumafa masani, vailaau faafomai, lavalava, ma isi sapalai e ono manaomia i tulaga o faalavelave faafuasei. Ua fautuaina foi tagata ina ia “faasolosolo malie ona teu se tupe faaleoleo e ala i le teuina e le aunoa o se vaega o a latou tupe maua.”<sup>13</sup>

O lenei lava mataupu faavae o le sauniuni faaletino ua faaaogaina foi i le tulaga aoao o le Ekalesia. Mo se faataitaga, o fale e teuina ai le sana ma faleteuoloa ua faatumulia



*Ua maua e tagata o le ekalesia se fesoasoani i le faasaoina o ata o aiga i lo latou nofoaga autu o talafaasolopito mo aiga i le lotoifale. Ua fesoasoani foai o le sefuluai e faatupe ai a le Ekalesia mo talafaasolopito o aiga i le lalolagi atoa.*

i mea manaomia autu mo faalavelave faafuasei ua uma ona faatuina i Amerika i Matu atoa. Ua mulimultaia tonu foi e le Ekalesia le faatinoga o le tuuese o se vaega o ona punaoa i tausaga taitasi e sauniuni ai mo soo se mea manaomia e tulai mai i le lumana.

O tupe ua tuuese e faaopoopo i le teugatupe faaleoleo a le Ekalesia. Ua teuina faaagaga i oloa ma tupeteu; o le tele lava e fafia i pisinisi e totogi ai lafoga (o nisi e oo atu i le talafaasolopito o Iuta i le amataga o le Ekalesia); o pisinisi, falegaosi oloa, ma fale nofomau; ma mea e fafia i ai tau faatoaga. O tupe faaleoleo a le Ekalesia ua pulea e se vaega o tagata faigaluega atamamai ma faufautua i fafo atu. E eseese ia tulaga lamatia, e ogatusa ma mataupu faavae mo tausimea atamamai ma faautauta ma le puleaina o teugatupe o nei onapo.

I le faataoto o taleni, o le matai lea na talosagaina se lipoti mai ana auauna sa aoiaina le tasi lea na te lei galueaina le tupe na tuuina atu ia te ia ae nai lo lena sa ia nanaina lena tupe i le eleele. Sa ia faamatalaina le auauna o se

[tagata] “leaga ma paie”<sup>14</sup> mo le le galueaina o lena tupe mo le toe maua ai o nisi tupe. O le ogatusa ai ma lenei mataupu faavae faaleagaga, e le o tuuina ia tupe faaleoleo a le Ekalesia i ni teugatupe e le o faagaoioia ae o loo faagalue i mea e mafai ona toe maua mai ai se tupe faasili.

O nei tupe galue e mafai ona faaaoga i taimi faigata ina ia faamautinoa ai le faaauau ai pea ma le le faalavelavea o le galuega o misiona, polokalama, ma le faagaoioiga o le Ekalesia ma ia taulimaina manaoga tautupe mo faalavelave faafuasei. Ua manaomia foi tupe ina ia tuuina atu ai punaoa tautupe faaopoopo e lagolago ai le misiona a le Ekalesia ia saunia mo le Afio Faalua mai o le Alii. O le a latou fesoasoani e lagolago le tuputupu ae o le Ekalesia ao faataunuina ia valoaga faapea o le a aoao atu le talalelei a Iesu Keriso ma faatuina le Ekalesia i atunuuma o le lalolagi. Matou te faamoemoe o le a faataunuina se vaega tele o lenei tuputupu ae i atunuua tau atiae ma toatele o le lalolagi. O le a manaomia pea tulaga o le faateleina o mea tautupe e saunia ai le fiaafe o faletapuai, malumalu faaopoopo, ma isi punaoa taua e faamanuia ai olaga o tagata i soo se nofoaga o latou i ai. I se faapuupuuga, e leai lava se isi mafuaaga ua ala ai ona i ai nei tupe nai lo le lagolagoina o le misiona paia ua atofaina a le Ekalesia.

### Mataupu Faavae e Fa: I Le Ala Lava a le Alii

Sa lapataia e Paulo le Au Paia i Korinito ina ia “le i ai lo [latou] faatuatua i le poto o tagata, a o le mana o le Atua.”<sup>15</sup> Sa oo ina ou malamalamama lelei atili i le taua o lenei mataupu faavae ina ua valaauna a’u e auauna atu i le Au Epikopo Pulefaamalumalum o le Ekalesia.

I le avea ai ma se Au Epikopo, sa matou fefautuawai faatasi e suesue ai i faafitauli, faaaoga o matou talaaga faaletagata lava ia, poto masani, ma vaega e atamamai ai. Ae o le iuga lava, o a matou faaiuga e faia i le agaga o le tatalo ma le saili e le aunoa o faaaliga e faatatau i le finalo o le Alii. Ao matou mafaufau i mea e pei o faailo o le tamaoaiga lautele ma sailiiliga o mea tautupe, o la matou sini tupito lava o le faataunu o o matou tiutetauave i se tulaga o le a faataunu ai ia mamanu a le Alii ma le misiona paia a le Ekalesia o le valaaulia o tagata uma ia o mai ia Keriso. O lenei sini e na o musumusuga ma le mana o Lana perisitua e mafai ona ausia ai ma faatinoina ai. O le mauaina o le faatonuga ia faia mea i le ala lava a le Alii, o lenei valaauga ua faatumulua ai a’u i le lotomaualalo i aso taitasi.

### Faaiuga

O nisi tagata e faamatalaina i lea taimi ma lea taimi le Ekalesia i lenei vaitaimi o se faalapotopotoga malosi ma faamanuiaina. Atonu e moni lenei mea, ae o le malosi o le Ekalesia e le mafai ona fuaina i le na o se fuainumera po o le matagofie o ona fale pe e ala i ana meatotino tautupe ma fanua. E pei ona saunoa Peresitene Hinckley i se tasi taimi, “Pe a uma ona tautalagia ma faia mea uma, na o le pau lava le tamaoaiga moni o le Ekalesia e i ai lea i le faatuatua o ona tagata.”<sup>16</sup> O le ki o le malamalamama i le Ekalesia “o le vaai i ai e le o se kamupani i le lalolagi atoa, ae o se faitau miliona o tagata faamaoni i le fiaafe o aulotu i le salafa o le lalolagi o loo mulimuli ia Keriso ma fetausiai i le tasi ma le isi ma o latou tuuao.”<sup>17</sup>

I se isi faaupuga, o le Ekalesia o mea uma lava e mo tagata. E faatatau lava i tagata taitoatasi o e ua noatia faatasi e ala i talitonuga ma feagaiga lautasi. O ona malosiaga ma lona lumanai. Ou te matuai faafetai mo faaaliga na tuuina mai e le Alii i le vaitaimi o le popofou o le Toefuataiga e faatatau i le tulafono o le sefuluai, ola tutoatasi ma le saoloto, ola faautauta lelei, ma le foai atu mo le Au Paia i le ala lava a le Alii. Ou te molimau atu o nei mataupu faavae o se puna o faamanuia maoae faaleagaga ma faaletino mo tagata o le Ekalesia, o latou aiga, ma le Ekalesia atoa. O nei mataupu faavae o le a faaauau pea e taialaina ai o tatou laasaga ma lagolago ai le misiona a le Ekalesia seia oo i le toe afio mai o le Faaola. ■

*Siina mai i se saunoaga na tuuina atu i se Fonotaga mo Talafaasolopito o le Ekalesia 2018, “Financing Faith: The Intersection of Business and Religion,” i le Iunivesite o Polika Iaga i le aso 2 Mati, 2018.*


### FAAMATALAGA

1. Tagai, mo se faataitaiga, 2 Nifae 1:20.
2. Mataupu Faavae ma Feagaiga 119:4.
3. Gordon B. Hinckley, “O Misiona, Malumalu, ma le Taitaiga,” *Liahona*, Ian. 1996, 62.
4. Mataupu Faavae ma Feagaiga 120:1.
5. David A. Bednar, “O Pupuni o le Lagi, *Liahona*, Nov. 2013, 20.
6. Gordon B. Hinckley, “O Le Au Paia o Aso e Gata Ai i Ana Aga,” *Liahona*, Ian. 1998, 101.
7. Moronae 10:32.
8. *Tusitalima 2: Taitatina o le Ekalesia* (2010), 2.2.
9. Gordon B. Hinckley, “Mo Tama Talavou ma Tamā,” *Liahona*, Ian. 1999, 65.
10. Russell M. Nelson, “I Le Ala a le Alii Lava Ia,” *Liahona*, Iulai 1986, 24.
11. Mataupu Faavae ma Feagaiga 78:14.
12. Gordon B. Hinckley, “Mo Tama Talavou ma Tamā,” 65.
13. *Tusitalima 2*, 6.1.1.
14. Tagai Mataio 25:14–30.
15. 1 Korinito 2:5.
16. Gordon B. Hinckley, “O Le Tulaga ua I Ai Le Ekalesia,” *Liahona*, Iulai 1991, 63.
17. “The Church and Its Financial Independence,” July 12, 2012, [mormonnewsroom.org](http://mormonnewsroom.org).

# TAUMAFAI E AVEA O SE TINA ATAMAI MA TAMALII

Saunia e Lilian Pagaduan-Villamor

*Sa ou taumafai e saili le faamoemoega o le tulaga faatina. Ae o se tusiga mai se nusipepa tuai na suia ai lou manatu.*



**N**a ou manao lava pea e avea ma se tagata auai sili i mea tau saeanisi. I le taimi o ou suesue i lou faailoga muamua i le Iunivesete a Polika Iaga i Hawaii, sa muai faailoa mai e Dr. Douglas Oba, o se polofesa fesoasoani tele ma aoaoina au i le lalolagi o suesuega o meaola ma mea faatekonolosi. Sa ou maua foi se avanoa e galue ai i le ofisa e fai ai suesuega i le Iunivesete o Polika Iaga i Provo, Iuta, Amerika, mo se galuega faataitai i le tau mafanafana.

Ina ua ou foi i lou aiga i Filipaina, sa ou maua se galuega i le Ofisa e Suesue ai le DNA i le Iunivesete o Filipaina. O le faatumutumuga o lau galuega e aofia ai le galue i nisi o poloketi mo le lotoifale, auai i aoaoga ma konefesi, ma le mataitina e faalapotopotoga o le lotoifale ma le lalolagi o au pepa faa saeanisi na faasalalauina. Na amata ai foi lau polokalama mo se faailoga maualulu. Sa ou lagona lou faamalieina i lau galuega fou.

I le mavae ai o le lua tausaga o galue, sa ou faaipoipo ai i le malumalu ma lau uo na ma tutupu ae o laiti. Ina ua mavae sina taimi, sa maua

ai le ma pepe muamua ma mo se taimi muamua lava lea ua ou le mautonu ai. Sa ou le iloa ona faapaleni le tausiga mo le pepe, faaluina o le taimi ma lou toalua, galueaina o vasega i lau polokalama, fetuunaiga o poloketi ma pepa i le galuega, ma le faataunuina o valaauga i le Eklesia. Sa ou talanoa ma lou toalua e uiga i ou le mautonu, ma sa ia fautua mai ma le faaeteete ina ia ou mafaufau e aluese mai lau galuega. Sa ou iloa le poto o lana fautuaga, ae sa ou le i saunia e faamatuu ese lou olaga faapolofesa i lea taimi.


Ina ua ou maitaga i la ma tamaitiiti lona lua, sa fai ou muai gaoioiga ae le i fanau le pepe e manaomia ai i lou malolo i le moega. Sa ou iloa mulimuli ane ai e le mafai ona ou faia o mea uma i le taimi e tasi. Na ou iloa le alagatatau ona ou faia se filifiliga e silisili mo au ma lou aiga. Ina ua tuanai ona mafaufau loloto ma tatalo, sa ou filifili ai e tuua lau galuega faasaeani ma tuuina atu lou taimi atoa mo lau fanau.

Sa ou fuafua mo lou tiute faatina i lou olaga atoa, ae sa ou le iloa lava le tele o le ositaulaga o le a oo mai i lenei filifiliga. Sa ou taumafai i le mea

e sili e tausia le uiga faaalia lelei, ae sa ou lagona pea le faanoanoa ina ua faaselemutu lau galuega ma lau polokalama mo se faailoga maualuga. Sa ou tatalo i le Tama Faalelagi mo le malosiaga faaleagaga e faataunuina ai lou tiute o se tina ma le agaga atoa. Na faalogo ma le onosai lou toalua i au faitioga. Na ia faamalosiau mai ina ia ou tusia ou manatu ma lagona i lau tusi talaaga, sa le mafai ona ou tusia mo se taimi ona o le pisi o lau faatulaga o mea e fai.

I se tasi aso, a o momoe lau fanau, sa ou manatu e vavaai i au tusi talaaga tuai. A o ou toe iloilo iai, sa faateia au i lou tusitusia pea lava pea lou naunau sili ina ia fai ma tina a o ou talavou ma talavou matua. O se tasi o tusiga faapitoa na ootia ai au: "O le a ou taumafai e alualu i luma i aoaoga o le poto ma aoaoga faaleagaga ina ia avea ai au ma se tina atamai ma le tamalii i lau fanau."

O lena faapupulaga o se mea sa sili ona ou manaomia! Sa ou lagonaina le Agaga ua molimau mai ia te au e faapea ua ou faia le filifiliga sao mo lou aiga. Sa ou iloa ai o lau aoaoga ma aafiaga o lau galuega ua le na o se



faamanuiaga mo au ae mo lau fanau. O se toe faafouina o lau molimau ma le malamalama e faavavau o le tulaga faatina.

Sa avea au ma tina nofale mo le lima tausaga. Mulimuli ane, sa ou faamaeaina ai lau polokalama mo lou faailoga maualuga ma toe foi atu e galue ina ua tau matutua teisi ae la ma fanau. O lo o ou aoao pea

e faapaleni ou taimi utiuti e faataunuina ai ou tiute i le galuega, aiga, ma le lotu, ae ou te iloa e fetau uma lava ona o le fesoasoani mai o le Alii. Ua faaauau pea ona ou maua aafiaga taua i le “ofisa o suesuega o le soifua” ma maua le fiafia ma le faamoe-moega i le tulaga faatina. ■

*E alala le tusitala i Metro Manila,  
Filipaina.*




## FILIFILIGA MUSUIA

“O le taimi e te iloa ai le finagalo o le Alii, ona mafai ai lea ona e agai atu i luma i le faatuatua e faamalie o outou faamoemoega taitoatas. O se tasi o tuafafine e ono musuia e faaauau pea lana aoga ma auai i le aoaoga faafomai, ina ia mafai ai ona iai lona aafiaga taua i ana tagata mamai ma faaalualu i luma suesuega i mea tau gasegase. Mo seisi tuafafine, o le musumusuga atonu e taitaiina ai o ia e faamatuu atu se sikolasipi i se aoga maoae ae amata vave loa se aiga ua le tusa ai ma le masani i lenei augatupulaga, ina ia maua ai sona aafiaga taua ma le faavavau i ana fanau i le taimi nei.

“Pe mafai e ni tamaitai se toalua e tali tutusa i lo la faatuatua ona maua ni tali eseese lava i se fesili masani e tasi? Ioe! O le mea e sa’o mo le tasi tamaitai atonu e le sa’o mo le isi tamaitai. O le ala lea e taua tele ona le tatau ona tatou fesiligia filifiliga a tagata taitasi po o le musumusuga e mafua ai.”

**Peresitene M. Russell Ballard, Sui Peresitene o le Korama a Aposetolo e Toasefululua, “Women of Dedication, Faith, Determination, and Action” (Brigham Young University Women’s Conference address, May 1, 2015), 4, [womensconference.byu.edu](http://womensconference.byu.edu).**





Saunia e Elder Dale G.  
Renlund ma Sister  
Ruth L. Renlund

O Elder Renlund o se sui o  
le Korama a Apostolo e  
Toasefululua

# O Le Meaalofa Matagofie o le Faamanatuga

*Tatalo o le a faafouina oe a o e taumafa i le  
faamanatuga ma manatua le Faaola.*

**I**a Aperila o le 2017, sa ma maua ai se avanoa e fesoasoani ai i le fale tatala o le Malumalu i Paris Farani a o le i faapaiaaina i le aso 21 o Me, 2017. I le lotoa o le malumalu o iai se faatagata o le *Christus* matagofie. O se kopi o le muai galuega faapitoa i le 1838 na saunia e le vane faatagata o Danish Bertel Thorvaldsen. Na avea le faatagata ma taulaiga i le faatoaga ma faailoa atu ai ia i latou uma e o mai lo tatou faatuatuaga ia Iesu Keriso. O le mamalu, fua, ma le faatulagaga e matagofie. E tosina mai tagata maimoa i lenei faatusa o le Alii toetu ma mananao pea lava pea e tutu iina ma pue ai a latou ata.

O le faatagata e masani lava ona taua o le *Christus Consolator*. O se tagata lea e faamafanafana.<sup>1</sup> O le uiga o le faamafanafana o le faatoofilemu lea o se tasi i se taimi o le loto nutimomoia po o le faanoanoa, tuuina atu o le lagolago, tigaalofa, alofa mutimutivale, po o le faaali atu o le agalelei mo se tasi.<sup>2</sup> Mo i tatou, o le *Christus* e faaalia mai ai nei uiga paia o le Faaola.

O le uluai *Christus Consolator* o lo o faatuina i *Vor Frue Kirke*, o le Church of Our Lady, i Copenhagen, Tenimaka. A o faataamilomilo e faatagata o Apostolo e Toasefululua, o le *Christus* o lo o i totonus o se vaega kolumu o le potu. I luga ae ma lalo ifo o le faatagata o lo o iai tusiga vane o mau lauiloa mai le Tusi Paia.



**Christus Consolator i le Church of Our Lady, i Copenhagen, Tenimaka.**

Ua tusi vane i luga ae, i le laupapa i luga o kolumu e lua, o lo o iai upu nei i le gagana Danish: "DENNE ER MIN SØN DEN ELSKELIGE HØRER HAM." I le Faa Peretania: "O lou Atalii pele lenei: ina faalogo ia outou ia te ia."

O nei upu na fofogaina e le Atua, lo tatou Tama Faalelagi, a o liua Iesu i luga o le mauga i luma o Peteru, Iakopo, ma Ioane. O le mau atoa o lo o faapea mai, "Ma ua oo mai foi le ao ua uftia ai i latou: ona tulei mai lea o le siufofoga mai le ao, ua faapea mai, O lou atalii pele lena: ina faalogo ia outou ia te ia" (Mareko 9:7).

I luga o le tulaga o lo o tu ai le *Christus Consolator* o lo o iai upu nei i le gagana Danish: "KOMMER TIL MIG." I le Faa Peretania: "O mai ia te a'u." I upu uma lava ua fofogaina mai e le Faaola, e leai se mea e sili atu ona faatauanau ma taua mo i tatou nai lo le "o mai ia te au."

O le atoaga o le mau e faapea, "Ia outou o mai ia te au, o outou uma o e tigaina ma mafatia i avega, o a'u foi e malolo ai outou" (Mataio 11:28).

I lenei muai faatagata o le *Christus Consolator*, ua ia i tatou le valaaulia mai le Tama ina ia faalogo i Lona Alo Pele

e Toatasina ma le valaaulia a le Alo ina ia o mai ia te Ia. I se faatasiga atoatoa, ua Laua valaaulia tagata uma ina ia faalogo ma ia o mai.

O lo tatou ala lenei e toe foi atu ai i lo tatou aiga faalelagi. "Matou te talitonu e ala i le Togiola a Keriso, e mafai ai ona faaolaina tagata uma, e ala i le usiusitai i tulafono ma sauniga o le Talalelei" (Mataupu Faavae o le Faatuitua 1:3). Pau lava le mea e mafai ai e tagata taitasi ona o mai atoatoa ia Iesu Keriso o le taliaina lea o le talalelei toefuataiina. Tatou "te talia le talalelei toefuataiina e ala i le faatuatua ia Iesu Keriso ma Lana Togiola, salamo, papatisoga, mauaina o le meaalofa o le Agaga Paia, ma tumau e oo i le iuga."<sup>3</sup>

### **O Le Mataupu Faavae a Keriso**

O le feau tuufaatasina lenei a le Tama ma le Alo. Ua laua finagalo i fanau uma a le Tama Faalelagi e mulimuli i le mataupu faavae a Keriso. O lenei, ina ia leai se nunumi, o le fasi fuaitau "o le mataupu Faavae a Keriso" o lona uiga e tutusa ma le talalelei a Keriso.

	<i>2 Nifae 31</i>	<i>3 Nifae 9</i>	<i>3 Nifae 11</i>	<i>3 Nifae 27</i>	<i>Aofaiga</i>
<b>Faatuatua</b>	<b>1</b>	<b>2</b>	<b>4</b>	<b>1</b>	<b>8</b>
<b>Salamo</b>	<b>5</b>	<b>4</b>	<b>4</b>	<b>3</b>	<b>16</b>
<b>Papatisoga</b>	<b>10</b>	<b>0</b>	<b>13</b>	<b>3</b>	<b>26</b>
<b>Agaga Paia</b>	<b>8</b>	<b>2</b>	<b>6</b>	<b>1</b>	<b>17</b>
<b>Tumau</b>	<b>3</b>	<b>0</b>	<b>0</b>	<b>3</b>	<b>6</b>
<b>Tama</b>	<b>14</b>	<b>5</b>	<b>20</b>	<b>25</b>	<b>64</b>

Ina ia faamamafa le tuufaatasiga o le Tama ma le Alo i la Lava savali e tusa ai ma le mataupu faavae a Keriso, sei o tatou tagai i lenei siata.

Matou te iloa o mataupu o lo o taua iinei (2 Nifae 31; 3 Nifae 9; 3 Nifae 11; ma le 3 Nifae 27) o lo o iai le mataupu Faavae a Keriso. O nei mataupu ua taua ai pea lava pea le faatuatua, salamo, papatisoga, o le Agaga Paia, ma le tumau seia oo i le iuga. O le aofai o taimi o lo o taua ai mea taitasi ua faiatua. E pei ona e silasila iai, e 8 taimi na taua ai le faatuatua; salamo, e 16 taimi; papatisoga, e 26 taimi; o le Agaga Paia, e 17 taimi; ma le tumau seia oo i le iuga, e 6 taimi.

O se mea foi e ono ofo ai, e faapea ua tatou iloa foi o le Tama e taua i le tele o taimi i nei mataupu. O le mea moni, e 64 taimi na taua faapitoa ai o Ia, e sili atu i le tele o taimi na taua ai le papatisoga.<sup>4</sup> E mai lenei, tatou te iloa ai o le mataupu faavae a Keriso o le mataupu faavae a le Tama ma le Alo.

Sei o tatou vaavaai totoa lava i ni mea se lua o lo o taua ai le Tama:

“Ma ua fetalai mai le Tama: Ia outou salamo, ia outou salamo, ma papatisoina i le suafa o lou Atalii Pele.

“Ma o lenei foi, sa oo mai le siufogoa o le Alo ia te au, ua fetalai mai: O ia o le e papatiso i lou igoa, o ia lea o le a tuu atu i ai e le Tama le Agaga Paia, e pei ona faia ia te au; o le mea lea, ia mulimuli mai ia te au, ma fai mea ua outou vaai ua Ou faia. . . .

“Ma o au [Nifae] sa faalogo i se siufogoa mai le Tama, ua fetalai mai: Ioe, ua tonu ma faamaoni upu a lau Pele. O ia o le tumau e oo i le iuga, o ia lava lea o le a faaolaina” (2 Nifae 31:11–12, 15).

O le Tama, le Alo, ma le Agaga Paia e molimau e faapea ua na o le pau lava lenei o le ala.

I le toe faapea atu o upu mai ia Mataio, ua tau mai e le Tama ma le Alo ia tatou o mai ia Keriso ma ave Lona satauro i o tatou luga aua o avega tatou te amoina e mafai ona faamamaina ma e tatou te maua le malolo. Tatou te tauave uma avega. Atonu ua tatou tauaveina le agasala, faanoanoa, vaisu, mai, nofosalu, po o le maasiasi. I nei faigata, o le vaai atu ia Keriso e aumai ai le faamalologa ma le faamoemoe ma le faamafanafanaga.

O le mataupu faavae a Keriso—faatuatua, salamo, papatisoga, ma le meaalofa o le Agaga Paia—e le faamoemoe o se aafiaga mo na o se taimi e tasi. Ua aoao mai i tatou e lo tatou talitonuga tatou te mafai ona atoatoa e ala i le faia pea lava pea o le “faalagolago atoa i luga” o le mataupu faavae ma le tauaogaina o Keriso (2 Nifae 31:19). O lona uiga tatou te faia pea lava pea laasaga i le mataupu faavae a Keriso i o tatou olaga. O laa taitasi e atiae mai le laa o muamua atu, ma o le faatulagaga ua faamoemoe ina ia maua ai se aafiaga faifaipea.

A o tatou galueaina le faatuatua, o le a ola malosi lava. A o tatou saili pea ina ia salamo, o le a faaleleia i tatou. Tatou te mafai, ia tatou lava taumafaiga, ona alualu i luma mai le maua pea o aafiaga ma le Agaga Paia ma le avea o Ia o se soa tumau. I le ma lea, a o tatou ola ai i lenei soifuaga, tatou te aoao mai uiga mama o Iesu Keriso ma atinae ia



lava uiga.<sup>5</sup> A o tatou avea pea lava pea e faapei o Ia, ua liua o tatou loto ma mafai ai ona tatou tutumau seia oo i le iuga (tagai, mo se faataitaiga, 2 Nifae 31:2–21; 3 Nifae 11:23–31; 27:13–21; Moroni 4:3; 5:2; 6:6; MF&F 20:77, 79; 59:8–9).

E faigofie ona iloa le ala e mafai ai e tulaga uma i le mataupu faavae a Keriso ona fai pea lava pea ma atinaeina ai i le olaga atoa. Ae faapefea le papatisoga? O i tatou, mulimuli ane, ua papatisoina mo i tatou lava i le na o le faatasi.

### O le Faamanatuga o le Talisuaga a le Alii

Ina ia tali i lenei fesili, e ao ona tatou manatu i se tusiga maoae o aoaoga faalelotu na tusia e Elder James E. Talmage (1862–1933) o le Korama a Apostolo e Toasesfuluia e faaulatalaina *O Mataupu Faavae o le Faatuatua*. Sa muai faasalalauina lenei tusiga i le 1899 ma talia ai fesili e uiga i le Ekalesia ma ona aoaoga faavae mo augatupulaga o mulimuli mai o e sa faitau ma sailiili iai.

I le anotusi, ua tatou iloa ai o mataupu taitasi, e ese mai le faatomuaga, e fesootai ma se tasi o mataupu faavae o le faatuatua e sefulutolu.<sup>6</sup> O nisi o mataupu faavae o le faatuatua o lo o aofia ai i le sili ae i le tasi le mataupu, ae o mataupu taitasi e fesootai ma le tasi o mataupu faavae o le faatuatua.

O le mea e malie ai, o le mataupu 9 e faaulatalaina “O Le Faamanatuga o le Talisuaga a le Alii,” o lo o iai i le

mataupu lava o lo o mulimuli mai e faatatau i le Agaga Paia.<sup>7</sup> Ua faafesootai e Elder Talmage lenei ma le mataupu faavae o le faatuatua numera fa.

I le amataga o le mataupu 9, na tusia e Elder Talmage, “I le taualumaga o la tatou suesuega o mataupu faavae ma sauniga o le Talalelei, e pei ona faailoa mai i le Mataupu Faavae lona fa o le Faatuatua, o le mataupu o le Faamanatuga o le Talisuaga a le Alii ua alagatatau ma mautinoa ai, o le tausia o lenei sauniga e manaomia e tagata uma ua avea ma tagata o le Ekalesia a Keriso e ala i le usitaia o tulaga moomia o le faatuatua, salamo, ma le papatisoga i le vai ma le Agaga Paia.”<sup>8</sup>

I le iai o na upu i le mafaufau, ua tatou iloa ai le mafuaga na faafesootaia ai e Elder Talmage le faamanatuga ma le mataupu faavae lona fa o le faatuatua. O le faamanatuga o le isi sauniga lea e manaomia e tagata taitoatasi pe a maea ona faamauina o se tagata o le Ekalesia.

O le faamanatuga o le isi sauniga lea e manaomia e le alii pe a maea ona ia maua le Perisitua Mekisateko.

O le faamanatuga o le isi sauniga lea e manaomia e tagata taitasi pe a maea ona maua faaeega paia i le malumalu.

O le faamanatuga o le isi sauniga lea e manaomia e se ulugalii pe a maea ona faamauina.

O le faamanatuga o le isi sauniga lea tatou te manaomia. O le faamanatuga o le ki lea i le iai o le faatuatua ia

Iesu Keriso, salamo mai le agasala, ma lagona le aafiaga o le Agaga Paia i o tatou olaga. O le auala lea e mafai ai ona tatou toe faafouina feagaiga ma faamanuiaga o le papatisoga.

*Tusitalima* 2 ua faapea mai, “Ua poloaiina tagata o le Ekalesia e faapotopoto faatasi soo e taumamafa i le faamanatuga ina ia manatua pea le Faaola ma toe faafouina feagaiga ma faamanuiaga o le papatisoga.”<sup>9</sup> Atonu e te fesili, “O a faamanuiaga?” Ioe, o le faauau pea o le faaeega a le Agaga Paia o se faamanuiaga o le papatisoga. Ae pe o le aafiaga ea o le faamamaina i le papatisoga, o se tasi o ona faamanuiaga matagofie, e faapea foi i le faafouina?

Manatu ane i lenei faamatalaga a Peresitene Dallin H. Oaks, Fesoasoani Muamua i le Au Peresitene Sili: “Ua poloaiina i tatou ina ia salamo mai a tatou agasala ma ia o mai i le Alii ma se loto momomo ma se agaga salamo, ma taumamafa i le faamanatuga. . . . Tatou te molimau tatou te loto ina ia ave i o tatou luga le suafa o Iesu Keriso ma manatua pea o Ia ma tausi i Ana poloaiiga. Afai tatou te tausi i lenei feagaiga, e faafouina e le Alii aafiaga o le faamamaina o lo tatou papatisoga. E faamamaina i tatou ma e mafai ai foi ona faatasi pea Lona Agaga ma i tatou.”<sup>10</sup>

Ia tatou faaeteete, foi, “sa le i faavaeina le faamanatuga e fai ma auala faapitoa e faataunuina ai le faamagaloina o agasala.”<sup>11</sup> I nisi faamatalaga, e le mafai ona e agasala ma lou iloa i le po o le Aso Toonai ma le faamoemoe e faavavega le faamagaloina e ala i le ai o se fasi falaoa ma inu sina vai i le Aso Sa. O le salamo o se faagasologa e sili ona aafiaga e manaomia ai le faanoanoa ma le lafoai o agasala O le salamo muai fuafuaina e le taliaina e le Faaola

Tatou te agavaa mo le mana o le faamamaina a Iesu Keriso pe a tatou aai i le faamanatuga ma le mama.<sup>12</sup> O le auala lenei tatou te tausia ai i tatou lava ia “mama mai le lalolagi” (MF&F 59:9). O le faamanatuga o le Talisuga a le Alii e mulimuli tonu i le papatisoga i le faaaogaina pea o le mataupu faavae a Keriso i le faaalualuina i luma o le Au Paia o Aso e Gata Ai e agai atu i le atoatoa.

E ao ona tatou mulimuli i lenei ala, i le avea ai o le faamanatuga o se sauniga e faifaipea i le papatisoga ma

le talia o le Agaga Paia O le sauniuniga mo le faamanatuga e manaomia ai le manatunatu loloto ma le filemu. E le mafai one avea le faamanatuga ma aafiaga faaleagaga pe afai e te fegaoioiai solo, tesi i lau telefoni, pe o le le ma nofo lelei.

O lea malaga vave mai i le lotu. A o amataina le viiga o le faamanatuga, ia mauntinoa lelei o lo o taulai atu ou mafaufauga i le Faaola, o Lana Togiola, o Lona alofa, ma Lona mutimuti alofa. Talalo ina ia faafouina oe ao e tau-mafa i le faamanatuga ma manatua o Ia.

### O Se Lesona mai ia Rwanda

I le 1994 sa tupu ai se fasiotiga o tagata matautia i Rwanda. E i le va o le 600,000 ma le 900,000 tagata na maliliu ai i le tusa ma le 60 i le 90 aso.

Mulimuli ane, na faatuina e le Ekalesia se paranesi i le aai laumua o Kigali. Sa manuia le paranesi—e aunoa ma ni faifeautalai faamisiona. I le 2011 sa ma auauna atu ai i le Eria o Aferika i Saute i Sasae ina ua ma iloa, ma le faanoanoa, e faapea o la matou resitara o se ekalesia i le atunuu o Rwanda ua le faaaogaina, o lona uiga ua matou soltulafono i le iai o se ekalesia. Sa matou iloa foi o lo matou fale tatalo, o se fale fogafale lua ua toe faaleleia, ua le o talafeagai e fai ai o ni sauniga a le Ekalesia. O le Au Peresitene o le Eria, i le fefautuai ai ma lo matou fesootaiga i le Korama a Apostolo e Toasefululua, sa faia se faaiuga faanoanoa lava e tapunia le paranesi. Sa le mafai e tagata ona toe faatasi ai mo sauniga a le Ekalesia.

Sa amata ona galalue ma le naunautai loia i Kigali, Aai o Sate Leki, ma Johannesburg, Aferika i Saute, e foia le faafitauli. I lena lava taimi, sa fesili pea le Au Paia po o afea o le a mafai ona latou toe faatasi ai. Ua tuanai masina e aunoa ma se tali po o se alualu i luma.

Ina ua tuanai le 10 masina, sa matou felelei atu ai i Kigali e asiasi le Au Paia ma taumafai e siitia ae o latou agaga. A o le i matou faia o lea, sa matou talosagaina ina ia tuuina lenei mataupu i luga o le lisi tatalo o le malumalu o fongata faale vaiaso a le Au Peresitene Sili ma le Korama a Apostolo e Toasefululua.

I le Aso Lua a o lumanai la matou malaga fuafuaina mai Johannesburg i Kigali, sa logoina mai ai i matou i se tulaga faateia, ua faamatuu mai e le malo ia le lesitala aiaia a le Ekalesia i Kigali. I le Aso Tofi o le vaiaso lava lea, sa faataga mai ai e le komesina o fanua se faatagana faapitoa mai le ofisa. Sa toe faatasiasi nei le Au Paia o Kigali i lo matou fale e aunoa ma le solia o le tulafono.

O se vavega lenei! Sa vave ona logo tagata o le a faia le sauniga a le paranesi i le Aso Sa. Sa matou taunuu i le Aso Faralie ma valaaulia tagata e auai i sauniga. Ina ua oo mai le Aso Sa, o tagata uma lava—*uma* lava o i latou—ma le toatele o a latou uo na o mai i le sauniga. Sa vave ona latou taunuu mai, ma le naunautai e toe faatasi. A o faamanuia le faamanatuga ma tufatufaina atu, sa matou lagona uma se faafouga maoae, toe faamatagofieina, ma le faamainaina o le agaga.

Na matou manatua, i le sauniga, ma le fesili pe aisea na matou le lagonaina ai lenei lava agaga i vaiaso taitasi a o matou aai i le faamanatuga. Sa matou vaavaai solo i le Au Paia ma iloa ai sa latou o mai i le fia aai ma le fia feinu i le faamanatuga. O lo latou faatuatua, maelega, ma le onosai na auala mai ai faamanuiaga ia te i matou uma. Sa matou tautino atu soo lava se taimi matou te toe aai ai i le faamanatuga, o le a matou manatuaina lenei aafiaga ma le Au Paia i Kigali. Sa matou tuuto atu o le a matou fia aai foi mo faamanuiaga e ala i le aai i le faamanatuga.

Tou te manatua ina ua maea ona faia e le Alii le faamanatuga i Sa Nifae, sa Ia fetalai atu o le faamanatuga o le ki i le faavaeina o i latou lava i luga o Lona papa. Sa Ia saunoa mai:

“Ma ou te tuu atu ia te outou se poloaiga ia outou faia nei mea [aai i le faamanatuga]. Ma afai tou te faia pea nei mea amuia outou, ona ua outou atiae i luga o lau papa.

“Ae o soo se tasi o outou na te faia se mea e sili atu pe itiiti ifo mai nai lo nei mea, ua le atiae i luga o lau papa, ae ua atiae i luga o se faavae oneone; ma pe a to mai uaga, ma oo mai lologa, ma agi mai matagi, ma taia ai i latou, o le a pauu i latou.” (3 Nifae 18:12–13).

O le faamanatuga o se mealofa matagofie ua tatou maua i Aso Sa taitasi e fesoasoani ia i tatou i lo tatou alualu i luma i le fogaelele. E ala mai le faamanatuga, tatou te

iloa ai se vaega taua o le mataupu faavae a Keriso, e faatalata atu ai i tatou i lo tatou Faaola ma iloa ai Lona alofa ma le faamagaloga i o tatou olaga. Tatou te faafetai mo nei taimi i vaiaso taitasi, e fesoasoani ina ia tatou taulai atu ai i le Faaola.

### “E mo na o au lava”

Na faasoa mai e se matou uo i Aferika i Saute le ala na ia iloa ai lenei mea. A o avea Diane ma tagata fou liliu mai, sa ia auai i se paranesi i fafo atu o Johannesburg. I se tasi Aso Sa, a o ia alala ai i le faapotopotoga, o le ata faatulagaga o le falesa na le mafai ai ona iloa o ia e le tiakono a o tufaina le faamanatuga. Sa le fiafia Diane ae sa lei fai atu se tala. Sa iloa e se isi tagata lona le maua o le faamanatuga ma tau atu i le peresitene o le paranesi ina ua uma le sauniga. Ina ua amata le Aoga Sa, sa valaaulia atu Diane i se potuaoga avanoa.

Sa sau i totonu se tasi e umia le perisitua. Sa ia tootuli, faamanuia ni nai falaoa, ma tuu atu ia te ia se fasi falaoa. Sa taumafa o ia. Na toe tootuli le perisitua ma faamanuia ni nai vai ma avatu se ipu laitiiti ia te ia. Sa ia inuina. Mulimuli ane, sa vave ona soo mai ni manatu se lua ia Diane: Muamua, “Oi, o ia [o le e umiaina le perisitua] sa faia lenei mea mo na o au lava.” Ao ia taumafa i le faamanatuga, sa ia lagonaina le alofa o le Tama Faalelagi mo na o ia lava.

O lona iloaina o le taulaga a le Faaola sa mo nao ia lava, na fesoasoani ia te ia e lagonaina le latalata ia te Ia ma faaosofia se manao lofituina ina ia faatumauina lena lagona i lona loto—ia le na o le Aso Sa ae o aso uma. Sa ia iloaina e ui sa ia nofo i se faapotopotoga e taumafa i le faamanatuga, ae o feagaiga sa ia faafouina i Aso Sa taitasi na patino lava ia te ia. Na fesoasoani le faamanatuga—ma faaaauau pea ona fesoasoani—ia lagona ai e Diane le mana o le alofa faaleatua, iloa le aao o le Alii i lona olaga, ma faalatalata atili ai i le Faaola.<sup>13</sup>

O la matou valaau e tutusa lea ma Moronae:

“Ioe, o mai ia Keriso, ma faaatoatoaina ia te ia, ma faafiti outou lava mai mea uma e le faaleatua; ma afai tou te faafiti outou lava mai mea e le faaleatua uma, ma alolofa i le Atua ma o outou manatu, mafaufau, ma le malosi atoa, ona lava



lea o lona alofa tunoa mo outou, ma o lona alofa tunoa e mafai ai ona outou atoatoa ia Keriso; ma afai tou te atoatoa ia Keriso e ala i le alofa tunoa o le Atua, e leai se ala e mafai ai ona outou faafitia le mana o le Atua.

“Ma ou te toe fai atu, afai tou te atoatoa ia Keriso e ala i le alofa tunoa o le Atua, ma le faafitia lona mana, ona faapaiaina lea o outou ia Keriso e le alofa tunoa o le Atua, e ala i le faamaligiina o le toto o Keriso, lea ua i ai i le feagai-ga a le Tama mo le faamagaloina o a outou agasala, ina ia outou paia, ua aunoa ma se ila” (Moronae 10:32–33).

E tupu lenei mea pe a tatou ola ai i le mataupu faavae a Keriso, iloa ai le faamanatuga o se sauniga e mulimuli mai i le papatisoga ma le talia o le Agaga Paia. I lenei auala, tatou te faalagolago “atoa i galuega a ia o le ua malosi aoao e laveai” (2 Nifae 31:19). Tatou te faafetai mo le faamanatuga—i le ala na te aoao ma faamanatu mai ia i tatou i vайасо taitasi i le mea na faia e lo tatou Faaola mo i tatou. Tatou te faafetai tele ia te Ia aua ua tatou iloa sa Ia togiola e mo na o i tatou lava taitoatasи.

Ina ua fetalai atu le Faaola i Sa Nifae, na Ia faapea *pe a* oo mai le timu, matagi, ma lologa. Sa ia le faapea mai *afai*. O le mea moni, e oo mai le timu, matagi, ma lologa i tagata taitasi. Ae na Ia fetalai mai ia i tatou e faapea o le ala tatou te faavae ai i luga o Lona papa o le vaai atu lea ia te Ia a o tatou aai i le faamanatuga (tagai 3 Nifae 15:9; 18:1).

E oo mai le taimi i o outou soifuaga taitasi o le a iai le musua e alu i le lotu ma ai i le faamanatuga. Afai e le i tupu lenei mea, o le a tupu. Ae ia iloa lenei: afai e te mulimuli i le faasinoga a le Faaola ma taumafa i le faamanatuga ma le loto mafatia ma le agaga nutimomoia, o le a liligi mai faamanuiaga i o outou luga o le a outou maua ai le tumau, malosiau, ma faatuina i luga o le faavae malosi o Iesu Keriso lea. O lau filifiliga e faia o lea o le a aafia ai le faavavau. O le a e faavaeina oe lava i luga o Iesu Keriso, o le na te taitaiina ma faaatoatoaina lo tatou faatuatua. ■

*Mai se saunoaga o se faigalotu, “O Mai ia Keriso,” na tuuina atu i le Iunivesite o Polika Iaga-Idaho i le aso 26 o Setema, 2017.*

#### FAAMATALAGA

1. Tagai *Merriam-Webster’s Collegiate Dictionary*, 11th ed. (2003), “o le faamafanafana.”
2. Tagai *Merriam-Webster’s Collegiate Dictionary*, “faamafanafana.”
3. *Tala’i La’u Talalelei: O Se Taiala mo le Galuega Faafaifeatalai* (2004), 1.
4. E aofia ai le manino o le O ia/O Ia/O lona
5. Tagai *Talai Lau Talalelei*, mataupu 6, 115–26.
6. Tagai i le James E. Talmage, *O Mataupu Faavae o le Faatuatua*, 12th ed. (1924), v–ix.
7. Tagai i le Talmage, *Mataupu Faavae o le Faatuatua*, vi.
8. Talmage, *Mataupu Faavae o le Faatuatua*, 171.
9. *Tusitalima 2: Taitaiina o le Ekalesia* (2010), 2.1.2.
10. Dallin H. Oaks, “O Molimau Faapitoa ia Keriso,” *Liahona*, Ape. 2001, 14.
11. Talmage, *Mataupu Faavae o le Faatuatua*, 175.
12. Tagai i le Dallin H. Oaks, “Sauniga Faamanatuga ma le Faamanatuga,” *Liahona*, Nov. 2008, 17–20.
13. Tagai i le Dale G. Renlund, “Ina Ia Mafai Ona Ou Aumai o Tagata Uma ia te Au,” *Liahona*, Me 2016, 41.

# TAPUAIGA I SE LALOLAGI O TEKINOLOSI

Saunia e Adam C. Olson

Mekasini a le Ekalesia

**I** se tasi o Aso Sa, a o tufaina atu le faamanatuga, sa sei ane i fafo e se peresitene o le Aualofa ou te iloa ia lana telefoni poto e faitau ai le “O Le Keriso Soifua: O Le Molimau a le Au Apostolo.” O le musuia ai e ala i lenei molimau faaaposetolo o le Faaola, sa ia lagonaina ai le faafouina i lana tautinoga e manataua pea o Ia.

Ae peitai, sa liusuavai ona lagona lelei i ni nai aso mulimuli ane, ina ua ia mauaina se tusi i totonus o le meli, e leai se igoa na sainiai ai mai se tagata o le uarota. Sa fajtioina e le tusitala o ia mo le faia o se faataitaiga leaga e ala i le faaaoga o lana telefoni poto i le sauniga faamanatuga. Na matuai olopalaaina o ia.

E moni, sa lei fuafua o ia e faatiga i se tasi e ala i le faaaogaina o lana masini feaveai. Sa seasea ona ia faaaogaina i totonus o le falelotu, ae sa nao le taimi lea ina ua ia lagonaina sa talafeagai ai. Ae ina ua maua atu le tusi, sa amata ona ia masalomia o ia lava.

## O Se Luitau Fou

E tofu augatupulaga uma ma o latou lava luitau. Ua lipotia mai i se tasi o suesuega e faapea, e oo atu i le 2020 o le a toatele atu tagata e i ai telefoni feaveai (5.4 piliona) nai lo o ni vai paipa (3.5 piliona).<sup>1</sup> Faaopoopo atu i ai tamai komepiuta feaveai “phablets [tapeleti],” ma isi masini sulu, ona e maua ai lea o se lalolagi ua tauivi ma le fesili: O a auala talafeagai o faaaogaaga talafeagai o “masini tekinolesi”?

A o tauivi matua, taitai, ma faiaoga e filifili mea e talafeagai mo le faaaogaaga talafeagai o masini tekinolesi i potopotoga a le Ekalesia, o filifiliga eseese ua taitai atu ai i nisi taimi i ni auala feteenai e taulima ai masini tekinolesi i sauniga a le Ekalesia.

Ua tuuina mai e taitai o le Ekalesia le faatuuga i faamanuiaga ma tulaga matautia o le faaaogaina o tekinolesi. Ae peitai, e le o taimi uma e tau poloai mai ai e taitai o le Ekalesia mea uma e tatau ona fai ma mea e le tatau ona fai o le ola ai i le talalelei (tagai Mosaea 4:29–30). Ua faamoemoe e suesue e tagata o le au paia le mataupu mo i latou lava ma saili le taitaiga a le Agaga Paia i le faia o faaiuga. O le mea e faanoanoa ai, e pei o le tulaga o lo o i luga, o nisi taimi tatou te faaaogaina ai e le gata i le na o se tulaga ae faapea foi o se uiga faaalia le lelei agai ia i latou e ese se tulaga o i ai.

## Musuia e le Atua; Faaaogaina e Satani

Ua tuuina mai e le Atua faamanuiaga o tekinolesi mo lo tatou manuia ma le faaalualuina i luma o Lana galuega.<sup>2</sup> O lea la, a o faaaoga ai ma le le talafeagai e nisi o le au paia o a latou masini tekinolesi, na aoao mai Elder David A. Bednar o le Korama a Apostolo e Toasefulu e faapea, “e le tatau ona tatou faatagaina le fefe i measese e taotaomia ai i tatou mai le mauaina o faamanuiaga maoae e mafai ona tuuina mai e nei meafaigaluega.”<sup>3</sup> E manaomia ona tatou aoao e faaaoga tatau i latou ma aoao a tatou fanau e faia foi faapea.



*Mafaufau i mataupu  
faavae e tolu mo le  
faaaogaina talafeagai  
o masini i totonu o  
le falesa.*

O masini feaveai e fesoasoani i tagata o le Eklesia i suesuega o le talalelei, galuega o talafaasolopito o aiga ma le malumalu, ma le faasoaina atu o le talalelei. Mo se faataitaiga, e ova atu ma le tolu miliona tagata na faaaogaina le polokalama o le Gospel Library ia Ianuari 2018. O le tuufaatasiga o le taimi o a latou suesuega e tutusa ma le silia i le afe o tausaga.

Faatasi ai ma le matauina o faamanu-iaga, ua lapatai mai taitai o le Eklesia e uiga i tulaga e ono matautia ai, e aofia ai le faamaimauina o le taimi, faaleagaina ai mafutaga, ma le maileia i le agasala.<sup>4</sup> I faapotopotoga a le Eklesia, o le faaaogaina le talafeagai e mafai ona faalavefau ia i tatou ma isi mai le tapuiai ma le aoaoina lea e taua i le atinaeina o lo tatou sootaga ma le Atua.

Ae ui i lea, o nei lamatiaga e le tulaga ese i masini tekinolosi. Na aoao mai ai Elder M. Russell Ballard o le Korama a Aposetolo e Toasefululu, “O nisi o nei meafaigaluega—e pei o soo se meafai-galuega i lima e lei faataitai i ai po o le lima e le puleaina—e mafai ona avea ma se mea matautia.” “. . . Ua le ese lea mai auala e filifili e tagata e faaaoga ai le televisie po o ata tifaga pe oo foi i se faletusi. E televave i taimi uma ia Satani e faaaoga le mana le lelei o fatufatuga fou, e faaleaga ma faatoilalo ai, ma taofia ai soo se aafiaga mo le lelei.”<sup>5</sup>

## **Masini Feaveai i Sauniga Faamanatuga**

O le iloa ai o faamanuiaga faamoemoeina—faapea foi ma faalavefau faamoemoeina—o nei masini tekinolosi, e faapefeia la ona filifili e tagata o le au paia le auala e faaaoga ai? Sa fautuaina mai e Iosefa Samita le mana o se mataupu faavae o se faiga faavae ina ua ia fai mai, “Ou te aoao ia i latou mataupu faavae sao, ona latou pulea ai lea o i latou lava.”<sup>6</sup>

O i, tatou te iloilo ai mataupu faavae ia e ono aoga i le faia o faaiuga e uiga i le faaaogaina o masini feaveai i sauniga faamanatuga. Mo se talanoaga i le faaaogaaga talafeagai o masini tekinolosi i le potuaoga, tagai “Aoaoga i Tekinolosi: Faaaafaina o le Autalavou i le lalolagi o Masini Faatekonolosi,” saunia e Brother Brian K. Ashton, Fesoasoani Lua i le Au Peresitene Aoao o le Aoga Sa, i le itulau e 30 o lenei lomiga.

### ***Mataupu Faavae 1: O au filifiliga e lagolago i le tapuaiga.***

O le sauniga faamanatuga e mo le “[tuuina atu o a tatou] tapuaiga i le Silisili Ese” (MF&F 59:10). Na aoao mai Elder Dallin H. Oaks o le Fesoasoani Muamua o le Au Peresitene Sili, o la tatou taulaiga iina e tatau ona i ai i le faafouina o a tatou feagaiga ma lo tatou faatuatua i le Alii o Iesu Keriso ma Lana Togiola.<sup>7</sup> O mea tatou te filifili e fai i le sauniga faamanatuga e tatau ona fesoasoani tatou te faia ai na mea.

O le i ai la o lena taulaiga, pe afai e tulai mai le manaomia, atonu tatou te faaaogaina ma le talafeagai a tatou masini feaveai e:

- *Faaleleia atili ai la tatou tapuaiga.* E ono faaaoga e se tagata o le au paia se masini tekinolosi i le taimi o le sauniga faamanatuga e sue ai mau, usu ai viiga, pe tusi ai ni faamaumauga i uunaiga faaleagaga.
- *Auauna atu.* Atonu e matauina e le epikopo se tagata fou pe le toaga ua ulufale filemu mai i le pito i tua o le falelotu i le taimi o le sauniga faamanatuga ma, afai e musuia ai, e tesia tu i le taitai misiona e faafeiloai le tagata ma valaaulia i latou i se vasega o Mataupu Faavae o le Talalelei pe a maea le sauniga.
- *Faafraigofie ai fesootaiga taua.* E mafai e fomai, tagata e muamua tali atu i se faalavelave faafuasei, ma isi tagata tomai faapitoa e valaau i ai pe a i ai

ni mea e tutupu faafuasei, ona auai i sauniga tapuai ona latou te iloa e mafai ona faafesootai i latou pe a manaomia e ala i a latou masini feaveai.

Ao tatou saili e taulai atu i le Faaola, e taua le manatua o a tatou masini e mafai ona faafraigofie ai a tatou suesuega, ae e le mafai ona latou faia la tatou aoaoina. E mafai ona latou tuuina mai se mea tatou te mafaufau loloto i ai, ae e le mafai ona latou mafaufau mo i tatou. E mafai foi ona latou fesoasoani ia tatou manatua e tatalo, ae o le tatalo o se mea e ao lava ona tatou faia mo i tatou lava.

Na aoao mai Elder Bednar o la tatou mafutaga ma le Atua e moni, e le faitino.<sup>8</sup> E le mafai ona kiliki faalua i ai pe sii mai.<sup>9</sup> O lea la, a o faaaoga e le peresitene o le Aualofa i le amataga o le tusi lenei ia lana telefoni e fesoasoani ai e faatotonugalemu ona mafaufauga ia Keriso, o le feagaiga sa ia faafouina sa lei i ai i le telefoni, sa i ai ia te Ia. O le malaga lea sa fesoasoani lana maisni na te amataina na tatau ona faamaeaina i ona mafaufauga, i ana tatalo, ma ana faatinoga.

### ***Mataupu Faavae 2: Ou te tuuitiitia mea faalavefau.***

E tatau ia i tatou uma ona taumafai mo se siosiomaga e faaleleia ai la tatou taulai atu i le tapuaiga ma le aoaoina. E taua le tuuitiitia o mea faalavefau. O le mataupu faavae lenei e faatatau i le tele o tulaga, mai le auala tatou te faia ai ni talanoaga pe taulima ai tamaiti faigata i le auala tatou te faaaoga ai a tatou masini tekinolosi.

E anoanoai auala e faalavelaveina ai e se masini lea sa fuafuaina e fai ai le tele o mea. E mautinoa lava o le matamataina o vitio, faalogologo i musika, po o le taalo i taaloga o le a faigata ai ona taulai atu i sauniga o le faamanatuga. Ae o le a faapena foi i le siakiina o imeli, feau i tesia, faasalalauga faaleagafesootai, ai o taaloga, ma le tele o tiligi, uu, ma aikona eseese lea e toso atu ai i tatou i mea o tutupu, mafutaga, ma talanoaga e tutupu i fafo mai o le sauniga. O nei mea uma ma isi mau mea e mafai ona faalavelave ia i tatou ma isi, e oo lava i isi i nai laina nofoa e ese mai ia i tatou.

Mo i latou o e mananao e aveese atoa le faalavefau o masini tekinolosi, atonu e talafeagai ai le tuu o a latou masini i le fale po o le tape. Mo i latou o e faaaoga a latou masini e lagolago ai a latou tapuaiga ae mananao e aloese mai le faalavelave i isi, atonu e lava lava le tape o



le leo o le masini, tuu i le aua le faalavelave, po o le tuu i le faailo o le vaalele.<sup>10</sup>

### **Mataupu Faavae 3: Ou te taulai i lau lava tapuai.**

O le a i ai lava i taimi uma ni mea faalavefau po o le a lava le ituaiga, ma e le o i latou uma o ni masini tekinolosi. O nei mea e ono aofia ai se tamaititi laitiiti faigata, se iniseti e uu solo, po o le pao o taavaleafi i fafo. Ua ia i tatou le tiutetauave muamua mo mea tatou te maua mai la tatou tapuaiga. O lea la, afai e galo i se tagata ona tuu lana telefoni i le faailo o le vaalele, e tatau ona tatou taumafai e tuu i tatou lava i le faailo o le “le amanaia o mea faalavefau”.

Na aoao mai Peresitene Russell M. Nelson, “Ua i ai i tagata taitoatasi o le Ekalesia le tiutetauave mo le faata-maoagaina o le faaleagaga lea e mafai ona maua mai i se sauniga faamanatuga.”<sup>11</sup>

Afai tatou te matauina isi tagata e siomia i tatou o faa-aoga a latou masini, e tatau ona tatou faaeteete i le masalomia e faapea, o mea o loo latou faia ua le talafeagai ona o loo i luga o se masini tekinolosi. Afai o le tagata o se tamaititi po o se tasi ua tofia i tatou e nafa ma le vaaia, atonu e talafeagai le siaki o le latou faaaogaaga e pei ona faatonu mai e le Agaga. Nai lo o lena, ia tatou taumafai e toe foi i la tatou lava tapuaiga.

### **Aoao Faatasi**

I se faamatalaga na aofia ai nei mataupu faavae, na fautuaina ai e Elder Oaks, “I le taimi o le sauniga faamanatuga—ae maise lava i le taimi o le sauniga o le faamanatuga—e tatau ona tatou tulimatai atu e tapuai ma ia aloese mai isi gaoioiga uma, ae maise lava mai amioga e faalavelave ai i isi o loo tapuai.”<sup>12</sup>

E tele isi mataupu faavae e mafai ona fesoasoani e taiala ai lo tatou faaaogaaga. A o faasolo ina faateleina le avea o masini faafuainumera ma se vaega masani o la tatou aganuu, o le a manaomia ona tatou tauivi faatasi ma fesili e uiga i mea e talafeagai. Talu ai o tulaga uma lava e tulaga ese ma o le a faaauau pea ona sui ia tekinolosi, e manaomia ona faaauau ona tatou iloiloina la tatou lava faaaogaaga, mafaufau i manatu faaalia fou pe ese, ma ia loto e faamagalio i isi ao tatou aoao faatasi. ■

### **FAAMATALAGA**

1. Tagai “10th Annual Cisco Visual Networking Index (VNI) Mobile Forecast Projects 70 Percent of Global Population Will Be Mobile Users,” Feb. 3, 2016, newsroom.cisco.com.
2. Tagai David A. Bednar, “Ofoina atu e se Apostolo se Fautuaga e uiga i Ala o Faasalalauga Faaleagafesootai,” *Liahona*, Jan. 2015, 17; *Discourses of Brigham Young*, sel. John A. Widtsoe [1954], 18–19.
3. I le Sarah Jane Weaver, “Elder Bednar Tells 2016 Mission Presidents Not to Fear Technology,” Iulai 6, 2016, news.lds.org.
4. Tagai “Elder Bednar Tells 2016 Mission Presidents.”
5. M. Russell Ballard, “Faasoa Atu le Talalelei e Faaaoga ai le Initoneti,” *Liahona*, June 2008, N2.
6. *Aoaoga a Peresitene o le Ekalesia: Iosefa Samita* (2007), 284.
7. Tagai i le Dallin H. Oaks, “Sauniga Faamanatuga ma le Faamanatuga,” *Liahona*, Nov. 2008, 17–20.
8. Tagai David A. Bednar, “O Mea e Pei Ona I Ai Lava,” *Liahona*, June 2010, 22–31.
9. Tagai Scott D. Whiting, “Digital Detachment and Personal Revelation,” *Ensign*, Mat. 2010, 16–21.
10. Tagai M. Russell Ballard, “Be Still, and Know That I Am God” (Faigalotu a le Ofisa o Aoga a le Ekalesia, 4 Me, 2014), lds.org/broadcasts.
11. Russell. M. Nelson, “Tapuaiga i le Sauniga Faamanatuga,” *Liahona*, Aok. 2004, 14.
12. Dallin H. Oaks, “Sauniga Faamanatuga ma le Faamanatuga,” 18–19.



**Saunia e Brian K. Ashton**

Fesoasoani Lua i le  
Au Peresitene Aoao  
o le Aoga Sa

# Aoao atu e faaaoga ai le tekinolosi: **FAAAAFAIAINA O LE AUTALAVOU I LE LALOLAGI O MASINI FAATEKINOLOSI**

*E faapefea ona avea le tekinolosi ma fesoasoani ae le o se fili i le potuaoga?*

**A**o ou asiasi atu i uarota ma siteki i le Ekalesia, e masani ona fesili mai faiaoga ma taitai o le autalavou, "E faapefea ona tatou tausia masini faatekonolosi mai le avea ma faalavefau i le vasega?" I le taimi lava e tasi, o le toatele o faiaoga lelei o le autalavou sa ou matauina e amata a latou vasega i le fasi fuaitau "Ave ae lau telefoni ma saili mai le . . ." O lea, ou te manao e faasoa atu ni nai mea sa ou aoaoina e uiga i fesoasoaniga i le autalavou e faaaoga tekinolosi i auala amiontonu ma le aoga i le potuaoga o le talalelei.

## **Valoaga e faatatau i le Tekinolosi**

Ua saunoa mai perofeta ma apostolo ia i tatou e uiga i faamanuiaga o le tekinolosi, ma tau mai ia i tatou le mafuaaga na tuuina mai ai e le Tama Faalelagi tekinolosi e fesoasoani ia tatou faaalualu ai i luma Lana galuega i se ala faateleina vave. I le 1862 na aoao mai Peresitene Polika Iaga (1801–77): "O mea fou uma ua maua i le saienisi ma faatufugaga, e moni lava ma aoga i le tagata na tuuina mai i faaaliga tuusao mai le Atua. . . . Na tuuina mai faatasi ma se vaaiga e saunia le ala mo le manumalo aiai i le upumoni, ma o le togolaina o le lalolagi mai le mana o le agasala ma Satani. E ao ona tatou faaaoga lelei nei meafou sili ua maua . . . ma tuuina atu i a tatou fanau faamanuiaga o vaega uma o le poto aoga, e saunia ai i latou e laa atu i luma ma faia a latou vaega ma le atoatoa i le galuega sili."<sup>1</sup>

## **Faaaogaina o Masini Faatekinolosi i Gaoioga Amiontonu**


I lou olaga, o lau saililiga o le talalelei sa matua faaleleia e ala i le faaaogaina o tusitusiga paia ma isi punaoa i luga o le polokalama feaveai o le Potutusi o le Talalelei.


Ua saunia o tatou talavou e suesue, aoao atu, ma talai atu le talalelei i aso uma o le olaga o ni faifeautalai faamisiona e faaaoga ai le tekinolosi i auala ua faatoa amata ona tatou iloa. Ona o lo o taumafai le fili e faaaoga mea lelei ma meafou aoga uma ua fausia mo ona faamoemoega leaga, o le mea lea e alagatatau ai ia i tatou o matua, taitai, ma faiaoga ona fesoasoani i talavou e aoao le faaaogaina o le tekinolosi i auala amiontonu ma le aoga a o laiti i latou.

O le aiga o le nofoaga sili lea mo le faataunuina o lenei mea. (E ao i matua o lo o saili i punaoa fesoasoani ona faaaoga nisi o mea ua saunia e le Ekalesia o lo o lisi atu i le itupa o lo o tuuina atu.) E ofoina atu foi e le potuaoga o le talalelei avanoa taua e fesoasoani ai i le autalavou e faafe-sootai ai a latou masini faatekinolosi ma gaoioga amiontonu ma lagonaina ai le Agaga Paia. O nisi nei o auala e mafai ona fesoasoani ai faiaoga ma taitai e faia lenei mea.

## **Faatutu ni Faamoemoega e faalagolago i Mataupu Faavae**

Faatutu faamoemoega e faatatau i le faaaogaina o tekinolosi i le potuaoga e faalagolago i mataupu faavae. O se





tasi o mataupu faavae autu o le “O lo tatou faamoemoega i le vasega o le aoao lea o le talalelei e ala i le Agaga Paia. O lo tatou faaaaogaina o masini faatekinolosi e fesoasoani i lenei taumafaiga, ae le fai ma faalavelave ia i tatou.” E sili mamao atu ona aoga lenei nai lo se tulafono e pei o le “Tatou te le faaaaogaina agafesootai i le taimi o le vasega.” E molimoli atu e lenei tulafono le feau e faapea o le agafesootai e leaga, ae o le mataupu faavae e aumai ai le avanoa e faaaaoga ai le agafesootai i le vasega i auala talafeagai, e faapei o le aapa atu ia i latou ua le auai mai ina ia latou iloa ua misia i latou ma valaau atu ia latou auai mai i le vайасо fou.

Ua tatou faaleagaina a tatou talavou i tulafono e faailoa mai ai o se amioga ua sese ae leai. Ua faatupulaia ai le le malamalamama e tusa ai ma le faaaaogaina o tekinolosi i isi tulaga ma misia ai le avanoa e aoao atu ai le faaaaogaina tatau o tekinolosi. O faamoemoega ua tatou faatutu i le fesoasoani a le autalavou i a tatou vasega e tatau ona talafeagai ma o latou tausaga ma le matutua.

### Aoao i le Tekinolosi

Aua nei avea lou lava fefe ma le utiuti o lou malamalamama e uiga i le tekinolosi e punitia ai le avanoa e faaaaoga ai e le autalavou masini faatekinolosi i auala talafeagai. Na lipoti mai e se tasi uarota e faapea sa fai sa latou aoaoga mo faiaoga i auala e faaaaoga ai masini faatekinolosi e suesue ai le talalelei. Na latou iloa ai a o faateleina le silafia e faiaoga i le faaaaogaina o tekinolosi, ua faatupulaia foi lo latou fiafia e faaaaoga masini faatekinolosi e aoao ai le talalelei, ma o le mataupu e uiga i le fai o le tekinolosi ma faalavelave i totonus o le vasega ua matua tea ese lava.

### Fai Lesona Faagaoioi ma Fefaasoai

Ua ou iloa o se auala silisili e fesoasoani ai i tamaiti e faaaaoga le tekinolosi i le auala amiontonu o le faia lea o lesona ina ia faagaoioi ma fefaasoai ma faaaofia ai le faaaaogaina o masini faatekinolosi i le fuafuaga o lesona. E seasea ou maua ni tamaiti o faaaaoga le talafeagai a latou telefoni feaveai i potuaoga o lo o tuuina atu ai e faiaoga fesili musuia, ua auai tamaiti i le lesona ma lagona le alofa o le faiaoga mo i latou, ma ua faatasi mai le Agaga Paia.

Pe a tupu lenei mea, e masani ona amata e le faiaoga le vasega e ala i le tuuina atu o se fesili musuia ona saili lea e le autalavou, e masani i ni vaega toalaiti, le tali i le fesili mai

tusitusiga paia ma saunoaga a perofeta. I le taualumaga o le lesona, ua faaosofia e le faiaoga tamaiti e saili i tusitusiga paia, suesue i lauga o konefesi aoao, matamata i vitio ua saunia e le Eklesia, ma talanoa i mea ua latou aoaoina. O le tele o le faaaofia o le autalavou i le faasologa o le aoaoga, o le tele foi lea o le avanoa o le a latou faaaogaina ai talafeagai masini faatekinolosi.

## Ia Faapalen'i

A o tatou faaaofia tekinolosi ia tatou lesona, e taua ona manatua o lo tatou faaaogaina o tekinolosi e manaomia ona faapalen'i. E ao ona tatou faaeteete ina ia mautinoa ia le avea le tekinolosi e fai ma lesona pe faalavelave foi mai le lagonaina o le Agaga Paia.

Ma le isi mea, o nisi o tamaiti e leai ni a latou masini faatekinolosi ma ia aua nei lagona ua le amanaia i latou. E ese mai le matamata i vitio ua saunia e le Eklesia, o gaoioiga e mafai ona faia i masini faatekinolosi i le potuaoga ia mafai foi ona faia i tusitusiga paia ma kopi lolomi o mekasini a le Eklesia.

I le ma lenei, e iai taimi e le talafeagai ai ona faaaoga masini faatekinolosi. Mo se faataitaiga, afaia ua tuuina atu molimau a tamaiti po o faiaoga, atonu e talafeagai i faiaoga ona valaau atu ma le alofa tamaiti e tuuese a latou telefoni feaveai ae tau lava ina ia lagona mea o lo o aoaoina ai i latou e le Agaga Paia.

## Faaali mai le Onosai

O le mea mulimuli, mo nisi talavou, o le aoaoina o le faaaogaina talafeagai o masini faatekinolosi i le vasega atonu e alu ai se taimi. O faiaoga e faapei o Keriso i so o lava se potuaoga latou te faaali atu le onosai ma le alofa ia i latou e le o mautonu.

## Tekinolosi: O se Faaleleia, E le o se Faamatau

O le fesoasoani i le autalavou e faaaoga talafeagai le tekinolosi o le a faamanuia ai i latou i o latou olaga, ma faaleleia ai a tatou vasega. E pei ona faasoa mai e Elder Richard G. Scott (1928–2015) o le Korama a le Toasefululu, “O le tekinolosi, pe a malamalamā i ai ma faaaogaina mo faamoemoega amiontonu, e le tatau ona avea ma se mea taufaamatau ae o se faaleleia atili ai o fesootaiga faaleagaga.”<sup>2</sup>

I le avea ai ma le Au Peresitene Aoao o le Aoga Sa, matou te valaau atu i faiaoga e opogi le tekinolosi ia latou

lesona ma fai mea uma e mafai e fesoasoani ai i le autalavou e faaaoga le tekinolosi mo faamoemoega amiontonu. Afaia e te fesili atu i le Tama Faalelagi e fesoasoani i au taumafaiga, o le a Ia tali mai i na tatalo. ■

## FAAMATALAGA

1. *Discourses of Brigham Young*, sel. John A. Widtsoe (1954), 18–19.
2. Richard G. Scott, “Mo Le Filemu i le Aiga,” *Liahona*, Me 2013, 30.

## FAAAOGAINA TALAFEAGAI O TEKINOLOSI

Ua tau mai e Brother Brian K. Ashton ia i tatou e faapea o le aiga o le nofoaga sili lea e aoao ai ona faaaoga le tekinolosi i le amiontonu. O punaoa o lo o mulimuli mai e mafai ona fesoasoani i tagata taitoatasī, matua, ma aiga e filifili i le ala e faaaoga ai tekinolosi ua iai nei i auala talafeagai:

- *Puipuiga mo le Faaaogaina o Tekinolosi*. E ui ina sa tusia mo faifeautalai, o taiala i lenei tusi e mafai ona fetuutuunai mo le aiga. O lo o maua i le 28 gagana i le polokalama feaveai o le Potutusi o le Talalelei pe lolomiina mai le faletusi tutotonu po o le faleoloa initonetī.
- O se lisī o lesona o afiafi faaleaiga e puipuia ai mai ata mataga, e aofia ai le auala e filifili ai fesootaiga lelei, e mafai ona maua i le [overcomingpornography.org/resources](http://overcomingpornography.org/resources) (o lo o maua i gagana e 10).
- O taiala i talanoaga faaleaiga e faatatau i agafesootai o lo o faamanino mai i le “Families Should Discuss How to Use Social Media in Righteous Ways” (E Ao i Aiga ona Talanoa i Auala e Faaaoga ai Agafesootai i Ala Amiontonu), i le [lds.org/go/81833a](https://lds.org/go/81833a) (o lo o maua i gagana e 10), po o i le lauga a Elder David A. Bednar o le Korama a Apostolo e Toasefululu, “Faatumu le Lalolagi e ala i Agafesootai,” ia Aokuso 2015 *Liahona*.



## MATAUPU 6

# O Le Meaalofa ma le Mana o le Atua

*O le mataupu 6 lenei o se faamatalaga fou e fa-voluma o le talafaasolopito o le Ekalesia ua faaaautuina Au Paia: O Le Tala o le Ekalesia a Iesu Keriso i Aso e Gata Ai. O le a maua vave lenei tusi i gagana e 14 ua lolomita, i le vaega o le Talafaasolopito o le Ekalesia o le polokalama o le Potutusi o le Talalelei, ma i le initoneti i le auapaia.lds.org. Mataupu 5, lomia i le lomiga o Iulai, sa faamatalaina ai le leiloa o uluai 116 itulau o le faaliliuga o le Tusi a Mamona i le 1828.*

**I**na ua toe foi atu Iosefa i Haramoni i le taumafanafana o le 1828, sa toe faaali atu Moronae ia te ia ma aveese atu papatusi. “Afaí e lava lou lotomaualalo ma salamo,” sa fetalai mai ai le agelu, “o le a e toe mauaina [papatusi] i le aso luasefulu lua o Setema.”<sup>1</sup>

Sa uftia le mafaufau o Iosefa i le pogisa.<sup>2</sup> Sa ia iloa ua sese o ia i le le amanaiaina o le finagalo o le Atua ma le faatuatuaina o Matini i tusitusiga. O lea la ua le toe faatuatuaina o ia e le Atua i papatusi po o mea faaliliu upu. Sa lagona e Iosefa le onomea ia te ia o soo se faasalaga lava e auina mai ia te ia mai le lagi.<sup>3</sup>

I le mamafatū i le ta’usalaina ma le salamo, sa ia tootuli ai i ona tulivae, ma ta’uta’u atu ana agasala, ma aioi atu mo se faamagaloga. Sa ia mafaufau i le mea na ia sese ai ma mea e mafai ona ia toe faia ia sili atu ai pe afai e toe faataga o ia e le Alii e faaliliu.<sup>4</sup>

I se tasi aso ia Iulai, a o savali atu Iosefa i se mea e le mamao tele mai lona fale, sa faaali atu Moronae ia te ia. Sa tauao atu e le agelu ia te ia mea faaliliu upu, ma sa vaaia e Iosefa se feau paia i totonu: “O galuega ma fuafuaga, ma faamoemoega o le Atua e le mafai ona taofia, pe mafai ona avea i latou ma meanoa.”<sup>5</sup>

Sa mafanafana ia upu, ae sa lei pine ae sau ai i tua ma le aoaiga. “Sa sa’olele lava au poloaiga,” sa fetalai mai ai le Alii. “Sa lē tatau ona sili atu lou fefe i tagata nai lo i le Atua.” Sa ia poloaiina Iosefa ia salamo ma ia faaeteete atili i mea paia. O faamaumauga i luga o papatusi auro sa sili atu ona taua nai lo le ta’uleleia o Matini po o le manao o Iosefa ia faafafia tagata. Sa saunia e le Alii [papatusi] e toe faafou ai Lana feagaiga anamua ma aoao atu ai i tagata uma ia faalagolago ia Iesu Keriso mo le faaolataga.

Na unaia e le Alii ia Iosefa e manatua Lona alofa mutimutive. “Ia e salamo i le mea sa e faia,” na Ia poloai atu ai, “ma o loo filifilia pea lava oe.” Na Ia toe valaaufina Iosefa e avea ma Ana perofeta ma tagatavaai. Peitai na Ia lapataia o ia e uai atu i Lana upu.

“Vagania ai ua e faia lenei mea, o le a tuu atu oe ma avea ai e pei o isi tagata, ma lē toe maua se meaalofa.”<sup>6</sup>

I lena tautoulu, sa malaga atu ai matua o Iosefa i le itu i saute i Haramoni. Toeitiiti lava lua masina talu ona tuua e Iosefa lo latou aiga i Manaseta, ae latou te le i toe faalogo lava i se tala mai ia te ia. Sa la popole ua lofituina o ia i faalavelave [na tutupu] i le taumafanafana. I le na o ni nai vайaso, sa maliu ai le la pepe muamua, toeitiiti lava a maliu ai ma si ona faletua, ma leiloloa ai foi ma itulau o tusitusiga. Sa la mananao ia mautinoa o loo manuia i laua ma Ema.

[Masalo] e itiiti ifo ma se maila taunu loa i laua, ae oso loa le olioli tele o Iosefa le Matua ma Lusi i le vaai atu o tu mai Iosefa i le aualatele i luma atu, o loo toafimalie ma



fiafia. Na ia faamatala atu ia i laua le aveesea o le talitonuga o le Atua ia te ia, lana salamo i ana agasala, ma le mauaina o le faaaliga. Sa tuia o ia i le aoaiga a le Alii, ae pei o perofeta o anamua, sa ia tusia i lalo le faaaliga mo isi e faitau i ai. O le uluai taimi lea na ia tusifaamaumauina ai le afioga a le Alii ia te ia.

Sa ta'u atu foi e Iosefa i ona matua ua toe faafoi mai e Moronae ia papatusi ma mea faaliliu upu. Sa foliga mai na fiafia le agelu, sa faamatala ai e Iosefa. "Sa ia ta'u mai ia te au ua alofagia au e le Alii mo lo'u faamaoni ma le lotomauualalo."

Ua teu ese nei ma le saogalemu faamaumauga i totonus o le fale, ma nana i se pusa. "O loo tusiupu Ema mo au i le taimi nei," sa ta'u atu ai e Iosefa ia i laua, "ae sa fetalai mai le agelu o le a auina mai e le Alii se tagata e tusitusi mo au, ma ou te talitonu o le a faapena lava ona fai."<sup>7</sup>

O le tautotogo na sosoo ai, sa malaga atu ai Matini i Haramoni ma se tala le lelei. Ua faato'ai e lona toalua se tagi i le faamasinoga, ua tuuaia ai Iosefa o se tagata taufaasese o loo faafoliga na te faaliliua ni papatusi auro. Sa faamoemoeina nei e Matini se tusi samania e poloaiina ai o ia e molimau i le faamasinoga. E ao ona ia tautino atu na faavalea o ia e Iosefa, a leai o le a molia foi o ia e Lusi i le taufaavalea.<sup>8</sup>

Sa uunaia e Matini ia Iosefa ia avatu ia te ia nisi faamanonga o le moni o papatusi. Sa ia manao e ta'u i le faamasinoga mea uma e uiga i le faaliliuga, ae sa ia popole o le a le talitonu tagata ia te ia. Ae sa saili foi e Lusi le fale o Samita ae lei maua lava se faamaumauga. Ma e ui sa ia auauna o se tusiupu ia Iosefa mo le lua masina, ae sa lei vaai lava Matini i papatusi ma sa le mafai ona ia molimau atu na ia vaai i ai.<sup>9</sup>

Sa avatu e Iosefa lea fesili i le Alii ma maua mai ai se tali mo lana uo. O le a le ta'u atu e le Alii ia Matini ana tala e fai atu i le faamasinoga, o le a Ia le tuuina atu foi ia te ia nisi faamaoniga sei vagana ua filifili ia Matini e lotomaualalo ma faaaoga le faatuatua. "Afai latou te le talitonu i a'u upu, o le a latou le talitonu ia te oe, la'u auauna e, Iosefa," Sa Ia fai mai ai, "pe ana mafai ona e faaali atu ia te i latou mea uma ua Ou tuu atu ia te oe."

Sa folafola mai e le Alii e taulima pea Matini ma le alofa mutimutivale, pe afai na te faia mea na faia e Iosefa i lena taumafanafana ma faalotomaualaloina o ia lava, ma faalagolago i le Atua, ma aoao mai i ana mea sese. E toatolu molimau faamaoni o le a vaai i papatusi i le taimi e tatau ai, sa fetalai mai ai le Alii, ma e mafai ona avea Matini ma le tasi o i latou pe afai na te tuu lona saili mo faamaoniga a isi.<sup>10</sup>

A o lei faamaeaina Ana afioga, sa faia e le Alii se tautinoga. "Afai e le faamaainia e lenei tupulaga o latou loto," sa Ia fetalai mai ai, "o le a ou faatuina la'u ekalesia."<sup>11</sup>

Sa mafaufau Iosefa i nei upu a o kopiina e Matini le faaaliga. Ona la faafofoga lea ma Ema a o toe faitau atu e Matini e siaki ai lona sa'o atoatoa. A o latou faitauina, sa sau i totonus le tama o Ema i le potu ma faalogologo i ai. Ina ua maea, sa ia fesili atu po o ai e ana ia upu.

"O fetalaiga a Iesu Keriso," sa faamalamalama atu ai e Iosefa ma Ema.

"Ou te manatu o lena mea atoa o se taufaasese," sa fai atu ai Isaako. "Ia lafoai."<sup>12</sup>

Sa le amanaiaina e Matini le tama o Ema, ae ave lana kopi o le faaaliga ma oso loa i luga o le taavale soloafanua ma alu loa i le fale. Na sau o ia e Haramoni e saili se faamaoniga o papatusi, ma sa ia tuua ma se faaaliga na molimau mai ai i le moni. Sa le mafai ona ia faaaogaina i le faamasinoga, ae sa ia foi atu i Palamaira ma le iloaina sa silafia e le Atua o ia.

Mulimuli ane, a o tu ai Matini i luma o le faamasino, sa ia tuuina atu se molimau faigofie, ma le mamana. Faatasi ma lona lima na sii i luga i le lagi, sa ia tautino atu na ia avatu ma le lotomalie ia Iosefa le lima sefulu tala e fai ai le galuega a le Alii. Faatasi ai ma le leai o

se faamaoniga o tuuaiga a Lusi, sa faaleaogaina ai e le faamasinoga le moliaga.<sup>13</sup>

A o le taimi lea, sa faaauau ai pea e Iosefa le faaliliuga, ma tatalo ia vave ona auina atu e le Alii ia te ia se isi tusiupu.<sup>14</sup>

I Manaseta, sa i ai se alii talavou e igoa ia Oliva Kaotui sa nonofo faatasi ma matua o Iosefa. Sa tasi le tausaga na laitiitai ai Oliva ia Iosefa, ma i le tautoulu o le 1828 sa ia amata faiaoga ai i se aoga pe ā ma le maila le mamao i saute mai le faatoaga a le au Samita.

O faiaoga sa masani lava ona nonofo faatasi ma aiga o a latou tamaiti aoga, ma ina ua faalogo Oliva i fafatala e uiga ia Iosefa ma papatusi auro, sa ia fesili pe mafai ona ia nofo faatasi ma le au Samita. I le taimi muamua sa ia iloaina ai nao ni nai faamatalaga mai le aiga. O tusitusiga

na leiloloa ma le faitatala i le lotofale na latou faaeteete ai i le toe faia o nisi faamatalaga.<sup>15</sup>

Ae i le taumalulu o le 1828–29, a o aoao atu e Oliva le fanau a Samita, sa faatuatuaaina ai o ia e le [au Samita]. Pe tusa o lea taimi, sa toe foi atu ai Iosefa le Matua mai se malaga i Haramoni ma se faaaliga ua tautino ai o le a amata e le Alii se galuega ofoofogia.<sup>16</sup> E oo ifo i lena taimi ua faamaonia Oliva o se tagata sailili faamaoni mo le upumoni, ma sa faamatala atu ia te ia e matua o paia o lo laua atalii.<sup>17</sup>

O mea na la ta'u atu na faagaeetia ai Oliva, ma sa ia moomoo ai e fesoasoani i le faaliliuga. E pei foi o Iosefa, sa le faamalieina foi Oliva i lotu faaonapo nei ma sa talitonu i se Atua o vavega o loo faaali mai pea Lona finagalo i tagata.<sup>18</sup> Ae sa mamao ese Iosefa ma papatusi auro, ma sa leiloa e Oliva pe mafai faapefea ona ia fesoasoani i le galuega pe afai e nofo o ia i Manaseta.

I se tasi aso o le tautotogo, a o mamafa le toulu o timuga i luga o le taualuga o le fale o le au Samita, sa ta'u atu e Oliva i le aiga ua ia manao e alu i Haramoni e fesoasoani ia Iosefa pe a tuua le aoga. Sa uunaia o ia e Lusi ma Iosefa le Matua ia āle atu i le Alii pe o sa'o ona manao.<sup>19</sup>

Ina ua malolo e moe, sa tatalo faalilolilo ia Oliva e fia iloa pe moni mea na ia faalogo ai e uiga i papatusi auro. Sa faaali e le Alii ia te ia se faaaliga e uiga i papatusi auro atoa ai ma taumafaiga a Iosefa ia faaliliuina. Na i ona luga

... went his people & prophet & left & he departed into the wilderness  
... & came now by the borders near the shore of the Red Sea & he took  
... up in the wilderness, the border which was nearer the Red Sea  
... land, so he called it the land of his people which consisted of  
... ariah & my elder brother with his wife Laman Lemuel  
... am 17. 6. 18. w/ pain that when he had travelled three days in the wilderness  
... & tiloilo at the river valley he with a river water & came to say  
... that he built an altar of stones & made an offering unto the Lord & gave  
... thanks unto the Lord our God & I came to pay that I called the name of the  
... river Laman & it emptied into the Red Sea & it really was in the border  
... with the mouth to the west. In my garden saw that the water of the river

### O Oliva Kaotui sa fai ma tusiupu mo lenei itulau o le faaliliuga o le Tusi a Mamona.

se lagona toofilemu, ma sa ia iloa ai e tatau ona ia ofo atu e fai ma tusiupu a Iosefa.<sup>20</sup>

E lei faamatalaina e Oliva i se tasi lana tatalo. Ae o le taimi lava na uma ai le vaituuaga o le aoga, na la savavali ai ma le uso o Iosefa o Samuelu mo Haramoni, e silia ma le selau maila le mamao. Sa malulu le auala ma palapala ona o le timu o le tautotogo, ma sa satia i le aisa se tamaivae o Oliva i le taimi na la taunu ai ma Samuelu i le faitotoa o le fale o Iosefa ma Ema. Ae na naunau o ia e fia feiloai i le ulugalii ma ia iloa e ia lava pe na faapefea ona galue le Alii e ala i le perofeta talavou.<sup>21</sup>

O le taimi lava na taunu ai Oliva i Haramoni, sa peisea'i ua leva lava ona i ai o ia iina. Sa leva le po o talanoa Iosefa ma ia, faalogologo i lana tala, ma tali ana fesili. Sa iloa gofie lava na lelei le a'oga a Oliva, ma sa vave lava ona talia e Iosefa lana ofo ia fai ma ana tusiupu.

I le mavae ai o le taunu atu o Oliva, o le galuega muamua lava a Iosefa o le faamalupuipua lea o se nofoaga e galulue ai. Sa ia talosagaina Oliva e tusi se feagaiga lea sa folafola atu ai Iosefa na te totogi atua i lona tama faaletulafono le tamai fale lea sa la nonofo ai ma Ema, faapea ai ma le falepovi, le faatoaga, ma le vaieli na lata ane.<sup>22</sup> I le mafaufau ai i le soifua manuia o lo la afafine, sa malilie ai matua o Ema i tuutuuga ma folafola atu e fesoasoani e faatoofilemu popolega o tuaoi e uiga i lo latou atuatuvale e uiga ia Iosefa.<sup>23</sup>

Ae o lea taimi, na amata ai ona faaliliu ia Iosefa ma Oliva. Sa lelei lo la galulue faatasi ai, i lea vaiaso ma lea vaiaso, faatasi ai ma Ema i le tele o taimi i totolu o le potu lava e tasi sa faia ai ana galuega o aso faisoo.<sup>24</sup> O nisi taimi sa faaliliu ai Iosefa e ala i le tilotilo atu i mea faaliliu ma fatauina i le faaPeretania mataitusi o i luga o papatusi.

E tele taimi sa ia iloa ai e sili ona faigofie le faaaoga o se maa vaai se tasi. Na te tuu le maa vaai i totolu o lona pulou, ona tuu atu lea o ona foliga i totolu o le pulou e poloka ai le malamalamama, ae pulatoa atu i le maa. O le malamalamama mai le maa e susulu i le pogisa, ma faaali mai ai upu ia sa faalau atu e Iosefa a o kopi faanatinati i lalo e Oliva.<sup>25</sup>

I lalo o le taitaiga a le Alii, sa lei taumafai Iosefa e toefaaliliu itulau sa leiloloa. Ae, na faaauau pea e ia ma Oliva ona faagasolo ia faamaumauga. Sa faaali atu e le Alii e faapea sa faatosina e Satani ia tagata amioleaga e ave ia itulau, fesuiai ia upu, ma faaaoga ia faaoso ai le masalosalo i le faaliliuga. Ae na faamautinoa atu e le Alii ia Iosefa sa Ia musuia ia perofeta anamua o e sa saunia ia papatusi e faaaoga ai se isi tala e atoatoa atu o anomea na leiloloa.<sup>26</sup>

"O le a ou faafememea'iina i latou o e fesuia'a a'u upu," na ta'u atu ai e le Alii ia Iosefa. "O le a Ou faaali atu ia te i latou e sili atu lo'u poto nai lo le faitogafiti-poto o le tiapolo."<sup>27</sup>

O le avea ma tusiupu a Iosefa na faagaeetia ai Oliva. O lea aso ma lea aso, sa ia faalogologo ai a o faalau mai e

lana uo le talafaasolopito faigata o malo tetele e lua, o sa Nifae ma sa Lamana. Sa la aoao ai e uiga i tupu amiotonu ma tupu amioleaga, o tagata na pauu atu i le nofopologa ma sa laveaiina mai ai, o se perofeta anamua na faaaogaina maa vaai e faaliliu ai faamaumauga na toe maua mai ogaleele na tumu i ponaivi. Faapei o Iosefa, o lena perofeta o se talifaaaliga ma tagatavaai ua faamanuiaina i le meaalofa ma le mana o le Atua.<sup>28</sup>

Sa toe molimau mai talafaamaumau ia Iesu Keriso, ma sa vaaia e Oliva le auala na taitai ai e perofeta se ekalesia anamua ma le auala sa galulue ai alii ma tamaitai masani i le galuega a le Atua.

Ae sa tele pea fesili a Oliva e uiga i le galuega a le Alii, ma sa galala o ia mo tali. Sa sailia e Iosefa se faaaliga mo ia e ala i le Urima ma le Tumema, ma sa tali mai le Alii. “Afaie te ole mai ia te a’u o le a e mauaina,” na Ia tautino atu ai. “Ma afaie te ole atu, o le a e iloa mealilo ua silisili ma ofoofogia.”

Na uunaia foi e le Alii ia Oliva ia manatua le molimau na ia maua a o lei sau i Haramoni, lea na teufatuita e Oliva ia te ia lava. “Ou te lei tautala atu ea le filemu i lou mafaufau e uiga i le mataupu? O le a se molimau sili atu e mafai ona e maua nai lo le molimau mai le Atua?” na fesili ai le Alii. “Afaie ua Ou tau atu ia te oe mea e leai se tagata na te iloaina, ua e lē mauaina ea se molimau?”<sup>29</sup>

Sa ofo lava Oliva. Na vave ona ia ta’u atu ia Iosefa e uiga i lana tatalo faalilolilo ma le molimau paia sa ia mauaina. Semanu e leai lava se isi na te iloaina vagana ai le Atua, na ia fai atu ai, ma ua ia iloa nei e moni le galuega.

Sa la toe foi e galulue, ma sa amata ona mafaufau Oliva pe mafai foi e ia ona faaliliu.<sup>30</sup> Sa ia talitonu e mafai e le Atua ona galue e ala i meafaigaluega e pei o maa vaai, ma sa ia faaaogaina i nisi taimi se tootoo faalelagi ia maua mai ai le vai ma minerale. Ae sa ia le mautinoa pe na galue lenei tootoo e ala i le mana o le Atua. O le faagasologa o se faaaliga sa avea pea ma mealilo ia te ia.<sup>31</sup>

Na toe ave e Iosefa fesili a Oliva i le Alii, ma sa ta’u atu e le Alii ia Oliva e faapea sa ia te ia le mana e maua ai le malamalama pe afai e ole atu i le faatuatua. Na faamautu mai e le Alii o le tootoo a Oliva na galue e ala i le mana o le Atua, e pei o le tootoo o Arona i le Feagaiga Tuai. Ona ia aoao atili lea ia Oliva e uiga i faaaliga. “O le a ou ta’u atu ia

te oe i lou mafaufau ma lou loto, e ala i le Agaga Paia,” sa Ia tautino mai ai. “Faauta, o le agaga lenei o faaaliga.”

Sa Ia ta’u atu foi ia Oliva e mafai ona ia faaliliu ia faamaumauga e faapei ona sa faia ai e Iosefa, pau lava le mea ia faalagolago i le faatuatua. “Ia manatua,” sa fetalai mai ai le Alii, “a aunoa ma le faatuatua e le mafai ona e faia se mea.”<sup>32</sup>

Ina ua mavae le faaaliga, sa fafia lava Oliva e faaliliu. Sa ia mulimuli i le faataitaiga a Iosefa, ae a oo ina faafaigata le oo mai o upu, sa le fafia o ia ma lē mautonu.

Sa vaaia e Iosefa le tauivi o lana uo ma sa ia malamalamā lelei i ai. Sa tele sona taimi na alu i le tau faaogatusina o lona loto ma le mafaufau i le galuega o le faaliliu, ae sa foliga mai na manatu lava Oliva e vave lava ona ia atamai ai. Sa lei lava le i ai o se meaalofa faaleagaga. Sa ao ona ia faafailele ma atiae i le aluga o taimi mo le faaaogaina i le galuega a le Atua.

Sa vave ona fati Oliva e faaliliu ma fesili atu ai ia Iosefa pe aisea na le faamanuiaina ai o ia.

Sa fesili atu Iosefa i le Alii. “Sa e manatu o le a ou tuu atu ia te oe lena mea, ae e te lei mafaufau i ai ae nao lou ole mai ai ia te a’u,” sa tali mai ai le Alii. “E ao ina e suesue i ai i lou mafaufau; ona ao lea ona e ole mai ia te au pe ua sao.”

Sa faatonuina e le Alii ia Oliva ina ia onosai. “Ua le tatau ona e faaliliu nei,” sa Ia fetalai mai ai. “O le galuega ua valaaulia oe e te faia o le tusitusi lea mo la’u auauna o Iosefa.” Sa Ia folafola atu ia Oliva isi avanoa e faaliliu ai i se taimi mulimuli ane, ae mo le taimi nei o ia o le tusiupu ae o Iosefa o le tagatavaai.<sup>33</sup> ■

O se lisitatoa o galuega ua ttau ua maua i le Igilisi i le saints.lds.org.

O le upu Autu i faamatatalaga ua faaalia ai faamatatalaga faaopoopo i le initoneti i le aupailds.org.


#### FAAMATALAGA

1. Lucy Mack Smith, History, 1844–45, book 7, [9].
2. Tagai Mataupu Faavae ma Feagaiga 10:2 (Revelation, Spring 1829, i le josephsmithpapers.org).
3. Tagai Lucy Mack Smith, History, 1844–45, book 7, [5]–[7].
4. Lucy Mack Smith, History, 1844–45, book 7, [8]–[9].
5. Mataupu Faavae ma Feagaiga 3:1 (Revelation, July 1828, i le josephsmithpapers.org); Lucy Mack Smith, History, 1844–45, book 7, [8]–[9]; Joseph Smith History, 1838–56, volume A-1, 10, i le JSP, H1:246 (draft 2).
6. Mataupu Faavae ma Feagaiga 3 (Revelation, July 1828, at josephsmithpapers.org); Joseph Smith History, circa Summer 1832, [6], i le JSP, H1:16; Lucy Mack Smith, History, 1844–45, book 7, [8]–[9]



7. Lucy Mack Smith, History, 1845, 138; Lucy Mack Smith, History, 1844–45, book 7, [8]–[11].
8. Preface to Book of Mormon, circa Aug. 1829, i le *JSP*, D1:92–94; “Testamoney of Martin Harris,” Sept. 4, 1870, [4], Edward Stevenson Collection, Church History Library; Lucy Mack Smith, History, 1844–45, book 8, [5]; Historical Introduction to Revelation, Mar. 1829 [DC 5], i le *JSP*, D1:14–16.
9. “Testamoney of Martin Harris,” Sept. 4, 1870, [4], Edward Stevenson Collection, Church History Library; Lucy Mack Smith, History, 1844–45, book 6, [9]; book 8, [5].
10. Mataupu Faavae ma Feagaiga 5 (Revelation, Mar. 1829, at [josephsmithpapers.org](#)).
11. Faaaliga, Mat. 1829 [DC 5], i le *JSP*, D1:17.
12. Isaac Hale, Affidavit, Mar. 20, 1834, i le “Mormonism,” *Susquehanna Register, and Northern Pennsylvanian*, May 1, 1834, [1]; “considered” in original changed to “consider.”
13. Lucy Mack Smith, History, 1844–45, book 8, [6]–[7].
14. Lucy Mack Smith, History, 1844–45, book 7, [11].
15. Lucy Mack Smith, History, 1844–45, book 7, [12]; “Mormonism,” *Kansas City Daily Journal*, June 5, 1881, 1; Morris, “Conversion of Oliver Cowdery,” 5–8.
16. Lucy Mack Smith, History, 1844–45, book 7, [12]; Knight, Reminiscences, 5; Mataupu Faavae ma Feagaiga 4 (Revelation, Feb. 1829, at [josephsmithpapers.org](#)); tagai foi Darowski, “Joseph Smith’s Support at Home,” 10–14.
17. Lucy Mack Smith, History, 1844–45, book 7, [12].
18. Oliver Cowdery to William W. Phelps, Sept. 7, 1834, *LDS Messenger and Advocate*, Oct. 1834, 1:15.
19. Mataupu Faavae ma Feagaiga 6 (Revelation, Apr. 1829–A, at [josephsmithpapers.org](#)); Lucy Mack Smith, History, 1844–45, book 7, [12]; book 8, [1].
20. Joseph Smith History, 1838–56, volume A-1, 15, in *JSP*, H1:284 (draft 2); Joseph Smith History, circa Summer 1832, [6], in *JSP*, H1:16; Lucy Mack Smith, History, 1844–45, book 8, [1]; tagai foi Mataupu Faavae ma Feagaiga 6:22–23 (Revelation, Apr. 1829–A, at [josephsmithpapers.org](#)).
21. Lucy Mack Smith, History, 1844–45, book 8, [3]–[4]; Joseph Smith History, circa Summer 1832, [6], i le *JSP*, H1:16.
22. Lucy Mack Smith, History, 1844–45, book 8, [4]; Joseph Smith History, 1838–56, volume A-1, 13, i le *JSP*, H1:276 (draft 2); Agreement with Isaac Hale, Apr. 6, 1829, in *JSP*, D1:28–34; Oliver Cowdery to William W. Phelps, Sept. 7, 1834, *LDS Messenger and Advocate*, Oct. 1834, 1:14.
23. Joseph Smith History, 1838–56, volume A-1, 18, in *JSP*, H1:296 (draft 2).
24. Joseph Smith History, 1838–56, volume A-1, 15, in *JSP*, H1:284 (draft 2); Lucy Mack Smith, History, 1844–45, book 8, [4]; Joseph Smith III, “Last Testimony of Sister Emma,” *Saints’ Herald*, Oct. 1, 1879, 290. **Autu:** Daily Life of First-Generation Latter-day Saints
25. “Book of Mormon Translation,” Gospel Topics, [topics\\_lds.org](#); Joseph Smith History, 1838–56, volume A-1, 15, in *JSP*, H1:284 (draft 2); Oliver Cowdery to William W. Phelps, Sept. 7, 1834, *LDS Messenger and Advocate*, Oct. 1834, 1:14; Joseph Smith III, “Last Testimony of Sister Emma,” *Saints’ Herald*, Oct. 1, 1879, 290; “Golden Bible,” *Palmyra Freeman*, Aug. 11, 1829, [2]. **Autu:** Book of Mormon Translation
26. Mataupu Faavae ma Feagaiga 10:45 (Revelation, Spring 1829, at [josephsmithpapers.org](#)); 1 Nifae 9:5; Upu a Mamona 1; Mataupu Faavae ma Feagaiga 3 (Revelation, July 1828, i le [josephsmithpapers.org](#)).
27. Mataupu Faavae ma Feagaiga 10:42–43 (Faaaliga, Mat. 1829, i le [josephsmithpapers.org](#)). **Autu:** Lost Manuscript of the Book of Mormon
28. Oliver Cowdery to William W. Phelps, Sept. 7, 1834, *LDS Messenger and Advocate*, Oct. 1834, 1:14; Mosaea 8:16–18; tagai foi Ominae 1:20; Mosaea 8:8–13; 28:11–15, 20; Alema 37:21, 23; ma le Eteru 3:24–28.
29. Mataupu Faavae ma Feagaiga 6:5, 11, 22–24 (Faaaliga, Ape. 1829–A, i le [josephsmithpapers.org](#)).
30. Mataupu Faavae ma Feagaiga 6:10–13 (Faaaliga, Ape. 1829–A, i le [josephsmithpapers.org](#)); Mataupu Faavae ma Feagaiga 8:4–8 (Faaaliga, Ape. 1829–B, i le [josephsmithpapers.org](#)); Historical Introduction to Revelation, Apr. 1829–B [DC 8], i le *JSP*, D1:44–45; Revelation Book 1, 13, i le *JSP*, MRB:15.
31. Lucy Mack Smith, History, 1844–45, book 8, [1]; Paul and Parks, *History of Wells, Vermont*, 81; Historical Introduction to Revelation, 1829–B [DC 8], i le *JSP*, D1:44–45; tagai foi Baugh, *Days Never to Be Forgotten*; Bushman, *Rough Stone Rolling*, 73; and Morris, “Oliver Cowdery’s Vermont Years and the Origins of Mormonism,” 106–29. **Autu:** Divining Rods
32. Mataupu Faavae ma Feagaiga 6 (Faaaliga, Aper. 1829–A, i le [josephsmithpapers.org](#)); Mataupu Faavae ma Feagaiga 8 (Revelation, Apr. 1829–B, i le [josephsmithpapers.org](#)); Joseph Smith History, 1838–56, volume A-1, 13–14, i le *JSP*, H1:276–78 (draft 2); tagai foi Book of Commandments 7:3; ma le Mataupu Faavae ma Feagaiga 8:6–7.
33. Mataupu Faavae ma Feagaiga 9 (Revelation, Apr. 1829–D, i le [josephsmithpapers.org](#)); Oliver Cowdery to William W. Phelps, Sept. 7, 1834, *LDS Messenger and Advocate*, Oct. 1834, 1:14.

**S**a faamatala mai e lou atalii e faapea a o malaga e ala atu i Wisconsin; sa matua mai lava lona toalua. O le a le mea o le a ia faia i lana fanau a o fai le taotoga o lo latou tina?



## TAGATAESE O E E AIGA

Le leva o se tasi afiafi, na telefoni mai ai lou atalii o Garrett mai Eau Claire, Wisconsin, ISA. O ia ma lona toalua o Shelly, ma le la fanau, na malaga mai Alabama, sa fai ai le aoaoga faamiliteri a Garrett, faasolo atu i le Minot Air Force i Dakota i Matu. Sa ia faamatala e faapea a o latou malaga atu e ui atu i Wisconsin, sa tigaina lava le mai o Shelly. Sa latou maua se falemai, ma sa faatulagaina le faia o se taotoga faafuasei o le pito gaau i le taeao na sosoo ai.

Sa ou fuafua e lele atu ma feiloi ma i latou, ae sa le mafai ona ou oo atu iai seja vagana le aso na sosoo ai. Na faailoa mai e lou atalii atugaluga e faatatau i le mea e fai i lana fanau—o le lima tausaga, tasi le tausaga, ma le pepe e tolou ona vaiaso—a o iai le latou tina i se taotoga. Ona o le lei-loa o se isi i le eria, na ia manatu ai e

valaaau atu i le epikopo i Minot, e ui ina sa le i feiloi i laua. Na faapea mai le epikopo i Minot o le a ia faafesoo-taia le epikopo i Eau Claire.

I le taeao na sosoo ai, na feiloi ai Garrett ma le epikopo i Eau Claire, faatasi ai ma le peresitene o le Aualofa, i lona faetalimalo. Na latou faimai e fifia e tauis tamaiti a o iai Shelly i lona taotoga. Mulimuli ane ua faapea mai Shelly sa matua lagona e ia le filemu le tuu atu o tagataese e toalua—o e aiga i le talalelei—e tauis lana fanau. I le taimi na ou taunu ai i Eau Claire, ua faasolosolo ina manuia Shelly ma ua toe faatasi o ia ma Garrett ma le fanau a lau fanau. Sa matou faafetai mo le fesoasoani ua matou maua i le taimi na matou manaomia ai.

Ina ua tuanai ni nai vaiaso, sa ou matamata ai i le konafesi aoao o

Oketopa 2016 lea na saunoa mai ai Peresitene M. Russell Ballard, Sui Peresitene o le Korama a Aposetolo e Toasefululu, “O fea o le a e alu iai e maua ai se Ekalesia auiliili ma musuia o le faalapotopotoga faatulaga e aoao ai oe ma lagolagoina e alii ma tamaitai o e ua matua tuuto atu lava i le tautuaina o le Alii e ala i le auauna atu ia te oe ma lou aiga?” (“O Ai Tatou te O i Ai?” *Liahona*, Nov. 2016, 91).

Sa ou le manofonofo ae mafaufau i le mea na tupu i Eau Claire. O se faamanuiaga le avea e le gata o se tagata o le Ekalesia ae o se tagata foi o le aiga o le talalelei, tatou te auauna ma faamanua ai le tasi i le isi po o fea lava le mea tatou te iai. ■

Jeff Messerly, Iuta, ISA

# SA FAAFOFOGA LE TAMA FAALELAGI I LAU TATALO

Sa matou nonofo ai pea i lo matou satunu moni o Argentina, ina ua amata lo maua aiga ma lou toalua. O i maua o ni faifeautalai ua foi mai a ma misiona ma iloa ai o se faamanuiaga le faaipoipo i le malumalu o le Alii. Sa ma fiafia e savaval i le ala e toe foi faatasi atu ai i le Tama Faalelagi.

Sa ma iloa o le ata o le faaolataga e aofia ai tofotofoga, ae sa ma talitonu o le a mafai ona ma manumalo mai so o se mea e ala i le faatuatua ma le tatalo. Ae sa ma le i faamoemoeina ni puapuaga e oo mai ia i maua e aunoa ma le faagataina. O lea tofotofoga ma lea tofotofoga sa foliga ua pau mai o se timu i o maua luga.

I se tasi aoauli sa na o au lava, ua lagona le faanoanoa tele ma tagi aue ona o o maua tofotofoga. Sa ou le iloa po o le a le mea a fai. Soo se taimi sa ou taumafai ai e taofi le tagi, sa atili ai ona ou lagona le faanoanoa ma le faatu.

Ona ou manatu lea i le tusa o le tele o alii ma tamaitai o e na faasoai mai ia te au le taua o le tatalo mo i latou i taimi faigata. E iai lau molimau i le tatalo, ae ua matua mafatia lava lou mafaufau ma le agaga na ou manatu ai o le a ou le maua ni upu e tautala ai.

I loimata maligi, sa ou tootuli ifo i tafatafa o lou moega ma i lou loto atoa lava, sa ou aioi atu i le Tama Faalelagi mo se faamafanafanaga ma le filemu. Sa ou le fesili atu mo se tali pe ina ia aveesea tofotofoga. Sa na ona ou ole atu mo se filemu.

A o ou tatalo, na ou faalogoina ai se tuitui i lou faitotoa i luma. Sa ou tatala le faitotoa, ma loimata ua iai pea i ou

mata, ma vaai atu i se tuafafine mai le Aualofa. Na ia faimai sa galue o ia i le eria ma sa afe mai i lana uila afi. Pau le mea sa mafai ona ou faia o le fusi ia te ia. Sa ia faapea mai, "ou te le iloa pe aisea, ae sa ou lagona le manaomia ona ou afe mai ma vaai oe."


Sa ma nonofo i le laulau o lou umukuka ma ia fesoasoani e faamafanafana mai ia te au. Ina ua uma ona ma talanoa mo ni nai minute, sa amata loa ona ou

lagona e le na o au ma e ua faafogaga mai le Tama Faalelagi i lau tatalo.

O se faamanuiaga le mafai ona talanoa i lou Tama Faalelagi e ala i le tatalo. Sa ia faafogaga mai ia te au i lou taimi o le manaomia ma auina mai se tasi o Ana fanau e fesoasoani mai ia te au. Ou te faafetai sa lagona e lenei tuafafine le musumusuga a le Agaga ma mulimuli ai. ■

Raquel Pedraza de Brosio , Iuta, ISA

E iai lau molimau  
i le tatalo, ae ua  
matua mafatia lava lou  
mafaufau ma le agaga  
na ou manatu ai o le  
a ou le maua ni upu  
e tautala ai.




## O LE TUSI A MAMONA TUAI

ni nai tausaga ua mavae, sa ou maua ai se meli faaleo i lau telefoni: "Po o Dan Hoobs lea o lo o nofo i Idaho Falls ma auauna atu i se misiona i Uasigitone i le 1974? O Toma Janaky lea. Ou te manatu sa e aoaoina lou tina ma lou tama."

Sa ou tei. Sa ou faamisiona i Texas, ISA, ae le o Uasigitone, ae ou te iloa le igoa. Na vave ona ou mafaufau i le tusi i luga o lau kapoti—o se lomiga o le 1948 o le Tusi a Mamona. Sa ou tatala atu i se savali na tusilima i le faavaa o le itulau: "Ia faatasi le Atua ma oe. Ia faamanuia oe e le Atua! Frank ma Virginia Janaky, 1974." Na faataalise ona toe foi lou mafaufau i tua i le 35 tausaga.

Sa 21 ou tausaga ma ua latalata i le faaiuga o lau misiona i Houston, Texas. Sa ma talai ma lau soa e aunoa ma se manuia tele ina ua ma tuitui atu i se faitotoa na tali mai ai se alii ma valaauina ma le fafia i maua i totonus. Sa ia faailoa mai o ia o Frank Janaky ma faailoa atu maua i lona toalua o Virginia. Sa puupuu la ma asiasiga ia i lau.

I asiasiga na sosoo ai, sa maua aoao atu ai i lau i le talalelei. Sa le



I se tasi o lesona, na ou iloa atu ai se kopi tuai o le Tusi a Mamona i luga o le fatatusi. A o le i o ma o ese, na saini e Frank le Tusi o Mamona tuai ma tuuina mai ia te au o se meaalofa faamavae.

mananao i laua ina ia papatiso, ae sa faauo mai pea i laua. I se tasi o lesona, na ou iloa atu ai se kopi tuai o le Tusi a Mamona i luga o le fatatusi. Na ou le manatua pe faapefeea ona iai ia i laua le tusi, ae ou te manatua ona faapeea atu ou te fiafia tele iai.

E le i umi se taimi ae ou te le i toe foi atu i lou aiga, sa ma afe iai ma lau soa e faatofa iai. A o le i o ma o ese, na saini e Frank le Tusi o Mamona tuai ma tuuina mai ia te au o se meaalofa faamavae. Sa ia fesili mai pe mafai ona ou saini i le Tusi Paia a lo latou aiga ma lou igoa ma le tuatusi. O le taimi mulimuli lena sa ou vaai ai i le aiga o Janakys, ae sa ou tausia lelei la latou meaalofa.

Sa ou tali atu le valaau mai i le telefoni i lena afiafi. Na toe fesili mai Toma ia te au pe na fai sau misiona i Uasigitone i le 1974. Na ou faiatu ia te ia sa ou talai i Texas ma fesili iai po o ona matua ia Frank ma Virginia.

Sa ia faimai o ona matua sa siitia mai Texas i Uasigitone. Na ia manatu e faapeea o faifeatalai na asiasi ona

matua sa i Uasigitone. Sa fai mai o ia sa ia mauaina lou igoa ma le tuatusi i totonus o le Tusi Paia a le aiga.

"Ou te telefoni e tau atu ia te oe e faapea o maua ma lou uso ua uma ona papatisoina, ona o le lelei o faifeatalai i ou matua," sa ia faimai ai. Sa fiafia tele i laua i faifeatalai uma sa fesootai atu ia i laua i le tele o tausaga."

Ona tau mai lea e Toma ua maliliu uma i laua.

"Ae o lea ua maea ona matou faia o laua galuega i le malumalu," sa ia faimai ai.

Ma loimata i ou mata, sa ou faafetai ia Toma mo lana valaau ma.

Mo ni tausaga sa ou lagona ai e faapea o lau misiona sa tau leai ni faamanuiaga. O nisi o taimi sa ou faapea ifo ai pe na ou pai atu ea i se olaga o se tasi a o ou auauna atu. O le telefoni mai a Toma o se alofa mutimutivale mai le Alii. Ou te faafetai mo lau misiona ma se vaega laitiiti sa ou faia i le aumaia o le talalelei i le aiga o Janaky. ■

Dan Hobbs, Idaho, ISA

# O TATALO A SE TINA FOU

Le avea ai ma se tina mo le taimi muamua mo se tamaititi laitiiti ma ulavale, ou te lagona i nisi taimi le i ai lo'u olaga o sina mea e sili atu nai lo le suiga o napekini ma le faatulagaina o taimi mo le fafagaina

Ao tau faamasani i le tulaga faatina, sa ou le amanaiaina o'u manaoga faaleagaga. Nai lo le faitau o tusitusiga paia, e masani lava ona faanana ai i totonu sina moe e matuai manaomia lava po o le toe tasi lava se uta tagamea. O tatalo e masani lava o ni aioiga faatatope i lo'u Tama oi le Lagi ina ia moe la'u tama ma moe ai *pea*, po o le fesoasoani mai ia ou onosaia le aso.

Ina ua fa masina o la'u tama, na ou iloa le vaivai o lo'u tulaga faaleagaga ua i ai. Ua faaitiitia lo'u naunau e faamalosia la'u molimau. Sa ou le'i lagona le fia nofo i le tolu itula o le lotu, ma o isi tiutetauave i le fale ma le lotu na foliga mai ua le o toe i ai sou taimi po o le malosi mo ia mea. Sa ou toe fia lagonaina le malamalamo o le talalelei, peitai sa ou vaivai ma leiloa po o fea e toe amata mai ai. I se tasi po sa ou tatalo faatauanau atu ai mo se fesoasoani.

O le taeao na sosoo ai, sa ou fosia ai a'u lava e alu i le lotu. Ao faalologo ai i le lesona i le Aualofa, sa ou vaaia se pepa lautele o i ai se savali o loo faailoa mai ai le faamoemoega o le Aualofa. Na ou vaai i le pepa i Aso Sa uma, ae ou te lei mafaufau muamua lava i lana savali. Na tau mai ai o le faamoemoega o le Aualofa o le fesoasoani lea i tamaitai "ia faateleina le faatuatua ma le amiontu o le tagata lava ia, faamalosia auaiga ma aiga, ma sailia ma fesoasoani ia i latou e le tagolima."

Sa ou toe faitauina. O le taimi lava lea sa taulai atu lo'u mafaufau i le "faateleina le faatuatua ma le amiontu o le tagata lava ia." Na manino mai ia te au o le taimi muamua e mafai ona ou faataunuina o'u valauga ma auauna atu ma le mataalia i isi, sa manaomia lo'u tausia o lo'u lava soifua maloloina faaleagaga. Sa ou amata i le tuueseina o le taimi i aso taitasi e faitau ai ia tusitusiga paia. Sa ou galue foi ina ia manatunatu loloto pe a ou tatalo.

A o amata ona ou fafagaina lou

Sa ou iloaina lo'u le amanaiaina o o'u manaoga faaleagaga. Nai lo le faitau o tusitusiga paia, e masani lava ona faanana i totonu sina moe e matuai manaomia lava po o le toe tasi lava se uta tagamea.

lava faatuatua ma le amiontu faaletagata lava ia ma saili le taitaiga mai le Tama Faalelagi, sa ou lagona le toe faamalosia o lo'u alofa mo le talalelei toefuataiina a Iesu Keriso. O le auauna atu i valaauga, asiisi i o'u uso a Aualofa, ma le ai ma le inu i le faamanatuga i vaiaso taitasi na amata ona toe anoa i lo'u olaga. Ma o mea na ou mafaufau ua le o toe i ai sou taimi ma le malosi e fai ai, ua avea nei ma se faamafanafanaga ma malosiaga ia te a'u ma lo'u aiga. ■

Krystal Baker Chipman, Iuta, ISA



**Na iloa e lenei tala-  
vou matua mai  
Kana e ui ina foliga  
ua leai se faamoe-  
moe o le olaga, e  
mafai lava ona e  
faalagolago i le  
Tama Faalelagi.**



# O Le Auala na Aoao Ai Eric e **Talitonu i le Atua**

**Saunia e Richard M. Romney**

Mekasini a le Ekalesia

**A**o 3 tausaga o Eric Ayala o Techiman, Kana ua 2l nei ona tausaga, sa i ai o ia ma lona tina i se maketi i tafaala ina ua seu ane se taavale ua le mafai ona taofiofi ma lavevea ai i laua.

O lea ua gasegase i le pepe o le vaega pito i lalo o le tino, ua faafesagai Eric ma lea luitau ma lea luitau a o tuputupu ae o ia e aunoa ma le faaaogaina o ona vae. Mulimuli ane na maua ni faavaa e faamalosia ai ona vae ma mafai ai ona ia tu i luga, ae na vave ona le toe aoga ia te ia ma sa le gafatia ona toe suia. Sa tuuina atu ia te ia se nofoa faatavalevale laitiiti, ae na le aoga foi. Sa maanuminumi ona vae, o nisi o taimi e tete ona musele, ma e sa sasape ona vae.

I Kana, o i latou e le atoatoa tino e manatu i ai o se avega. E utiuti le tupe a le aiga o Eric, e le lava e totogi ai togaftiga faafomai. Ina ua 10 tausaga o Eric, sa maua o ia i se mai papala e mafua mai i le leai o se gaoioiga ma le nofo i luga o le ogalaau ma le sima. Na aloua papala, ma pa faalausosoo, ma e sa manogi leaga lava.



O le ala lea, sa nofo ai Eric i fafo, i luga o se nofoa i se fale taavale e leai ni puipui. Na aumai e lona tina o Lucy, ma ona tuafafine meaai mo ia, faamama ona lavalava, ma fesoasoani e faataele o ia. E masani ona pala Eric i le timu ma tete mai le malulu i le po. Sa ia aoao e fiafia i le susulu o le la i le taeao aua e aumai ai le mafanafana. Talu ai le mativa tele e alu i le aoga ma le le mafai ona galue, na tele ni tausaga o nofo o ia i lena fale taavale, ma i nisi o taimi e alu atu ai i le tuaoi i lana uila faataavalevale.

### O Le Amataga o le Talitonu

Nai lo le tetee atu, "Sa amata ona ou alofa ma talitonu i le Atua," ua fai mai ai Eric. "E leai se isi na aoaoina au e uiga ia te Ia, ae sa ou vaai i Ana foafoaga, ma e sa mafai ona ou vaai i le lelei ma le leaga i tagata. O nisi o taimi e faigata ona talitonu ia te Ia pe a faigata le olaga. Ona ou vaai lea i se mea lelei ua oo mai i lou olaga, ma ou te faiatu, "Vaai, o le Atua ua iienei, ma e matagofie."

E le i aoaoina aloaia Eric i le auala e tatalo ai, ae sa amata ona ia valaau atu i le Atua. Sa



ia maua tali—a o mai o ia, o se avanoa sa lei fuafuaina e vaai se fomai; ina ua fesili atu mo se mapusaga mai ona papala, sa aveeseina i latou; ina ua laiitiiti lana uila faataavalevale, na aumai e se tagata ese se uila lapoa. “Sa faia e le Atua le tele o mea lelei i lou olaga,” ua ia fai mai ai.

Ona, i se mea e foliga mai o se vasega, i le tausaga e 14, sa talia ai Eric i aoga. O lona tina, e ala i le kuka mo isi, sa mafai ona tuufaatasi se tupe e faatau mai ai sona toniga o le aoga. I le aoga, “Sa le mafai ona ou alu i fafo ma faamalositino faatasi ma isi,” sa ia faamatala mai, “o lea sa ou nofo ai i totonu ma suesue i le taimi atoa.” Sa ia faateia lona uluaoga e ala lea i lona maua o tog i sili ona maualuga i le matematika, faitau tusi, ma le tusitusi.

Sa foai mai e le taupou sa mai le falemai se uila pau tolu fou e mafai e Eric ona vili i ona lima, ma faigofie ai mo ia ona alu i le aoga. A o fealuai atu ma toe foi mai Eric, na toe mata-latala uma ona papala. Sa toe aafia foi i le oloa, faatasi ai ma le manogi pala ma ua tafe mai i ona manua. Na faitio tamaiti aoga ona o lano o mumu pea lava pea faataamilo ia Eric. O le 17 o ona tausaga na tau atu ai e le uluaoga ia te ia e alu i le fale ma ia maua lona malosi, po ua le toe foi mai o ia i le aoga.

E i ai se faatoaga laiitiiti a le tama o Eric i tua i le nuu. Sa ia aveina atu le aiga e galulue i le faatoaga, ae sa faamuli Eric i le fale i lona fale

taavale, ua na o ia lava. I le taimi nei, ua toe ola ona matapou ma avea ma ni manua tetele ma ua aafia e le oloa totonu o ona ponaivi, o se tulaga ua lamatia ai lona ola e taua o le ositeo-mailetisi (ponaivi luga).

### Talanoaga ma se *Opoluni*

Ina ua 18 ona tausaga, sa vaai atu Eric i lana uo o Emmanuel Ofosuhence o loo talanoa faaPeretania ma se *opoluni* (o se tamaloa paepae). O le *opoluni* o se faifeautalai Mamona, o Elder Old. “Ua na ona ou tautala i le gagana Twi, ae sa faaliliu Emmanuel mo au: Ua ou tigaina lava ou te manatu o le a ou oti. E mafai ona fesoasoani mai ina ia ou iloa le mea e fai ina ia ou alu ai i le lagi?”

“Sa matou nonono faatasi ma Elder Old ma lana soa mai Aferika ma aoao au. Po o le a lava le mafuaaga, sa laua amata mai i le Upu o le Poto. Na ou iloa sa tautala laua i le upumoni aua ua uma ona ou iloa o le kofe ma le tapaa e leaga.” Sa tuuina atu foi e i laua se tusi laiitiiti ia Eric e uiga i le talalelei toefuataiina a Iesu Keriso ma valaauiua o ia i le lotu.

“Ina ua ou alu, sa ou iloa ai e ese le Ekalesia lenei,” ua ia fai mai ai. “Sa paia lava.” E ui ina atoa le itula o ia tulei atu ia lava i le lotu i lana uila faataavalevale sa fiafia Eric i sauniga. “Na ou manao ou te alu atu i luma e faatasi ai ma tagata,” ua ia fai mai ai. “Ae sa ou nofo i tua ona sa ou iloa lou manogi leaga.”

Sa tau atu e Eric i faifeautalai, “O mea o loo ou aoaoina e moni.” Sa ia tau atu foi e manao o ia e papatiso, ae na fautuaina o ia e fomai ina ia aua nei susu ona manuā. “O le a ou faalagolago i le Atua e maua mai ai tali,” sa ia fai mai ai. Sa auai o ia i le lotu mo le tusa ma le tausaga ma ua mai tigaina o ia ma vaivai e tulei e ia lava lana nofoa faataavalevale iina.

Mulimuli ane, na toe auina atu Eric i le falemai. I Kana, e aumai e tagata gasegase a latou lava suavai, meaai, mea e teu ai moega, vailaau, ma fusi. Afai e leai ni a latou tupe, e le toga-fitia i latou. Sa fai e le tina o Eric ma tuafafine le mea e mafai ona latou fai. Na seasea ona maua e Eric ni meaai ma vailaau, o lea sa faasolo ai lava ina vaivai tele o ia.

### O Se *Asiasiga* e Lei *Mafaufauina*

Ona maua lea e Eric ni *asiasiga* e lei *mafaufau* i ai. O faifeautalai, o Sister Peprah ma Sister Nafuna, na iloa lona ata i le lotu ma oo mai ai e asi mai o ia i le falemai ma aumai ni meaai mo ia. Ua atoa le tausaga talu ona alu o ia i le lotu, ae na ia tau atu ia i latou e manao pea o ia ina ia papatisoina.

I ni nai aso na sosoo ai, na *asiasi* mai le tuafafine o Eric ma iloa ai ua tigaina tele o ia. Sa tamoe atu o ia i le fale ma tau atu i lo latou tina. E ui ina sa faataotolia lo latou tina mai le manuaga o lona vae e le toe foi i se lelei mai le faalavelave ma Eric, sa savali atu o ia i le falemai, ma etuetu

atu i laa uma. "E tatau ona e sau i le fale," sa ia faapea atu ai ia Eric. "Afaí e te oti, pau le mea ou te manao ai ia e latalata mai."

I le taeao na sosoo ai, na o mai ai tamaitai faifeatalai i le fale. "Sa e le i ai i le falemai," na fai mai ai Sister Peprah. "O lea na ma o mai ai iiinei." Sa o mai faatasi ma Elder ma Sister Wood, o faifeatalai sinia mai Niuisila. Sa latou aoina se lisi o mea e manaomia ma tautino atu o le a toe foi atu.

Ina ua tuanai ni nai aso, na aveina atu e le tama o Eric le aiga i le faatoaga—sei vagana ai Eric, ua toe i ai foi na o ia lava e aunoa ma se meaai ma se vai. Ina ua foi ane Elder ma Sister Wood ma iloa ua na o Eric ma ua fiaai, sa laua aumai ni meaai ma vai mo ia. Sa la toe foi ane i le aso na sosoo ai ma iloa ai le suavai o loo tafe mai i lona vae ma maua se pu papala tele i lona suilapalapa. Na la toe avatu vave Eric i le falemai.

Sa iloa e Wood le vaega fesoasoani faafomai mai le Iunaite Setete o le a o mai i Kana. E faia e le vaega nei ia taotoga mo Eric e aunoa ma se totogi. Sa togafitia e fomai tipitipi le papala o le vae o Eric. Ae ina ua ia iloa le tulaga faigata o manua o Eric, e faapea foi ma le oseteomailetisi, na ia mautinoa e le mafai ona ia faia o tulaga uma i Kana. E faavae i luga o lana fautuaga, na faia e le vaega fesoasoani se faagaoioiga e auina atu ai Eric i le Iunaite Setete ina ia maua togafitiga faaopoopo ma tapuni mau ai ona manua. Ma le isi mea, na malilie le nofoaga i Winneba, Kana, e galueaina e tagata o le Ekalesia, e nofo iina Eric pe a foi mai ina ia mafai ona auai o ia ma faaiuina lana aoga.

### **Na Saunia e le Alii**

O Elder Wood, o se inisinia faapolofesa, na toe fausia le uila pautolu vili lima a Eric. Sa faapea foi ona ia faafou atoa o lona nofoa faataavalevale. Sa ia fefautuuai foi ma Petersen Cosgrave o se alii fomai o le Misiona a Kana Kumasi. Na laua lagona e mafai ona papatiso Eric pe afaí e faia tulaga puipua talafeagai.

"Na fusufusi lou tino i le pepa ilia e Elder Wood, ma faataamilo ai tepi faapipii," ua faamatala mai e Eric. "Ona ia sii lea o au i totonu o le vai papatiso ua uma ona togafitia i vailaau. Na ou papatiso i le aso 26 o Iuni, 2016." Sa faalagolago Eric i le Alii, ma e na saunia e le Alii le ala. ■



# Ae Faapefea Pe A Ou Misia?

**O lou fefe i le toilalo  
ua taofia ai au mai  
le atinaeina o taleni  
ma saili avanoa e  
tuputupu ae ai.**

**Saunia e Sarah Keenan**

Mekasini a le Ekalesia

**I**na ua ono ou tausaga, na ave ai e lou tama au ma lou uso e taaalo pasiketipolo. O se taimi muamua lea ua ou taalo ai i se faletaaalo moni. Sa lagona le mamafa o le polo pasiketi i ou lima laiti ma le mama—e oo lava i le tuutuu ifo i le tulaga e sili ona maulalo—e foliga mai ua matua mauluga lava.

“Aua e te popole, pau lava le mea o le togi” o le tala lea a lou tama.

Na ou liliu atu i lou tama. Ae a la pe a ou misi? Sa ou fesili atu ai.

I le sili ma le luasefulu tausaga mulimuli ane, sa ou le manatua pe na ulu lau togi pe leai. Ae ou te manatua le fefe sa ou lagona: “E a pe a ou misi? Ae faapefea pe afai e le manuia au taumafaiga sili ona lelei? O lea lau mea e fai pe a ou toilalo?”

## **O le fefe ina nei Toilalo**

O lena lava fefe i le toilalo na ponaia ai au i lou olaga atoa. Mo se taimi umi lava, sa lava au taleni faalenatura i le tele o gaoioiga e ufiufi ai lena fefe. Ae sa faaalia pea lava o lea i ni auala laiti. Sa ou le i taumafai i se

taaloga seja ou mautinoa ou te lelei ai i lena taaloga. Na ou faafitia mataupu o le aoga sa le fesootai ma mea ou te malosi ai. Pe a ou taumafai gaoioiga fou sa tuai ona ou lelei ai, o lau faaiuga o le vave ona faamavae ma agai atu i se mea sa ou talenia ai lava.

Ona ou alu lea i lau misiona. Mo se taimi muamua, sa faamalosia ai au i se siosiomaga sa faaalia tele ai ou vai-vai ma e sa faigata ona ou sola ese mai ai. Sa faigata ona ou amataina se talanoaga. Sa ou le mautonu ona aoao atu i se gagana fou. Sa teena au i le tele o taimi o le aso. Sa ou toilalo soo—togi ma misi—ma e sa iai ni aso sa ou manatu ai e mulimuli i lau mamanu masani o le toilalo; tuu loa lava ae alu i le fale.

## **Faafitauli o le Faaliliuina**

I le taimi lea, sa ou maua ai se musumusuga ma faasaoga moomia lava mai le tala ia Oliva Kaotui ua taumafai e faaliliu ia papatusi. Ina ua mavae ni nai vaiaso o tusitala mo Iosefa Samita, sa amata ona fesili Oliva pe na te faaliliuina foi papatusi.



Sa ole atu Iosefa i le Alii ma maua mai ai le tali e faatagaina Oliva e faaliliu. Ae ui i lea, sa tuuina atu foi e le Alii ni nai apoapoaiga ia Oliva, e lua o nei e faapea “e onosai” ma “aua le fefe” (MF&F 6:19, 34).

O le faaliliuga e le faigofie e pei ona manatu iai Oliva, Ina ua faigata ona maua ni upu, sa ita o ia ma e le i umi ae faamaamulu.

### Le Silasila i Avanoa

A o ou suesue i le tala, sa ou iloa ai o le faafitauli o Oliva sa faapei lava foi o au. Na ia faamoemoe e vave ona ia taulimaina i le atoatoa le faaliliuga, ma ina ua manino mai e le mafai ona ia manuia i se taimi vave—ma o le a toilalo o ia i le tele o taimi ao ia galue e atinaeina le meaalofa—sa toe foi atu o ia e tusitala, o se mea sa ia fiafia ai. Sa

tonu apoapoaiga a le Alii: sa le onosai Oliva ia te ia lava po o le Atua, ma e sa fefe o ia. O lea sa aveese e le Atua le avanoa mai ia te ia (tagai MF&F 9:3).

Sa ou iloa i le tele o lou fefe i le toilalo sa taofia ai au. Sa ou fefe lava i le “misi o le togi” ua le ou faia ai lava o lena, po ua musu ina ua tuanai ni nai taumafaiga. I le taumafai ai e aloese mai le toilalo, sa ou misia ai avanoa e manuia ai i le lumanai. Sa ou le onosai ia te au lava po o le Atua, ma e sa ou fefe.

O le tala a Oliva Kaotui na aumaia ai foi ia te au le faamoemoe. E ui ina sa fetalai atu le Alii ia Oliva e faapea e le mafai ona ia faaliliuna i lena taimi, sa Ia folafola atu foi, “Ua iai ia te au ni isi tala faamaumau, o le a Ou tuuina ia te oe le mana e mafai ai ona e fesoasoani e faaliliu” (MF&F 9:2). E le faapea sa leiloa le avanoa o Oliva e faaliliu ai ae

sa faatuai. E faapei foi, o avanoa sa ou misia e le i leiloa. O le a tuuina mai e le Alii isi avanoa, pe afai sa ou naunau ina ia onosai ma teena le fefe i le toilalo ua taofia ai au mai le taumafai.

### Leai se Mea e Fefe ai

Sa ou faia le faaiuga ou te galue ai i lou fefe e toilalo. E ui ina ou te lagona pea le popole e talanoa i tagata ou te le masani ai pe aoao atu i se isi gagana, sa ou feololo i mea nei e lua. O nei tomai sa fesoasoani ia te au i lou olaga, e oo lava ina ua maea lau misiona.

O lo o iai pea taimi ou te musu ai e taumafai se mea fou po o le fai o se mea ou te le lelei tonu ai. Ae sa ou aoao ina onosai atili. Sa ou aoao e togi pea le polo i le mama ma aua le fefe e misi. ■

AOLE'I

# VALAAUINA OE



# E AUAUNA ATU

*E faapei le auauna atu i se misiona?*

**Saunia e Ryan Carr**

Mekasini a le Ekalesia

**P**e ua e mafaufau ea e auauna atu i se misiona? Afai o lea, masalo o loo e mafaufau pe faapefea. O lou avanoa lenei e fesili ai i nisi o faifeautalai faamisiona (e le o ni faifeautalai faamisiona moni, ae o nei tali e talafeagai):

**OE:** “Talofa, elders. O le a ni foliga o se aso masani?”

**FAIFEAUTALAI FAAMISIONA:** “Matou te vave ala—i le 6:30 i le taeao. Mo le lua itula e sosoo ai, matou te suesue ai le talalelei ma le gagana o la matou misiona. Matou te iloilo o matou faamoemoega mo le vaiaso ma fuafua lo matou aso. Matou te mafaufau foi i ni fuafuaga faaleoleo pe afai e le avanoa tagata mo a latou faatalanoaga. Ona matou o ese atu lea mai le faitotoa, ma galulue i le aso atoa, e saili tagata e aoao, fetuunai ia le galuega ma tagata o le uarota, ma faataunu ia faatalanoaga e aoao atu ai.”

**OE:** “Pe ua e maua ea i le mai manatu i le aiga?”

**FAIFEAUTALAI FAAMISIONA:** “Ioe, aemaise lava i le amataga o la matou misiona. Ae e mafai ona matou imeli atu i o matou aiga ma faitau imeli mai ia i latou faatasi i le vaiaso. Ua matou maua o le auala e sili e tea ai le manatu i le aiga o le taulai atu lea i la matou galuega.”

**OE:** “O le a sou lagona e uiga i le talanoa atu i tagata e te le masani ai?”

**FAIFEAUTALAI FAAMISIONA:** “Sa matou popole lava i lena mea ina ua

faatoa matou taunu mai iinei, ae iu lava ina e masani ai aua e te faia i aso uma. Matou te iloa e le o tagata uma lava e feiloai i ai o le a mananao e faalogo i la matou savali, ae o nisi e fiafia, o lea e tatau ai ona matou naunau e talanoa i soo lava se taimi. O se mea fiafia le feiloai i tagata ma faamasani i ai.”

**OE:** “E faigata ona aoao atu le talalelei?”

**FAIFEAUTALAI FAAMISIONA:** “Ioe, o le faia i le atoatoa e manaomia ai le faataitai, ae sa lelei lo matou aoaoga i le laumua tutotonu e aoao ai faifeautalai. Matou te taumafai e aoao lesona i se auala e talafeagai ma manaoga o tagata ma tali ai fesili a i latou o loo matou aoaoina. Matou te suesue i le talalelei i aso uma ina ia matou aoao atu ai ma le atoatoa. O le mea e silisili ona taua, o lo matou lagona o le taitaiga a le Agaga. O le faamanuiaina o se faifeautalai e fesoasoani lea.”

**OE:** “E faigata le galuega faafaifeautalai?”

**FAIFEAUTALAI FAAMISIONA:** “Ioe, matou te galulue mo le 70 itula i le vaiaso, ae matua faamalieina lava. Ioe matou te lagona le faanoanoa pe a le alualu i luma tagata e pei ona matou mananao i ai, ae i lona aotelega, o se



faamanuiaga le avea o ni meafaigaluega i aao o le Alii e fesoasoani i tagata ina ia alualu i luma faaleagaga. Matou te tau mafai e aoao atu i le mana o le Agaga Paia aua ua matou iloa e na o le Agaga lava e mafai ona fesoasoani i tagata e maua ai a latou molimau ma liua ai.”

**OE:** “Ae faapefea pe afai ou te le iloa e i ai sau molimau?”

**FAFEAUTALAI FAAMISIONA:** “E le afaina lena—tatalo pea ma faitau tusitusiga paia! Alu i le lotu ma le seminare. Alu i le malumalu pe a e mafai ai. Faalagolago i le Alii ma Ona aoaoga. O le tele o avanoa e te maua e lagonaina ai le Agaga, o le malosi foi lena o le a iai lau molimau. Faataitai le fefasoaaiga o ou talitonuga i afiai faaleaiga. Faitau i le Tusi a Mamona. O le a fesoasoani lea ia te oe e mafai ai ona e aoao atu le talalelei.”

**OE:** “E faapefea ona e saunia mo lau misiona?”

**FAFEAUTALAI FAAMISIONA:** Sa matou suesue i tusitusiga paia, aemaise lava i le Tusi a Mamona. Sa maua a matou galuega ma faasaoina a matou tipe. Ae maimau pe ana matou faitau i le *Aoao Atu Lau Talalelei* ma auai soo i vasega e sauniuni ai mo le misiona. Sa matou faapeea maimau pe ana matou aoao le kuka!”

**OE:** “E te manatu faamata e mafai ea ona avea au o se faifeautalai?”

**FAFEAUTALAI FAAMISIONA:** “E mafai! E tusa ma le 70,000 faifeautalai i le lalolagi atoa. Ae amata lava i le manao: ‘Afai ua ia te outou le manao e auauna atu i le Atua ua valaaulia outou i le galuega’ (MF&F 4:3). Ae e manaomia foi le i ai o se sauniuniga—e tatau ona e sauni e le na o le

faaleagaga ae faapea foi i mea tau tipe, faaletino, ma le faaagafesootai.”

**OE:** “O a nisi mea o le a fesoasoani ou te saunia ai?”

**FAFEAUTALAI FAAMISIONA:** “Fai ma lui le ola i le talalelei ma usiusitai i poloaiga i le sili e te mafai ai. O le a faamalosia ai e lenei mea lau molimau ma fesoasoani e te agavaa ai i le Agaga. A o avea oe ma se faifeautalai, o le a e manao e molimau atu i tagata *mai aafiaga patino* e moni le talalelei. O lea faaaoga le taimi lenei e aoao atili ai i mataupu faavae o le talalelei ma ola ai i na mataupu faavae i lou lava olaga.”

**FAFEAUTALAI FAAMISIONA:** “Matou te fautua atu foi e te faitau fesili o loo i itulau o mulimuli mai. O fesili na o le a fesiliglia ai oe e lau epikopo po o le peresitene o le paranesi a o e faatumu au pepa o le misiona. O le iloaina o nei fesili o le a fesoasoani e te saunia ai. Faatalatalanoa nei fesili ma ou matua ma taitai o le Eklesia. E tele naua fesili, ae aua e te popole—e le faapea o le a e lipoti i le laumua ogatotonu e aoao ai faifeautalai taeao! Faaalu le taimi e te manaomia e sauni ai ina ia oo mai lou aso muamua i le misiona, o le a e agavaa, fiafia, ma sauni e auauna atu.” ■



# FESILI MO FAATALANOAGA

AUTALAVOU



## AGAVAA MA LE MOLIMAU

**1.** Pe i ai sou faatuatua ma sau molimau i le Atua le Tama Faavavau; o Lona Alo, o Iesu Keriso; ma le Agaga Paia?

**MOLIMAU:** "Tofotofo i au upu, ma faaaoga sina vaega itiiti o le faatuatua, ioe, e tusa pe ua le mafai ona e faia o se isi lava mea nai lo le fia talitonu, ia tuu lea manao e galue i totonu ia te oe, seia oo lava ina ia e talitonu ai i se ala e mafai ai ona e tuu ane o se avanoa mo se vaega o au upu" (Alema 32:27).

**2.** Pe i ai sau molimau o Iesu Keriso ua na o le pau lea o le Alo e Toatasina Fanaua a le Atua ma o le Faaola ma le Togiola o le lalolagi? Faamolemole faasoa mai lau molimau ia te au. Na faapefea ona aafia lou olaga e le Togiola a lesu Keriso?

**3.** O le a le uiga ia te oe ia salamo? Pe ua e lagonaina ua e salamo atoatoa i au solitulafono ua mavae?

**SALAMO:** "O le mea lenei e mafai ai ona outou iloa pe afai ua salamo se tagata i ana agasala—faauta, e tautau atu e ia i latou ma lafaoi i ai" (MF&F 58:42-43).

**4.** E mafai ona e faasoa mai lau molimau ia te au ua toefuatai mai le talalelei ma le Ekalesia a lesu Keriso e ala mai i le Perofeta o Iosefa Samita ma o le Peresitene Russell M. Nelson o se perofeta a le Atua?

**5.** Pe iai sau molimau i le faamaoni o le Tusi a Mamona?

**6.** O auaunaga faafaifeatalai faamisiona e manaomia le ola ai i tulaga faatonuina o le talalelei. O le a sou malamalamā e uiga i tulaga faatonuina nei?

**AFAI UA E FILIFILI** E auauna atu i se misiona, e te manaomia ma ou taitai o le Ekalesia lenei taimi paia o le auaunaga ina ia fiafia ma musuia. I le iai o lena faamoemoega i le mafaufau, e taua ia te oe ona saunia, agavaa, ma mafai ona auauna atu. Ina ia fesoasoani ia te oe ina ia saunia, o fesili nei o le a fesili mai ai lau epikopo po o le peresitene o le paranesi e fua iai lou saunia. E mafai ona e faatalatalanoaina nei fesili i soo se taimi ma ia ma ou matua po o taitai o le Ekalesia.

#### a. O le tulafono o le legavia

E tusa ai ma le tulafono o le legavia, na e ola ai i taimi uma e tusa ai ma mea na talanoaina? Afai e leai, o le a le umi talu ona tupu le solitulafono? O le a se mea na e faia ia salamo ai?

**TULAFONO O LE LEGAVIA:** “O le legavia o le mama mai feusuaga, o se tulaga e ‘fifia i ai le Atua’ (Iakopo 2:7). Ina ia ola mama, e ao ona e mama i ou mafaufauga, upu, ma gaoioiga. E le tatau ona e faia ni sootaga tau feusuaga ae e te le i faajipoipo faaletulafono” (Faamaoni i le Faatuatua: O Se Tuisitaiala o le Talalelei [2004], 29).

#### e. Aloese mai ponokalafi

**ALOESE MAI PONOKALAFI:** Sa faamatala mai e Peresitene Dallin H. Oaks o le Au Peresitene Sili e faapea o le auai i le ponokalafi e fua i se faatulagaga e mai le le fuafuaina i le faaaogaina e faigata ona tao-fia, po o le vaisu. O le iloa o le malosi o le auai e fesoasoani e maua ai le fofotalafeagai. Aao atili i le “Faamaloloina Mai le Mailei o Ponokarafi,” Liahona, 2015 Oke. 50-55; ma le overcomingpornography.org

#### i. O le tulafono o le sefuluai

**o. O le Upu o le Poto,** e aofia ai le faaaogaina o vailaau faasaina po o le soona faaaogaina o fualau ua fautuaina.

#### u. Tausia o le aso Sapati ia paia

**f. la faamaoni i au upu uma e te tautala ai ma mea uma e te faia**

Ua e ola e tusa ai ma nei tulaga faatonuina uma? O e ola nei e tusa ai ma ia mea? Pe o le a e ola e tusa ai ma na mea i le avea ai ma se faifeautalai faamisiona?

### TAUMAFAIGA MA AGAVAA

**7. O i ai ni ou moliaga faaletulafono o loo faatalitali e faasaga ia te oe?**

**8. Na e faia ea se soligatulafono matuia o tulafono tau solitulafono, tusa lava pe na lokaina oe pe leai, sa molia oe, pe na tapeina le faamaumauga?**

**9. Na e faia ea ni feusuaga faasaua i se tamaititi i soo se auala, e tusa lava pe na molia oe pe leai, na faamaonia, pe na tapeese ia faamaumauga?**

**10. Na e solia ea soo se isi soligatulafono matuia po o se mea sese lea na tatau ona foia a o lei faia lau misiona?**

**11. Pe o e lagolagoina, faifaimea faatasi, pe o malilie faatasi ma soo se vaega po o ni tagata taitoatas i o latou aaooga po o mea ua latou faia e tetee pe faasagatau ai i aaooga ua taliaina e Le Ekalesia a lesu Keriso o le Au Paia o Aso e Gata Ai?**

**12. E i ai nisi au aitalafu e lei totogiina? O le a faapefea ona totogiina faauma nei aitalafu a o lei amataina lau misiona po o le taulimaina a o e auauna atu i se misiona?**

**13. O e maua pe na maua i soo se tulaga faaletino, faalemafaufau, pe faalelagona lea e faafaigata ai mo oe le faatumauina o se faasologa o taimi masani faafaifeautalai, lea e manaomia ai lou galue mo le 12-15 itula i le aso, e aofia ai le suesue mo le 2-4 itula i le aso, savali po o le tietie i le uila e oo atu i le 8-10 itula i le aso, ma isi mea?**

**14. Na suesueina ea oe ma maua ai ni togafitiga mo le dyslexia po o nisi faaletonu o le faitautusi? Afai o lea, o e maua le toafimalie e faitau leotele ai tusitusiga paia ma isi tusitusiga? E te talitonu e mafai ona e tauhotoina ni mau talafeagai ma isi faamatalaga faatasi ai ma le fesoasoani a lau soa? O a ni auala o e faia i le taimi nei e faaleleia ai lenei faaletonu?**

**15. Na i ai se taimi na e maua ai pe na faia ai se togafitiga mo se faaletonu i le tautala? Afai o lea, o e maua le toafimalie e tautala atu i luma o isi? O e lagona ua ia te oe ni meafaigaluega talafeagai e fesoasoani ia te oe e aoao ai, aoao atu, ma fesootai ai?**

**16. Na i ai se taimi na e inu ai ni vai po o ni fualau po o le togafititia foi mo soo se tulaga nei: faaletonu e aafia ai le le nofo lelei (ADD), faaletonu e aafia ai le pulea e oe lava oe (ADHD), atuatuvale, faanoanoa, atuatuvale sili (OCD), faaletonu e aafia ai fesootaiga ma le tautala (e aofia ai le Asperger)? Afai e ioe, faamolemole faamatala mai.**

**17. Afai sa faia ni ou togafitiga mo se tasi o nei tulaga ma ua le o toe faaaauauina, pe o le vaaiga a se fomai na mafua ai ona le toe faaaauauina? Afai e leai, aisea na e taofia ai? O le a le tulaga manua o lou soifua e aunoa ma le togafitiga po o vailaau faafomai? O le a le taimi mulimuli na e faaaoga ai vailaau faafomai mo nei faaletonu? ■**

Saili vitio ma isi punaoa e saunia ai mo se misiona i le [lds.org/go/81850](https://lds.org/go/81850).

O le tele o tulaga o le le agavaa ma le soifua maloloina o le a fai ma faalavelave ia te oe mai le auauna atu o se misiona tauleleia e mafai ona foia. Saili le fesoasoani e te manaomia. Afai ua faaaauau pea ona iai ni faaletonu o lou soifua maloloinia i le taimi ua e sauni ai e auauna atu, ia faailoa atu i lou epikopo po o le peresitene o le paranesi. O le a mafai ai ona iloilo e le Ekalesia lou tulaga a o le i valaaauina oe i se misiona. Mo se faataitaiga, tagai i le tala a Sister Fletcher o lo o mulimuli mai i nei fesili.

# E MAFAI ONA OU AUAUNA ATU IINA?

Saunia e Erika Fletcher

**M**ai le uluai pene sa ou tuuina i lau fagu e teuina ai tupe mo lau misiona, sa ou iloa ai ou te manao e auauna atu. Sa ou teuina tupe mo le 12 tausaga ina ua oo mai le faasalalauga e faapea e mafai e tamaitai ona auauna atu i le 19 tausaga o le matua. E ui ina sa ou le i mautinoa pe ua talafeagai le taimi mo au, sa tali mai le Alii i au talosaga, ma e sa ou lagona musuia e amata ona faatumu au pepa mo le misiona.

Sa ou manao i lou valaauga i le misiona ina ia tonu mo au ma iloa ai o le faamaoni i ou taitai o le Ekalesia, aemaise ai lava lou soifua maloloina, pau lea o le auala e lagonaina ai le filemu. E maua au i le epilepsi, o le tulaga e mafua ai ona tete le tino e aunoa ma le iloa. O le mea e lelei ai, o lou tulaga e taofia atoatoa lava e fualau. E tusa ai foi, e mafai e lou faalagolago i le fualau ona faatapulaa le mea e tofia au e galue ai.

Manatu ane i lou tei ina ua tofia au e galue i le Misiona a Tominiko Ripapelika Santo Domingo i Sasae! Ae sa iai se faafitauli: sa ou iloa e le maua lau fualau i le Tominiko Ripapelika Santo Domingo. Sa ou lē mautonu. Aisea i le Alii ona musuia taitai o le Ekalesia e auina atu au i se nofoaga e le maua ai au fualau?

Sa matou tatalo faatasi ma lou aiga mo se tali. Sa ou lagona se talitonuga malosi e faapea ua finagalo lava le Alii ou te auauna atu i le Tominiko Ripapelika, o lea sa matou galulue loa. Sa tusi mai e lou fomai se talavai mo le 18 masina, ae ua totogi e le inisiua le na o fualau mo le tausaga, ma tuua ai i matou e totogi mo le 6 masina mulimuli. A o matou agai atu i luma ma le faatuatua, mulimuli ane sa maua seisini tau taugofie.

Ina ua vaetofia au e avea o se faifeatalai, sa faamanuia au e lau peresitene o le siteki ina ia le aafia au e lou tulaga i le misiona—o se folafolaga e mafai ona ou molimau atu sa faataunuina lava. E ui ina sa falo au i lou malosi faletino, ou te iloa e ala i le Togiola a lesu Keriso, sa mafai ai ona ou foia luitau sa ou feagai ai a o lei tuua ma le taimi o lau misiona. ■

*E ui ina maua i le gasegase o le epilepsi [epilepsy], sa mafai e Sister Fletcher (agavale) ona auauna atu i le misiona (o loo pue le ata lenei ma lana soa ma le peresitene o le misiona ma lona faletua).*



# MEA E 5 o le a Aoao Ai Oe e le MATAUPU FAAVAE MA FEAGAIGA

Saunia e Charlotte Larcabal

Mekasini a le Ekalesia

**A**fai o lo o e sauni mo se misiona pe na o le vaavaai i ni auala e talanoa ai i au uo e tusa ai ma ou talitonuga, o lo o iai se taiala sili e mafai ona e taua o leisi tusi lesona a faifeautalai.

O le Mataupu Faavae ma Feagaiga. O iina o le a tatou maua ai aoaoga faavae fou na faatoa faaalia mai ma le matagofie e uiga i aiga e faavavau, o le mea e tupu pe a tatou oti, ma le ala e ao ona faatulaga ai le Eklesia a Iesu Keriso. Ae tatou te maua foi—pea lava pea—poloaga e fetufaai atu le talalelei. O le mea moni, mai folafolaga ma apoapoiga uma ua tuuina atu i faifeautalai, e mafai ona e tagai ane i lenei tusi o mau o se taiala i le fefaaasoaina o le talalelei.

Mo se faataitaiga, o upumoni ofoofogia nei e lima e mafai ona e aoao ai e uiga i le galuega faafaifeautalai mai lava na o le faitauina o le Mataupu Faavae ma Feagaiga.



1

E le manaomia lou popole i le mea e te alu iai.

**MF&F 80:3:** “O le mea lea, ia oulua o atu ma talai atu la’u talalelei, pe i matu po o i saute, i sasa’e po o i sisifo, e le afaina, ona e le mafai ona oulua sese ai.”

“Ou te le talitonu o le fuaitau ‘e le afaina’ e pei ona faaaogaina e le Alii i lenei mau o loo fautua mai ai e le popole o la po o fea e galulue ai Ana auauna. O le mea moni, e matua popole lava o la. . . Na te musuia, taitaiina, ma faatonu Ana auauna faapaiaina. A o tauivi faifeautalai ia avea atili ma meafaigaluega agavaa ma gafatia i Ona aao ma faia le mea sili latou te mafai e faataunu ai ma le faamaoni o latou tiute, o lea e faatasi ai ma Lana fesoasoani “e le mafai ona sese”—pe o fea lava latou te auauna atu ai.”<sup>1</sup>

—Elder David A. Bednar

2

Teu i o outou mafaufau tusitusiga paia, ona e iloa ai lea o le mea e te tautala ai.

**MF&F 84:85:** “la teu i o outou mafaufau e le aunoa afioga o le ola, ma o le a tuu atu ia te outou i lea lava itula le vaega lena o le a fua atu i tagata taitoatas.”

“A o e teu i lou mafaufau afioga o tusitusiga paia ma perofeta o aso e gata ai e ala i le suesue ma le faatuatua, o le a faateleina lou manao e faasoa atu ai le talalelei. Ua folafola atu o le a fesoasoani le Agaga ia te oe e iloa ai mea e te tautala ai pe a e aoao atu.”<sup>2</sup>

—Tala’i La’u Talalelei

# e Faatatau i le Avea o se Faifeautalai

3

O lo o i soo se mea tagata o lo o saili i le talalelei.

**MF&F 123:12:** “Aua o lo o i ai lava tagata e toatele i luga o le fogaelelele … o e ua faatauasoina i le taufaasese poto o tagata, ua latou tao-to ma faatalitali e faasese, ma o e ua nao na taofia mai le upumoni ona ua latou le iloa le mea e maua ai.”

“O loo siomia outou, i aso uma, e uo ma tuaoi ‘o e ua nao na taofia mai le upumoni aua ua latou le iloa le mea e maua ai.’ A o taitaiina outou e le Agaga, e mafai ona outou faasoa atu se manatu, se valaaulia, se tesipō o se tuiti [tweet] e faalauiloa atu ai a outou uo i le upumoni o le talalelei toefuataiina.”<sup>3</sup>

—Elder David A. Bednar

4

Tatalo ma le maelega ina ia e aoao atu i le maelega.

**MF&F 42:14:** “Ma o le a tuu atu ia te outou le Agaga e ala i le tatalo o le faatuatu; ma afai tou te le maua le Agaga aua tou te aoao atu.”

“E ao i faifeautalai ona o ifo i o latou tulivae ma ole atu i le Alii e tatala o latou laulau-faiva ma talanoa ia i latou i faamanuiaga o i latou o le a outou aoaoina. Afai o le a latou faia o lea, o le a oo mai se malamalamā fou i o latou olaga. O le a iai le naunau-taiga sili mo le galuega. O le a latou iloa e faapea i se tulaga sao lava, o i latou o auaua a le Alii ua talanoa atu e fai ma Ona sui. O le a latou maua se tali ese mai a i latou ua latou aoaoina.”<sup>4</sup>

—Peresitene Gordon B. Hinckley (1910–2008)

5

O le a molimau atu le Agaga Paia i ai latou e te talanoa i ai.

**MF&F 100:7–8:** “Ae Ou te tuuina atu ia te oulu se poloai, ia oulu alaga atu soo se mea lua te alaga atu i lo’u igoa, i le mamalu o le loto, i le agaga o le agamalu, i mea uma. Ma Ou te tuuina atu ia te oulu le folafolaga lenei, pe afai e faia lenei mea o le a liligi ifo Agaga Paia e molimau i mea uma ma so o se mea lua te fai atu ai.”

“E mafai foi e le Agaga Paia ona galue e ala i le Malamalamā o Keriso. E le totoina e se faiaoga o upumoni o le talalelei se mea e ese po o se mea fou i totonu o se tagata matua po o se tamaitiiti. Ae, e fesoottai le faifeautalai po o le faiaoga ma le Agaga o Keriso lea ua i ai iina. O le a iai i le talalelei se faailo faapea ia i latou.”<sup>5</sup>

—Peresitene Boyd K. Packer (1924–2015)

## Faatu se Sini

Ua na o se amataga lenei. A o outou suesue i le Mataupu Faavae ma Feagaiga i lenei tausaga, faatu se sini e aoao mea uma e mafai ona fai e uiga i le galuega faafafeautalai. Ona outou faia lea o mea uma e amata ona ola ai i nisi o nei aaooga. Manatua: afai ua ia te outou le manao e auaua atu i le Atua ua valaaulia outou i le galuega; aua faauta ua sinasina le fanua ua saunia e sele-sele” (MF&F 4:3–4). ■

## FAAMATALAGA

1. David A. Bednar, “Valaaulia i le Galuega,” *Liahona*, Me 2017, 68.
2. *Tala’i La’u Talalelei: O Se Taiala mo le Galuega Faafeautalai i le Lalolagi Atoa*, Ian. 11, 2003, 20.
3. David A. Bednar, “Valaaulia i le Galuega,” 70.
4. Gordon B. Hinckley, “Missionary Service,” *Ului Fonotaga o Aooga Faaleautaitai i le Lalolagi Atoa*, Ian. 11, 2003, 20.
5. Boyd K. Packer, “O le Malamalamā o Keriso: O Mea Uma e Ao ona Iloa e Tagata Uma ua Valaaulia e Talai le Talalelei, Aoao Atu le Talalelei, pe Ola ai i le Talalelei” (lauga na tuuina atu i se semina mo peresitene fou o misiona, Iuni 22, 2004), 2, Potutusi o Talafasolopito o le Ekalesia, Aai i Sate Leki.

# 6

## MAFUUAAGA

Tatou

— Te —

Manaomia ai lava le

# EKALESIA!

Saunia e Eric B. Murdock ma Joshua J. Perkey

Mekasini a le Ekalesia

**P**e ua e faalogo ea i se tasi o fesili pe aisea ua i ai sa tatou lotu? Pe aisea tatou te manaomia ai le lotu? Aisea ua latou le na o le faaleagaga ai i latou lava—o atu i mauga poo le matafaga po o se isi nofoaga faapitoa ma lagona latalata ai i le Atua—ma taua lea ua lelei?

E moni lava e mafai ona e latalata i le Atua po o fea lava le mea o e i ai (o le mea moni, o se manatu lelei lava lea!) ae o loo i ai i le Tama Faalelagi *nisi e tele atu* o loo faaputuputu mo outou nai lo le faaleagaga masani ai. Ua finagalo o Ia ina ia avea oe ma tagata silisili e te mafai ai. O le mea moni, ua finagalo o Ia ina ia fai oe ma tofi o mea uma ua ia te Ia ma maua le ola e faavavau. Ma e i ai Lana fuafuaga ma le faatulagaga ina ia mafai ai ona e faia o lea. O le fuafuaga o le ata o le faaolataga, ma o le Ekalesia a Iesu Keriso o le Au Paia o Aso e Gata Ai o le faalapotopotoga—" o le ekalesia ola ma faamaoni e tasi i luga o le fogaeleele atoa" (MF&F 1:30).

O mafuaaga nei e ono i le ala tatou te matua manaomia ai lava le Ekalesia.



### 1. La Aoao ma Auai i le Talalelei a Iesu Keriso

O se tasi o faamanuiaga o le avea ai ma se tagata o le Ekalesia o lo tatou aoao ai i le atoaga o le talalelei (tagai MF&F 1:17–23). Afai ua ia i tatou se manao faamaoni e aoao, ma afai tatou te loto maualalo, tatalo, filiga, ma ususitai, e mafai ona tatou maua se molimau ma i ai le faamoemoe i le Toetu ma i le Togiola o Iesu Keriso.

E ala i taitai o le Ekalesia ma punaoa a le Ekalesia, ua tatou aoao foi e uiga i isi aoaoga faavae taua, e aofia ai le Toefuataiina o le talalelei, o le valaauiina o perofeta i aso nei, ma le natura moni o le Aiga-Atua. O le ola e tusa ai ma mataupu faavae moni e aumai ai ia i tatou le olioli ma le fiafia.

## 2. Ia Maua Sauniga ma Feagaiga Taua

O le galuega a le Tama Faalelagi o le “ia aumaia le tino ola pea ma le ola faavavau o le tagata” (Mose 1:39). Ae o nisi o taimi atonu e galo ia i tatou o Lana galuega e manaomia ai nisi o galuega a i tatou foi! Tatou te agavaa i faamanuiaga o le ola e faavavau e ala i le usi-usitai i sauniga ma feagaiga o le talalelei. Na saunoa mai Peresitene Russell M. Nelson, “Tatou te le na ona *faamoemoe* o tatou ala i le afioaga o le Atua. Ia tatou usiusitai i tulafono e autu i ai faamanuiaga uma lava [tagai MF&F 130:20-21].”<sup>1</sup>

“O sauniga tatou te auai ma feagaiga ua tatou osia ua alagatatau mo i tatou e toe foi atu ai i le afioaga o le Tama Faalelagi ma ola ai ma Ia. O na sauniga ma feagaiga e manaomia ai le perisitua—ua maua lea i le na o le Ekalesia moni a le Atua. A aunoa ma na feagaiga, o le a leiloloa lava i tatou.

## 3. Ia Fesoasoani le tasi i le isi i le Ala

Sa aoao mai Elder D. Todd Christofferson o le Korama a Apostolo e Toasefululua, “O se mafuaaga tele ua faia ai e le Alii se ekalesia, o le fatuina lea o se nuu o le Au Paia o le a lagolago le tasi i le isi i le ‘ala sa’o ma le vaapiapi lea e tau atu i le ola e faavavau.’ [2 Nifae 31:18].”<sup>2</sup>

I le lotu, e mafai ona tatou atinaeina sootaga lelei ma isi. E mafai ona tatou fesoasoani o le tasi i le isi i taimi o puapuaga a o tatou taitai, faatonutonu, ma savavali i tafatafa o le tasi ma le isi (tagai “O le Atua lou Tama,” *Viiga*, nu. 184; Efeso 2:19). Na saunoa Elder Jeffrey R. Holland o le Korama a Apostolo e Toasefululua. ‘O i tatou uma o fanau a le Atua, ma e ao ona tatou aoao le tasi i le isi; e tatau ona tatou fesoasoani le tasi i le isi e ‘saili le ala.’”<sup>3</sup> O le Ekalesia o le nofoaga sili ona lelei e faia ai lena!

Ua ia i tatou le Ekalesia ina ia faapupulaina i tatou ma faailoa atu le upumoni. Ua ia aumai ia tau le malamalama ou te manaomia ona iloa—o le Mataisau o le ata o le faaolataga.

*Nicholas M., Ohaio, ISA*

E ala i le Ekalesia tatou te maua sauniga, osia feagaiga, ma faamauina o tatou aiga e faavavau. O le faalapotopotoga a le Tama Faalelagi i lenei lalolagi ma le mana ma le pule o le perisitua. Ina ia aoao tagata i le upumoni o le talalelei ma ia o mai ia Keriso ma saunia tagata mo le faaega.

*Shantelle M., Ausetalia*

Ua ia i tatou le Ekalesia e fausia ai se siosiomaga e mafai ai e tagata ona faapotopoto ma fesoasoani le tasi i le isi e aoao ma ola ai. Ua i ai le Ekalesia e fesoasoani i tagata e avea pea e faapei o Keriso e ala lea i le faaosofia o tagata uma e vaai atu i isi ma siitia avega a i latou tatou te alolofa ma faaeteete i ai. E fausia ai foi se nofoaga saogalemu e mafai ai e tagata ona ola ai i o latou talitonuga.

*Jeremy P., Illinois, ISA*

E ala i le Ekalesia e mafai ona ou maua se aiga e faavavau, faatasī ma ou matua, tuafafine, ma i se aso ma lou lava aiga.

*Wilford P., São Paulo, Pasila*

E fesoasoani le Ekalesia e faasalalau le alofa ma le talalelei i le kelope ma aumai le malamalama i se lalolagi ua ola pogisa.

*Kenzi B., Uosigitone, ISA*

E ala i le Ekalesia e mafai ona tatou savalia le ala i le tino ola pe a ma le ola e faavavau tatou te ola ai ma lo tatou Tama Faalelagi ma o tatou aiga e faavavau.

*Emma W., New Hampshire, ISA*

## 4. Ia Fesoasoani i Aiga ina ia Agavaa mo le Ola e Faavavau

O le isi mafuaaga sili ua i tatou le Ekalesia o le fesoasoani lea i aiga ina ia agavaa mo le ola e faavavau. O le sauniga o faamauga i le malumalu ua mafai ai ona toe faatasī ia aiga e faavavau. Ina ia tupu lena mea, e ao ona tatou ola agavaa ina ia maua na faamanu-iaga. E fesoasoani le Ekalesia i aiga ina ia fesoasoani ai le tasi i le isi e faia lena.

E pei ona aoao mai e Elder Christofferson, “O le taua o le aoao atu i le talalelei ma sauniga o le perisitua e faatautaia e le Ekalesia ia agavaa ai aiga mo le ola e faavavau.”<sup>4</sup> O lea, e fesoasoani le Ekalesia ina ia tatou ola ai e tusa ma ia feagaiga—ma fesoasoani ia tatou lagolago le tasi i le isi i taualumaga o le olaga.

## 5. Ina ia Faamanuia Tagata Uma i le Lalolagi Atoa.

Na saunoa Elder Christofferson e faapea a o tatou galulue faatasī i le Ekalesia, e mafai e le Tama Faalelagi ona faataunuuiina mea e manaomia ia e le mafai ona faataunuuiina e tagata taitoatasi po o ni vaega toaitiiti.”<sup>5</sup>

E te iloa o tausaga taitasi mai le 30 tausaga ua mavae, sa foai atu ai e le Ekalesia le US\$40 miliona o mea o le uelefea ma fesoasoaniga mo tagata ma galuega o le auauna atu? O le lima foai ma auaunaga fesoasoani ua ofoina mai e tagata o le Ekalesia ua faataunuuiina ai mea e le mafai ona fai i se isi lava auala.

E ala atu i la tatou polokalama maoae o faifeautalai e faasoatatu e faifeautalai le malamalama o le talalelei ma tagata i le lalolagi atoa. Toeitiiti 105,000 faifeautalai (e aofia ai autalavou laiti ma matutua) o loo auauna atu. Oka! E sili ae nai lo le aofai o tagata i nisi o aai!

Ma ona o le lima foai ma le agaalofa o tagata, ua i ai i le Ekalesia punaoa e fausia ai malumalu i le lalolagi atoa. Mai ia Aperila i le 2018, e 182 malumalu a le Ekalesia ua galueaina, ma le isi 13 o loo fausiaina, po ua faasilasilaina.



Ua fesoasoani le Ekalesia ia i tatou ina ia tausia ai le faatulagaga, aoaoga, ma fausia se polokalama lagolago mo tagata. E ala i le faatulagaga o le eklesia, ua faamaonia ai e le Alii ua aoaoina aoaoga faavae moni. Ua tuuina mai e le Ekalesia i tagata faaaliga, faatulagaga, ma taiala e fesoasoani ina ia tatou ola ai e faapei ona finagalo Keriso tatou te ola ai.

*Rachel F Arisona, ISA*

## 6. Ia Fausia le Malo o le Atua i le Lalolagi

O se tasi o mafuaaga silisili ona taua ua faatuina ai e le Atua se eklesia ona o le malo lea o le Atua iinei i le lalolagi (tagai MF&F 65). Ua faaeeina e le Alii i luga o Iosefa Samita ma perofeta ma aposetolo uma mai lena taimi ki o le perisitua. Sa aoao mai Elder Christofferson, “I le pule o nei ki, ua faasaoina ai e ofisa o le peri-situa a le Ekalesia le mama aiai o le aoaoga faavae a le Faaola ma le tauamitonuina o Ana sauniga faaola.”<sup>6</sup>

E ala i taitai o le Ekalesia, e mafai e le Alii ona taitaia Lana galu-ega ma auauna atu i Ana fanau. A aunoa ma lenei taitaiga, o le a tele ituaiga o manatu ma aoaoga pepelo o le a faamatau e taitaia i tatou i ala pouliuli faasaina. I se isi faaupuga, ina ia fesoasoani tatou te iloa le ala e taunu ai i le ola e faavavau, tatou te manao-mia le puipuiga ua tuuina mai e perofeta ma aposetolo ua moni ona tofia ma faauuina. E na o le Ekalesia e tupu ai lena mea. ■

### FAAMATALAGA

1. Russell M. Nelson, “O le Taimi Lenei e Saunia ai,” Konafesi aoao ia Ape. 2005.
2. D. Todd Christofferson, “E Manaomia i Se A Le Ekalesia,” Konafesi Aoao ia Oke. 2015.
3. Jeffrey R. Holland, “Aoao Atu ma le Aoaoina Mai i le Ekalesia,” *Liahona*, Iuni 2007, 90.
4. D. Todd Christofferson, “E Manaomia i Se A Le Ekalesia.”
5. D. Todd Christofferson, “E Manaomia i Se A Le Ekalesia.”
6. D. Todd Christofferson, “E Manaomia i Se A Le Ekalesia.”

E ala i le Ekalesia, e mafai ona faataunuina mea uma e le mafai e ala i tagata taitoatasi.

*Emma W., Iuta, ISA*

E Fesoasoani le Ekalesia ia i tatou aua ua silafia e le Tama Faalelagi o aso nei o taimi faigata. Sa ia silafia tatou te manaomia se perofeta iinei i le lalolagi e taitaiina i tatou. Na te silafia i tatou.

*Matthew P., New Hampshire, ISA*

# O a ni gaoioiga e tatau ona ou faia i ou taimi avanoa ina ia sili atu ona taua?

*“Na talanoa mai Alema e uiga i mea e ao ona faamuamua ina ua ia aoao mai “o lea ua avea ai le olaga lenei ma tulaga nofoavaavaaia; o se taimi e saunia ai e fetaiai ma le Atua” (Alema 12:24). O le auala sili e faaaoga ai le meaalofa taua o le taimi e saunia ai e fetaiai ma le Atua, e ono manaomia ai ni taiala, peitai e moni o le a tatou tuuina i le pito i luga o le lisi le Alii ma o tatou aiga.”*

Elder Ian S. Ardern o Fitugafulu, “O le Taimi e Saunia Ai,” konefesi aoao Oke. 2011.



**Galue Agai Atu i se Mea Gaosia Maea**

Fai se mea e aoga. Onisi taimi ou te faamai-mauina lou taimi e faia ai mea le aoga, e pei o le iloilo o le initonetia mo le lua itula, ma e ou te le fiafia iai i se taimi mulimuli. E mafai ona e taumafai e atiae se taleni fou, galue i lau polokalama o le Alualu i Luma o le Tagata Lava Ia po o le Tiute i le Atua, aoao se uso/tuagane (o le tusitala o se tamaitai) po o se uo, toto se faatoaga, tusi se tala, pe faatulaga lelei—o gaioioiga e leai se gataaga. O le tulafono ou te ola ai o le faamautinoaina o lou faaaogaina o ou taimi avanoa ua fesoasoani pea ia te au e galue agai atu i se mea gaosia maea.

*Kimberly A., 19 tausaga, Alaska, ISA*



**Avea Ma Se Tasi E Te Manao Iai**

E iai se upusii i lou potu malolo e faapea, “Fesili ia te oe lava pe o mea o lo o e faia i le aso ua e latalata atu ai i le mea e te manao e iai taeao.” Mafaufau i le ituaiga o tagata e te manao e avea ai ma au sini o iai. Filifili e fai mea o le a fesoasoani ia te oe e ausia ai au sini. Fai mea e mafai ona faatasi ai le Agaga ma oe ma ogatasi ai ma tulaga faatonuina i le *Mo le Malosi o le Autalavou*.

*Amy P., 16 tausaga, Kentucky, ISA*



### Usu pe Faalogo i Viiga

O le gaoioiga ou te fiafia e fai atili i ou taimi avanoa o le usuina o viiga. Sa ou fai ma sini e tauloto le tele o viiga o le Ekalesia e mafai ona ou fai. E masani ona ou siiina mai nisi o viiga ou te manao e aoao ina ia mafai ai ona ou faalogo iai i so o se taimi e maua ai sou avanoa.

*Justice O., 16 tausaga, Orlu, Nigeria*

### Suesue i le Tusi a Mamona

Ou te faaaogaina ou taimi avanoa sili ona aoga ma taua e ala lea i le duesueina o le Tusi a Mamona. O le maa auau lea o la tatou tapuaiga ma, i saunoaga a le Perofeta o Iosefa Samia, tatou te "latalata atili atu i le Atua e ala i le ola ai i ona mataupu, nai lo se isi lava tusi" (faatomuaga i le Tusi a Mamona).

*Lynne T., 18 tausaga, Accra, Kana*



### Faatu ia Sini

Muamua e manaomia ona e mafaufau i le tagata e te manao e avea ai i ni nai tausaga. Ona e filifili lea le mea e te manao e fai nei i lou taimi avanoa e ausia ai lena sini. I le faaiuga o aso taitasi, ou te mafaufau i au sini ma fai se faatulagaga o mea o le a ou fai i le aso e sosoo ai i lou taimi avanoa.

*Elder Agostinelli, 20 tausaga, Chile Santiago West Mission*

### Suesue i Aoaoga Faavae

O se tasi o auala e faaaoga ai ou taimi avanoa o le duesueina lea o aoaoga faavae a le Alii. Mai se mafaufauga faavae, o le faiatuga o tusitusiga paia, tala mai Mekasini a le Ekalesia, ma isi punaoa faaosofia o le a manuia ai oe sili ae nai lo le faia o isi gaoioiga.

*Josh C. 13 tausaga, Tennessee, ISA*

*O tali ua faamoemoe e mo le fesoasoani ma ni manatu, ae e le o se faalauiologa aloaia o aoaoga faavae o le Ekalesia.*

## Afai e silafia e le Atua faaiuga uma o le a tatou fai, o le a le aoga o la tatou faitalia?

O lenei fesili ua nunumi ai tagata i le tele o seneturi. O le auala tatou te tali atu ai e faalagolago i manatu faavae e lua, upumoni faaalia:

**E silafia e le Atua mea uma.** O le silafia a le Atua e le faatuaoia e le taimi (tagai MF&F 38:2). E faaopoopo iai, e ia te la le aafiaga patino e faavavau o i tatou a o le i o tatou o mai i lenei lalolagi, o lea ua la silafia le faamoemoega ma uiga o i tatou taitoatasi sili atu nai lo tatou.

**Ua ia i tatou le faitalia.** O i tatou o tagata atamamai, o fanau a le Atua, e alofa ia i tatou ma faatuina se fuafuaga e

mafai ai ona avea i tatou faapei o la-pe afai tatou te filifili e usiusitai ia te la (tagai MF&F 93:27-32; Aperaamo 3:21-25). O le uiga o le faitalia o le mafai lea ona tatou filifili mo i tatou lava ae le faatonuina (tagai 2 Nifae 2: 14, 16, 27).

O le silafia lelei e le Atua o o tatou tagata ma Lona muai silafia o a tatou filifiliga ua le mafua ai ona tatou faia o na filifiliga. Aua ua la silafia i tatou ma ona ua ia i tatou le faitalia, ua la valaaunina ma faaosofia i tatou—ae le faamosia i tatou—e faia le lelei ma talitonu ia lesu Keriso (tagai Moronae 7:16-17).

### O Le A Sou Manatu?

"E mafai faapafea ona ou fesootai lelei ma lou aiga?"

Auina mai lau tali ma, afai e manaomia, o se ata manino lelei a o lei oo i le aso 15 o Setema 2018, i le liahonalds.org (oomi le "Submit an Article or Feedback").

E ono fetuunai tali mo le umi po o le manino.

*O finagalo*  
**MONI EA  
LE ATUAE  
FETALAI ATU  
IA TE OE?  
IOE!**

PERESITENE RUSSELL M. NELSON  
MAI LE "FAAALIGA MO LE EKALESIA, FAAALIGA MO O TATOU OLAGA,"  
KONAFESI AOAO IA APE. 2018

# Auala e Ono e Manatua ai Pea le Faaola

Saunia e Elder Gerrit W. Gong

O Le Korama a Aposetolo e Toasefululua

**O**vaiso taitasi, i le aai ma feinu ai i le faamanatuga, tatou te osi feagaiga ai e manatua pea le Faaola. I le faaaogaina o le toeiti-iti lava 400 o mau faasino i le upu *manatua*, o auala nei e ono e mafai ona tatou manatua ai pea o Ia.

Muamua, e mafai ona tatou manatua pea o Ia e ala i le mauaina o le mautinoa i Ana feagaiga, folafolaga, ma faamautinoaga.

Lua, e mafai ona tatou manatua pea o Ia e ala i le faailoaina o Lona aao i otatou olaga atoa.

Tolu, e mafai ona tatou manatua pea o Ia e ala i le faatuatua pe a faamautinoa mai i tatou e le Alii “o ia o lē ua salamo i ana agasala, o ia lava lea ua faamagaloina, ma o A’u, o le Alii, e lē toe manatua lava i latou” (MF&F 58:42).

Lona fa, e valaaulia e Ia i tatou ia manatua e Na te faafeiloai pea i tatou i le aiga.

Lima, e mafai ona tatou manatua pea o Ia i le Sapati e ala i le faamanatuga. I le faaiuga o Lana auauanaga i la le tino ma le amataga o Lana auauanaga toetu—i taimi uma e lua—na ave ane ai e le Faaola le falaoa ma le

uaina ma fetalai mai ia tatou manatua Lona tino ma le toto.

I le sauniga o le faamanatuga, tatou te molimau atu i le Atua le Tama tatou te naunau e ave i o tatou luga le suafa o Lona Alo ma manatua pea o Ia ma tausia Ana poloaiga, ua Ia tuuina mai ia te i latou, ina ia tatou maua Lona Agaga e faatasi ma i tatou (tagai Moronae 4:3; 5:2; MF&F 20:77, 79).

Ma le mea mulimuli, lona ono, ua valaaulia i tatou e lo tatou Faaola ia manatua pea o Ia e pei ona Ia manatua pea i tatou.

Ua tautino mai lo tatou Faaola:

“Ioe, atonu e galo ia te i latou, ae o le a le galo ia te a’u oe.

“Faauta, ua Ou togitogia oe i luga o alofilima o o’u lima” (Isaia 49:15–16; tagai foi 1 Nifae 21:15–16).

Ua ia molimau mai: “O A’u o lē na sii a’e i luga. O A’u o Iesu o le na faasatauroina. O A’u o le Atalii o le Atua” (MF&F 45:52).

Ou te molimau atu ma le agaga maualalo, ma tatalo, o le a tatou manatua pea o Ia—i taimi uma, i mea uma, ma nofoaga uma atonu tatou te i ai (tagai Mosaea 18:9). ■

*Mai se saunoaga i le konafesi aaoao ia Aperila 2016.*



Sa soifua ae i  
**Redwood City,**  
**Kalefonia.**



Lagolagoina i le  
**Korama a**  
**Aposetolo e**  
**Toasefululua**  
i le aso 31 Mati, 2018.

E toa 4 le fanau ma  
fanau a fanau e toa 3.



Faaipoipo atu ia  
Susan Lindsay i le  
**Malumalu**  
**o Sate Leki**  
ia lanuari 1980.

I le mavae ai  
o se uunaiga  
mai le faiaoga  
o taaloga, sa  
ia faataitai  
atu ai mo le  
**‘au lakapi**  
**[amerika]**  
a le aoga ma sa  
fiafia i ai!



Sa auauana atu o se fesoasoani i le  
I.S. Matagaluega o le Setete i  
Uosigitone, D.C., i le 1986.



Sa auauana atu o se  
faifeautalai i le Misiona  
a Taiuani Taipei.

# E Mafai Pea Ona Ou Tatalo



## Fesili mo Tatalo

Siaki tali uma e te malie iai. Faaopoopo ni au lava tali. Ona faasoa lea o mea ua e iloa e uiga i le tatalo ma se isi.

### 1. Aisea e finagalo ai le Tama Faalelagi ia te oe e tatalo?

- Aua o au o Lona atalii/afafine, ma e finagalo o Ia e faafofoga mai ia te au  
 Aua e finagalo o Ia e fesoasoani mai ia te au

---

---

### 2. O le a le taimi e te tatalo ai?

- O po ma taeao uma  
 Pe a ou lagonaina le fefe  
 Pe a ou faia se filifiliga

---

---

### 3 . O fea e te tatalo ai?

- I lou potu  
 I fafo i lalo o fetu

---

---

### 4. O a mea e te tatalo atu ai?

- O sau faafitauli  
 O mea e tutupu i le aso

---

---

### 5. E faapefea ona e lagonaina tali a le Tama Faalelagi?

- Pe a ou faitau i Tusitusiga Paia  
 Pe a ou lagonaina le filemu

---

---

O LAU  
APITUSITATALO



- Tusi i lalo mea o lo o e popole ai pe fia maua ai se fesoasoani.
- Talanoa i le Tama Faalelagi i le tatalo.
- A maea ona e tatalo, faalogo totoa mo le Agaga Paia.
- I le aluga o le vaiaso, vaavaai ma faalogologo pea mo tali.
- Tusi i lalo tali ua e mauaina.



Tatalo FAAMANATU Kati



O le mea muamua, ogatotonu,  
ma mulimuli e fai o le tatalo."

—Peresitene Henry B. Eyring

.....

Tatalo FAAMANATU Kati




"E mafai ona tatou iloa le Alii  
ma faalogo ia te la e ala  
i le tatalo."

—Sister Bonnie H. Cordon

.....

*"Ole Ia te Ia; Na te faafofoga oe Lona atalii  
e alofa ia oe" (Tusipese a Tamaiti, 6).*



### OU TE TATALO PEA LAVA PEA

*Ou te tatalo pe a ou lagona  
le fiafia.*

*Ou te tatalo pe a ou lagona  
le faanoanoa.*

*Ou te tatalo pe a ou fefe  
Ma pe a ou ita lava.*

*E le afaina po o a ou lagona,  
O lou Tama Faalelagi e*

*popole mai*

*O lea afai e leaga pe lelei  
lou aso.*

*Ou te tatalo pea lava pea.*

Saunia e Teresa Weaver

Talofa!  
O lou igoa  
o Steffani!

Ou te taumafai e faasusulu  
atu lou malamalama e ala i le  
faasoaina atu o lau molimau.



### O Se Motu Matagofie

Ou te nofo i Sri Lanka. O se motu atunu matagofie e latalata i le pito i saute o Initia. E iai o matou togavao o le teropika, o le sami lanu moana, ma mea na faaleagaina faasolopito anamua. Ou te alofa i lou atunu!

### ເມෙරමොන්ගේ ජ්‍යෙෂ්ඨ

සිංහල විශ්වාස විශ්වාස  
කවිතා පිටපත්

### Uo mai Soo se mea

O lau aoga e iai tamaiti mai atunu e tele. O nisi o Kerisiano, Musulemi, Hindu, po o Buddhist. Matou te agaalofa ma faauo uma lava o le tasi i le isi.

# O Se Molimau Pupula



## 1. O Se Valaaulia Taufaaafe

I se tasi aso sa fai ai se faatasiga faapitoa o tamaiti Kerisiano. Sa valaaulia matou e faasoa atu a matou molimau. Na faatumulia le potu i le filemu. E leai se isi na alu i luga o le tulaga. Na fefefe tele tagata uma! Ou te matuai ma lava, o lea sa ou lagona foi faapena.

## 3. Faasoa Atu Lau Molimau

Sa ou tau atu i lau vasega e alofa le Tama Faalelagi ia i tatou ma e finagalo ia tatou fesootai atu ia te Ia e ala i le tatalo. Sa ou faasoa atu ou lagona i le tatalo. Sa ou faapea atu ou te iloa le Tama Faalelagi e faafogoga mai pea ia te au ma finagalo e fesoasoani ia te au. Sa ou fiafia sa ou maua le lototele e faasoa atu ai lau molimau. Sa ou lagonaina e faapei sa fai au ma malamalama susulu i se potu toafmalie.

## 2. "Alu, Alu"

Ona oo mai lea o se lagona mafanafana i ou luga, ma e sa ou lagona le Agaga Paia o faapea mai, "Alu, alu." Sa ou faia se tatalo vave i lou loto. Sa ou savali atu i le tulaga ma pepe ua feleleai solo i totonu o lou manava.



## 4. Alu ma Fai

O lau tala ou te fiafia iai i tusitusiga paia o lo o maua i le Tusi a Mamona, na faapea mai ai Nifae o le a ia alu ma fai mea e finagalo iai le Alii. Ou te faamoemoe ou te mafai ona ou maua le lototele e fai le mea e finagalo iai le Tama Faalelagi ou te fai.



## AUINA MAI IA I MATOU SE FETU!

Na fetalai mai lesu ia i tatou "ia faapea ona pupula atu lo outou malamalama i luma o tagata" (Mataio 5:16). E faapefea ona e faasusulu atu lou malamalama? Imeli mai ia i matou se ata o lou fetu ma lau tala, ata, ma se faatagaga a matua i le liahona@ldschurch.org.



# O Le FOLAFOLAGA e le Toe-Taua'imisa

Saunia e Myrna M. Hoyt

E faavae i se tala moni

*"Sa latou ave a latou pelu ma a latou auupegaa uma . . . , ma ua latou tanumia ai maulalo i le eleele"*  
(Alema 24:17).

O le aso lenei o se aso matagofie. O le tei o Timmy o Madi e sau nei. Ma o le a nofo o ia mo le vaiaso atoa! Sa le mafai ona faatali o ia e faaali atu ia te ia o ana meataalo ma taaaalo faatasi ai.

Ina ua sau Madi, na amataina loa lava a la tafaoga. Mo aso muamua e lua, sa la taaaalo ai i tainosoa meataalo ma faafoliga o ni tagata faomea. Sa tele le fiafia. A o le aso tolu, sa le i lelei le faasologa e pei ona iai. Sa le malilie Timmy ma Madi i so o se mea.

"Ta o i fafo ma liliu le fale laau i se vaa o le vateatea!"  
Sa fai atu ai Timmy.

"Ou te le manao iai. Ta nonofo i totonu ma tusiata," na faimai ai Madi.

"E le manaia totonu!"

"Leai, e leai lava! Taua te taaaalo soo lava i taaloga e te manao e taalo ai. Aisea e te filifili soo ai mea ta te faia faatasi?"

Ua fefinuai pea Timmy ma Madi. Sa le toe iai se malie. Sa le manao Timmy i le auala sa ia lagonaina ina ua tauaimisa i laua. O lea na ia mafaufau ai i se mea,

"E, Madi," sa faimai ai Timmy, "ta faapei o le aneti-Nifae-Liae."

"O ai?"

"Aneti-Nifae-Liae O i latou o ni tagata i le Tusi a Mamona o e na tanumia a latou pelu. Sa iai i latou i le



tele o ni taua, ae sa latou faamalie atu, o lea sa salamo ai i latou. Na latou folafola atu i le Tama Faalelagi latou te le toe fetauai lava. Ona latou tanumia lea o a latou auupega i le palapala e faailoa ai ua latou mananao e tausia la latou folafolaga."

Na faafuasei ona oso mai se manatu i le mafaufau o Timmy. "a faia ni pelu meataalo ma tanumia i latou ma folafola atu tate le toe tauaimisa o le tasi ma le isi."

"Lelei la," na fai atu ai Madi.

Sa aumai e Timmy ma Madi ni meataalo o palasitika e faufale mai le potu o Timmy ma fau mai ai ni pelu eseese.

O nisi na uumi. O nisi na pupuu. Ae o isi na felanulanui. Ina ua uma na auina atu e Timmy ma Madi a laua auupega i le fala fofola lapoa i le mea e ulufale mai ai.

"A faafoliga o le fala fofola o se pu lapoa," sa faimai ai Timmy.

Sa la nonofo ifo i le pito o le fala fofola. O lea e taitasi i le taimi, sa taitasi ai ona la tuu atu ai a la pelu i luga o le fala fofola, ma faafoliga ua la tanumia i latou.

"Ou te tautino atu ou te le toe faamisa lava," na faimai ai Timmy, ma faapau ifo lana pelu mulimuli i luga o le faaputuga.

"E faapena foi au," na fai mai ai Madi. "Ia ta o e taalo! O lea le mea e te manao e fai?"

"Ta tusiata," na faapea mai ai Timmy ma le ataata.

Sa ataata atu foi Madi. "Ona ta o lea e taaalo vaa vateatea i fafo."

Mo le toega o le vaiso, na tausia e Timmy ma Madi le la folafolaga. Ma sa tele lo la fiafia, i le taaalo faatasi ina ua faatea i tua a laua tauaimisaga. ■

*E alaala le tusitala i Iuta, ISA.*



O Grace Vlam o se teineitiiti e iva ona tausaga o lo o nofo i Holani i le 1940 i le taimi o le Taua Lona Lua o le Lalo-lagi. Faatoa amata ona osofaia e Nazi Siamani ia Holani.

## PA! PA!

Ua ta le tolu i le vaveao, ma e sa tuipomu le aai. I le tasi o le minute sa moe ai Grace i lona moega, ma o le isi, sa tau mai e Tama ia i matou uma e pulolou uma. O lea ua faapupuu Grace i lalo o le laulau i le umukuka ma lona tama, tina, ma tuagane laiti, o Hipa ma Alavini.

Sa ia faalogo i le papa o pomu ma le taei o tioata i fafo. Sa matuai leotele lava!



*“Po o le a lava le mea e tupu, o le a tausia e le Atua lo tatou aiga,” sa faapea mai ai le Tina.*

“O le a le mea o le a tupu i ai tatou?” Na fesili ai Grace ia Tama.

Sa seluselu e tama lona lauulu. Sa ia tali mai, “Ou te le iloa.” “Ae fai se tatou tatalo.”

Sa uu vavalalata e le aiga o Vlam le tasi ma le isi.

“Tama Faalelagi pele e,” sa tatalo atu ai Tama, “faamolemole puipui saogalemu lo matou aiga.”

E lei umi lava, ae ua faiifo lemu le pisapisao. Sa le toe iai ni pomu papa. Ua saogalemu i latou!

Na uu e tina le lima o Grace ma ataata atu ia te ia. “Manatua ina ua faamau tatou i le malumalu?”

Sa lulu le ulu o Grace. Ina ua latou o ese mai

# O Se Leo o le Filemu

Saunia e Megan Armknecht

E faavae i se tala moni

Initonesia i Holani, sa mafai ona afe i Iuta ma faamau ai i le Malumalu o Sate Leki.

“Po o le a lava le mea e tupu, o le a tausia e le Atua lo tatou aiga,” sa faapea mai ai le Tina.

I le aso na sosoo ai, sa lagona e Grace ia sailini faailomo faalavelave a o iai o ia i fafo i le nofoaga faitele o le aai. Na ia vaai ae ma iloa vaalele i luga ae o lona ulu, ma mea uliuli laiti o lo o pauu mai ai. Sa tu o ia iina, pulatoa, ua matale tele lona gutu.

Na amata ona ee atu se tamaloa ia te ia. “Tamoe! O pomu mea na!”

Sa faataalise atu Grace i lona aiga, ua tatavale lona



fatu ina ua ia taunu saogalemu e oso atu i le faitotoa i luma.

I ni nai aso na sosoo ai, na pulea aloaia ai e Nazis—o taitai ia o le malo o Siamani—ia Holani. O nisi o taimi na latou aveina ai tagata o e sa avea ma galulue i le militeli o ni pagota. Ma ona o Tama sa galue i le militeli a Dutch, sa vaavaai ma le totoa o ia e auofisa o le Nazi.

“Ae le tupu lena mea ia Tama,” sa mafaufau ai Grace. “O i tatou o tagata o le Ekalesia, ma o Tama o se taitai i le auperesitene o le misiona. O le a puipuia o ia e le Atua”

Ina ua tuanai le faapauu ifo o pomu, na tuua ai loa e le aiga o Vlam lo latou aai. I se tasi aso i lana aoga fou, na faalogo Grace o femusuai isi tamaiti aoga.

“O nisi tagata na ave faapagota nei!”

“Pe toe foi mai ea i latou?”

Sa fefe Grace. Po o manuia Tama? Sa tamoe o ia i le saosaoa na ia mafai ai. A o faatopetope ifo i le faitotoa, na ia iloa Tina i le alafale.

“Pe moni ea?” Na fesili ai Grace. “Ua alu Tama?”

Sa le i tautala Tina, ae na iloa e Grace mai ona foliga faanoanoa ua aveesea Tama. O ia ua faapagota o tagataotaua. Sa faalagolago Grace i le puipui. Na fefe tele o ia ua le tagi ai.

“O le a le mea tatou te faia nei?” sa ia manatunatu ai.

I lena taimi, sa faalogoina ai e Grace se leo, “O le a e toe vaai i lou tama.” O se leo filemu ma manino. Na iloa e Grace o le leo o le Agaga Paia. Na maua ai e ia se lagona lelei itiiti.

Na leiloa e ia po o le a tonu le mea o le a tupu, ae na ia iloa o le a tausia saogalemu o ia ma lona aiga e le Tama Faalelagi.

*Efaia pea . . . ■*

*E alala le tusitala i Niu Jersey, ISA.*



“Ou te iloa o loo soifua Iesu Keriso; ou te alofa ia te Ia, ma ou te iloa ma lou loto atoa e alofa o Ia ia i tatou uma taitoatasi.”

**Saunia e Elder Ronald A. Rasband**

O Le Korama a Apostolo e Toasefululu

“*Tutu Faatasi ma Taitai o le Ekalesia*,” Liahona, Me 2016, 49.





Saunia e Elder Jörg

Klebingat

O le Fitugafulu

# Soka ma Aso Sa

**I**siamani, o le soka o le taaloga sili lea ona taatele. Na saini au e lou tama mo le kalapu soka i le lima o ou tausaga. Sa matou toleni faatolu pe faafaa i le vaiaso. O taaloga e masani o Aso Toonai ma Aso Sa. A o ou taalo soka mo le au a le kalapu, sa ou taalo soka ma au uo. Sa matou taaalo soka toetoe o aso uma seia goto le la.

Ina ua 15 ou tausaga, sa amata ona ou taalo mo se au i se aai tele. Na amata ona fai le soka ma mea taua tele. Sa matou toleni atili pea. Sa matou malaga atu i nisi nofoaga e tele. Na matou taaalo ma isi au e tele. Na fai le soka ma ou olaga.

Ina ua toeitiiti atoa lou 18, sa ou iai i se koneseti. Na ou vaai i se tama e pei o lou matua. Sa iloagofie o ia. Sa le inupia, ulaula, pe fai upu masoa. Sa ou fia iloa pe aisea. Na ou iloa o ia o se tagata o Le Ekalesia a Iesu Keriso o le Au Paia o Aso e Gata Ai. O lana faataitaiga na ou manao ai ou te fia iloa atili. Mulimuli ane ua ou auai i le Ekalesia.

Ina ua uma ona ou papatiso, sa ou aoaoina ni mea se lua. Muamua, e le tatau ona ou taalo soka i le Sapati. E tatau ona ou alu i le lotu. Lona lua, e finagalo le Tama Faalelagi ia ou faia se misiona. Ae sa ou lelei lava i le soka. Sa iai sau uo na ma taaalo soka a o ma tuputupu ae. Na ofo mai o ma avanoa e taaalo ai i au faapolofesa. Na talia e lau uo le ofo. Sa ou filifili e faatuana le soka ae ou alu i le misiona. Sa le i faigata le filifiliga aua na ou iloa e moni le Ekalesia.

Ae o lau filifiliga sa faigata mo lou aiga ma uo. Sa le malamalamama i latou i le mea sa ou faia. Na lafo mai e ou matua tipiga nusipepa o lau uo o loo taalo soka. Sa le faigofie lena mo au. Ae sa ou le faafitia lava le auauna i se misiona.

Na faamanuiaina au e le Tama Faalelagi i aso uma ona ua ou filifili e auauna i se misiona. Ua ia faamanuiaina au i le filemu. Ou te lagonaina le lagona lelei e oo mai le faia o le filifiliga sao. ■



# Tavita ma Koliata

Saunia e Kim Webb Reid

O Tavita o se tama o  
le na tausia mamoe.  
O ona uso matutua  
o ni fitafita o lo o  
taumafai e puipui i  
o latou tagata. I se tasi  
aso, na auina atu ai e  
le tama o Tavita o ia  
e ave meaai i ona uso.



Ina ua taunuu atu  
Tavita iina, na ia  
iloa ai se fiafita  
matautia e igoa ia  
Koriata. Na faapea  
mai Koriata afai  
e iai se tasi na te  
faatoilaloina au, o  
le a uma le taua.  
Ae sa leai se tasi e  
toa e tau ma ia.



Na faiatu Tavita o le a *ia* tau ma Koriata. Na faiatu le tupu ia Tavita e leai. O Tavita ua na o se tama o ia, ae o Koriata e malosi ma lapoa! Ae na iloa e Tavita o le a fesoasoani le Atua ia te ia. Mulimuli ane, na faapea mai le tupu, "Alu, ma ia faatasi le Alii ma oe."



Sa le i ofuina  
e Tavita ni ofu  
uamea e pei ona  
faia e Koriata. Sa  
ia ava'e se maa  
ma tuu i totonu  
o lana maata. Na  
ia togi le maa i le  
muaulu o Koriata.  
Na pau ifo i  
lalo Koriata! Ua  
manumalo Tavita!  
Ua faasaoina e ia  
ona tagata.



O nisi o taimi ou te faafeagai ai ma faafitauli tetele, ma taufaamatau. Pe a ou valaau atu i le Atua mo se fesoasoani, o le a fesoasoani mai o Ia e faamalosi ia te au. ■

*Mai le 1 Samuelu 17.*

# E Mafai Ona Avea Au ma Faataitaiga Lelei





**Saunia e Elder  
Marvin J. Ashton  
(1915–94)**

O Le Korama a  
Aposetolo e  
Toasefululua

## TAUMAFAI PEA

*Ina ia avea ma se manumalo i le tuuga mo le ola e faavavau e manaomia ai le taumafai—galue pea lava pea, onosai, ma ia tutumau lelei ma le fesoasoani a le Atua.*

O te mafaufau i apoapoiga a le Faaola ia faia ma le fafia mea uma o lo o iai i lo tatou mana [tagai MF&F 123:17]. Ou te mafaufau i le tama o le atalii faamaumauoa. Na ootia le loto o le tama i le leiloa ma le amio a lona atalii faalogogata. Ae tatou te le faa-  
logo lava i lona tagitui, “O fea le mea ua ou sese ai?” “O le a se mea na ou faia ua oo ai lenei mea ia te au?” Po o le, “O fea le mea ua ou toilalo ai?”

Ae o lea e foliga mai ua tutumau e aunoa ma se faanoanoa i le amio a lona atalii ma talia o ia i lona toe foi mai i le alofa. “Aua o lou atalii lenei, na oti, ua toe ola mai; na le iloa foi o ia, a ua maua. . . .” (Luka 15:24).

A tatou faanoanoa ona o ni tagata o le aiga, e ao ona tatou aoao aemaise lava ona tutumau. A faapea lava ua tatou tuuina atu le alofa, onosai, ma le malamalama, e tusa lava pe leai se alualu i luma ua faailoa mai, ua le toilalo lava i tatou. E tatau ona tatou taumafai pea. . . .



Ina ia avea ma se manumalo i le tuuga mo le ola e faavavau e manaomia ai le taumafai—galue pea lava pea, onosai, ma ia tutumau lelei ma le fesoasoani a le Atua. . . .

. . . O tiga ma toatuga o le a feagai ma i tatou uma. Atonu o le a tatou maua i le lototiga, faanoanoa, maliu, agasala, vaivaiga, mala, gasegase o le tino, tiga, atu o le mafaufau, faitioga le faavaea, nofo toatasi, po o le teena. O le auala tatou te faatautaia ai nei luitau e iloa ai pe o le a avea nei mea ma maa e ponatia ai po o poloka e atiae ai. Mo e lototoa o nei luitau e avea ma mea e alualu ai i luma ma atiinae ai. . . .

O nisi o taimi i le avea ai ma fanau sa tau mai ia i tatou o le a lelei mea uma. Ae le faapena le olaga. E le afaina po o ai lava oe, o le a maua oe i faafitauli. O mala ma lagona le fafia o faalavelave e aunoa ma le iloa i le fuafuaga o le olaga. . . .

. . . O mea silisili e fuaina i le ala e tali atu ai se tagata i mea o tutupu i le olaga e foliga le talafeagai, le uiga, ma le tatau lava. . . .

. . . O Iesu o le Keriso. O se tasi o Ona faailoga o le silisili, Lona tutumau, e tulai o se faailoilo mo i tatou e faataitai iai. I le taimi o Lona aumau ai i le lalolagi sa Ia tutumau pea a o Ia mafatia i tiga ma le teena i lo latou loloto lava. Ou te tuuina atu lau molimau o le a fesoasoani mai le Atua ia i tatou e tutumau a o tatou taumafai e ola ai i Ana aoaoga, saili i Ana fautuaga, ma tausi i Ana poloiga. ■

*Mai le “Afai Tou Te Tutumau lelei,” Liahona, Ian. 1985, 20–22.*

**ATALII FAAMAU OA,  
TUSIA E JUSTIN WHEATLEY**

"Ona atamai ai lea o ia, ua fapea ane, E le toatele ea o auauna a lou tama ua faulai a latou areto ua tote, a o au ou te matelaina!  
"O le a ou tulai ma alu i lou tama, ma o le a faiatu ia te ia, lou Tama e, ua ou agasala i Le o i le lagj, atoa ma ou luma.  
"Ua ou le toe aoga ona taua o lou atalii: ia e avea au e pei o se tasi o au auauna.  
"Ona tulai lea o ia ua alu i ona tama" (Luka 15:17-20).



AUTALAVOU MATUTUA

**NA AOAO ERIC E  
TALITONU I LE ATUA**

*E ui ina ola ai ma manaoga faapitoa  
matuia i Kana, e mafai e Eric ona  
iloa pe a lele i lona olaga.*

44



FAIAOGA O LE AUTALAVOU  
FAAAOFIA LE  
AUTALAVOU E FAAAOGA  
AI TEKINOLOSI

30

FAIFEAUTALAO LE LUMANAI  
FAAAOGA FESILI  
NEI E SAUNIA AI

50

TAMAITI  
FAATUMU TALI O FESILI  
E UIGA I LE TATALO

66

O LE EKALESIA A  
**IESU KERISO**  
O LE AU PAIA O ASO  
E GATA AI